

Rouillé, Guillaume, 1518-1589

Promptuaire des médailles des plus renommées personnes qui ont esté depuis  
le commencement du monde avec brieve description de leurs vies & faicts,  
recueillie des bons auteurs

Lyon 1553

Passau, Staatliche Bibliothek -- S nv/Mam (b) 7-1/2  
urn:nbn:de:bvb:12-bsb11343205-0


1/2

Mam(b) 7 - 1/2









LA PREMIERE  
PARTIE DV PROMPTVAI-  
RE DES MEDALLES DES PLUS  
renommees personnes qui ont esté depuis le  
commencement du monde: avec brieue  
description de leurs vies & faitts,  
recueillie des bons  
auteurs.

IN  
VIR-  
TUTE,



ET  
FORTVNA.

A LYON CHEZ GVILLAV-  
ME ROVILLE.

1553.

*Avec Privilege du Roy, pour dix ans.*

EXTRACT DU PRIVILEGE.



PAR grace, & priuilege du Roy, est permis à Guillaume Rouille Libraire de Lyon, d'imprimer ou faire imprimer vne-fois, ou plusieurs, vn liure intitulé *Promptuarium Iconum, ac rerum memorabilium à principio mundi vsque ad hæc tempora.* tant en langue Latine, Françoisse, Italienne, que Espaignole: tant de fois & en tel nombre que bon luy semblera. Et est defendu de par ledit Seigneur, à tous libraires, imprimeurs, & personnes quelconques, de n'imprimer ne faire imprimer, vendre ne distribuer desditz liures, d'autres ny autre impression que ceux que aura fait imprimer ledit Rouille. Aussi de ne tailler, pourtraire, faire, ne contrefaire les medalles & effigies contenues & imprimees audits liures, & plus grand nombre, sans permission & congé dudit Rouille. Et ce iusques au temps & terme de dix ans entiers & consecutifs, à commencer du iour & datte que la premiere impression de chascun desdits liures sera paracheuee d'imprimer: ainsi que le tout est plus amplement contenu audit priuilege, sur ce donné à Saint Germain en Laye, & octroyé le xxvij. de Iuin, l'an de grace mil cinq cens cinquante & trois.

*Par le Roy, le Seigneur de Roissy, maistre des Requestes ordinaire de l'hostel present.*

Signé Mahieu:

*Et seellé du grand seel, en cire iaulne, à simple queue.*



A 180

A' TRESHAVLTE, ET TRES-  
illustre Princesse Madame Marguerite de Fran-  
ce, sœur vniue du Roy, Duchesse  
de Berry &c. **G. R.**



**L**A POESIE Mystique des Gentilz, par diuin hon-  
neur, & superstitieuse veneration, attribuoit à vn cha-  
cun de leurs Dieux, & Deesses vn sien propre, arbre, oy-  
seau, animal, & sacrifice priuè, & peculier: selon que ils  
l'estimoient leur estre plus conuenant, & plus agrea-  
bles. Sous tel mystere donnans à entendre, que bien sagement vient à regar-  
der quelles oblations doiuent faire les substances inferieures, aux puissan-  
ces superieures: & quels presens doiuent presenter les bas, & populaires,  
aux treshauts Seigneurs ou Dames, grands Princes, ou Princesses. Suyuant  
lequel exemple, les hommes apres venus, voulans honorer leurs Souuerains,  
& Souueraines (qui sont cōme Dieux, & Deesses mortelles) de quelque  
present honorable: en tesmoignage de reuerence, & signe de veneration  
enclinee enuers les Maiestez d'iceux donnees du ciel, & excedentes la  
commune condition des autres humains, considerent tresprudement à ce  
que le present d'ond' ils veulent faire offre, soit appartenant, propre, &  
agreable à la dignité Heroique diuinement constituee des hauts Princes,  
& Princesses ausquels ils se aduouent. Parquoy, ie ayant en vœu, de dedier  
à vostre tresillustre personne (Duchesse autant sublime en dignité de sang  
Royal, cōme hūble en benignité de sens virginal) aucune bōne part des œu-  
ures qui par mō entreprinse & sollicitude, sans espargne de mō peu de biè,  
par la diligēte recherche, & bon iugemēt des gēs sauans sont tirez des ob-  
scures tenebres d'ignorance & mys en clere lumiere de cognoissance: i'ay  
en premier lieu voulu aduiser quel œuure vous seroit le plus gracieux, &  
le mieux conuenāt à vostre tresnoble serenité. Sur quoy ayāt entēdu vostre  
diuin esprit, & la faueur de vostre autorité estre principalemēt, & tres-  
affectiōnemēt enclinee à la partie des bōnes lettres, & entre toutes auoir  
en singulier plaisir la diuersité Historiale digne de foy, & à soy cōcordāte:  
il m'a semblé biè cōuenable vous presenter ce presēt volume, inscript Prom-  
ptuaire des Medalles, lequel ayāt à mō aduen i a esté escript en lāgue Lati-  
ne & Toscane, pour le vous rendre plus acceptable, iceluy i'ay faicēt tra-  
duire en nostre nayue langue Frāçoise: non pour estimer les autres lāgues à  
vostre diuin esprit incōgneues: mais pour ceste cy vous estre plus familiere,



Et naturelle. Lequel œuvre, pour bien vous declarer que c'est : à la verité  
 (ma treshonoree Dame) c'est vne Hydre Lernee. fors que sans venin, tant  
 pour auoir non pas sept testes seulement: mais plus de 7. ou 800. toutes dif-  
 feretes de forme, Et de diuers sexes: tāt aussi pour la prudēce, Et vieilleſſe  
 serpētine qui est en ceste Hydre, se renouuellāt d'an en an, Et de siecle en  
 siecle: cōme aussi pour les grāds labours plus que Herculiās qu'elle m'a dō-  
 nē, auant que la pouuoir mettre à fin. ce que ie n'espere encore auoir faict:  
 Pource que de iour en iour renaissent nouuelles testes à celle Hydre. Entre  
 lesquelles testes en trouuerez (cōme es visiōs de Daniel, Et de l'Apocaly-  
 pse) plusieurs diademees, larees, Et corōnees: Et mesmemēt y reconnoi-  
 strez celles des Roys voz Peres, Ayeulz, Et Maieurs, avec la cōmemo-  
 ration de leur noblesse, Et vertu, encore viuement parlante. Finalement y  
 recōgnoistrez la vostre, Et l'image de vous, tresdigne d'estre posee, Et  
 escripte en plus hault lieu: voire iusque au ciel sideré, si la eleuer tant  
 hault, estoit aussi bien en mon sauoir, Et pouuoir, comme au vouloir, Et  
 deuoir. Cest œuvre donc' plaisant à veoir en ses figures, delectable à  
 lire, Et ouyr en ses escriptures, profitable en vertueux exemples, recreant  
 l'esperit par diuersité, Et verité historique, Et reduict en langage Fran-  
 çois, pour estre par l'autorité de la fille d'un Roy François, de nom Et Em-  
 pire, Et sœur d'un Roy de France, communiqué à tout le peuple François  
 amateur de la venerable antiquité: Je le vous offre treshumblement, Et  
 le presente à vostre tresinclite celsitude, comme dedication à vostre ver-  
 tueux, Et diuin esprit trespropre, Et conuenable, tant pour la sentence  
 Historiale, Et exemplaire de vertu, en laquelle vous delectez: que  
 pour la langue Françoisise en laquelle estes nee, Et nourrie: Et icelle ano-  
 blissez, Et l'enrichissez par entiere congnoissance des autres no-  
 bles langues, ars, Et sciences en icelles comprinses, oultre  
 Et sur lacostustumee nature du sexe d'ond estes nee,  
 esquelles vertus, intelligences, parfections d'e-  
 sperit, honneurs, Et sublimitiez, Dieu  
 vous maintienne, Et accroisce  
 iusque en fin de bea-  
 titude eter-  
 nelle.





**O** M M E iadis es grands Ieux du Romain Coli-  
sce, sous les ombrages des têtes roulantes, outre & sur  
tous les autres aornemens du spectacle, les faces dif-  
ferentes des diuers masques representās les personna-  
ges, apparoiſſoient estre les plus considerables, & plus attraioyent  
les yeux des regardans. Ainsi en ce bas monde terrestre, tresample  
Theatre estably sous la conuerture des cieux tournoyans, rien ne  
peut estre veu plus digne, ne de plus grande apparence, que la face  
humaine. En laquelle (mesmement par la confession des esprits inui-  
sibles) est signee la merueilleuse & venerable lumiere, & image de  
Dieu. Et aussi y reluisent les signes de toutes les vertus en si petit  
espace autant anguste, comme il est Auguste. De la haulteur, & de  
l'excellence duquel, ainsi a chanté Ouide en ses vers, translatez par  
Marot,

Comme ainsi soit que tout autre animal  
Iecte tousiours son regard principal  
Encontre bas: Dieu à l'homme a donné  
La face haulte, & luy a ordonné  
De regarder l'excellence des cieux  
Et d'eleuer aux estoilles ses yeux.

Parquoy les bons Anciens, ayans sollicitude de estendre par les sie-  
cles la gloire immortelle des nobles personnages, & d'eux mesmes:  
Aussi tresprudemment conseruās la memoire de l'antiquité, & pour-  
uoyans à l'enseignement de la posterité, ont non seulement depeinct  
par lettres, ou descriptiōs verbales, cōme par certains menus traictz  
les nayues formes des hommes, & femmes illustres: mais aussi ont  
mis ordre à icelles garder pour la posterité, en Statues, Tableaux,  
Signes, & Images, enleuez, engrauez, taillez, fonduz ou frappez: &  
principalement la tresbelle, & treshonneſte partie de l'homme: la-  
quelle partie Nature a voulu estre à plain regard tresapparente, &  
tousiours découuerte: c'est la face, laquelle ils ont marquee & signee

en petites rondelles metaliques, & especes de monnoie, d'or, d'argent, ou de cuyure. Et ce principallemēt pour deux raisons. Premiere-  
ment, pource que les pieces de monnoie sont à plus long temps dura-  
bles (à cause de leur solide substāce metalline, & aussi pour la curieu-  
se garde qu'on en faict es tresors cachez) que ne sont permanentes les  
lettres escriptes, ou imprimees d'ancre fluide, sur fraile papier. Secō-  
dement pource que (iouxte la sentence du Roy Candaules en Hero-  
dote) les yeux sont plus certains à l'homme que les oreilles: Car (com-  
me dit Horace)

La chose ouye, & mise par l'oreille,  
Plus laschement les esperits reueille  
Que chose aux yeux tressfideles presente,  
Que le voyant à soy mesme presente.

Or est il vray semblable que ces rondes especes ou de monnoie, ou de  
marque, & enseigne, à cause de leur matiere, ou de fonte, ou de frap-  
pe ou de taille qui est Metal sont appellees Metalles, & par adoucif-  
sement de lettre Medalles. Sinon par-aventure que quelcun trouuaist  
meilleur deduire l'appellatiō du verbe Grec Μ Ε Δ Ω qui signifie Im-  
perer, & les appeller Medalles, cōme Imperiales, pource que en icel-  
les les Empereurs sont pour la plus grand' part signez. Or est il ainsi  
que en ce temps curieux des choses anciennes, pour entretenir l'eter-  
nel honneur de la venerable antiquité, & la defendre de ruine, & de  
perdition: icelles Medalles ont esté par gens studieux diligemment  
cerchees: en partie recueillies des antiques monumēs, en partie tirees  
des entrailles de la terre, ou elles estoient cachees: en partie aussi  
trouuees par cas fortuit: tant bien au vis representantes les propres,  
& naturelles formes des nobles anciens personnages de l'un & de  
l'autre sexe: que en la face d'icelles, comme au clair miroir de l'ame  
on peut par raison Physiognomicque coniecturer qui, & quels ont  
esté, ceux qui y sont signez.

Car (comme il a esté dict par les Sages)

Des esperits sont monstres les visages.

En consideration desdictes choses, nous desirans faire plaisir aux  
amat

amateurs de l'antiquité, & à tous studieux, n'auons espargné labeur ne despense pour telles pieces recouurer de diuers païs, & grands Seigneurs, marquées en pieces d'or, d'argent, ou metal, ou entaillées en pierres precieuses, ainsi comme vn chacun grand personnage se est aduisé de conseruer son antiquité, & treschere memoire de soy & des siens. Ausquels grāds Seigneurs encores sont paruenues en main celles des autres grāds anciens, pour les auoir receuës des trouueurs poures gens foillans la terre, ou par argent, ou par force: ou bien que elles leur ont esté presentees en pur don, comme chose rare, & precieuse. Et depuis auons fait pourtraire icelles Metalles, ou Medalles sur le naturel, au plus pres de l'antique en la premiere piece, & puis consequemment les auons fait imprimer, ayans sousscript à chascune Medalle vn sommaire abregé des choses memorables, en bref recueilly de tous les bons Historiographes, & Chroniqueurs, par tout gardans l'ordre des temps, des aages, des Empires, & des Royaumes succedens, ou concurrens l'vn à l'autre. L'œuure total, pour la recherche des choses memorables & des personnes, y estre tresfacile, & tresprompte: Promptuaire nous à semblé bon de le intituler. Auquel Promptuaire nous mettons en auant aux yeux les yeux: & aux faces les faces des hommes, & femmes qui depuis le commencement du monde ont esté dignes de memoire. Lequel œuure certes cōme il a esté d'vn labeur presque incroyable: ainsi esperons nous bien qu'il sera de fruiet incomparable. Car les spectateurs de ce Theatre nō seulement delecteront leurs yeux, & ne les paistront de vaine peinture: mais aussi rassasieront leurs esprits de la cognoissance tresdigne des choses, & personnes, tellement que comme par vn miroir verront en presente cōtemplation ceux qui des long temps ne sont plus en vie, estants par cest œuure rappellez des basses tenebres, en nouvelle lumiere. Ils les regarderont presens par effigie, les entendront parlans par l'escripture, contempleront leurs hauts faitz par l'histoire, & rameneront les temps passez de toute memoire d'hōme, iusque à leur siecle present. Finalement en toutes pars pourront elire exemple de telle forme de vie qu'il leur plaira. Et en remembrant les choses icy

leuës, obtiëndront cela que ilssemblerõt auoir esté, auãt qu'ils fussent  
mesmes, viuans avec ceux qui plus ne sont. Au reste affin que nul par  
la loy Cornelianne ne nous accuse de faulseté, en ce que nous auons en-  
tre meslé, & dispersé en public aucunes Medalles cõtrouuees, & fin-  
ctes, cõme entremeslans pieces de faulse monnoie parmy les especes  
de la bonne: Pardon soit concede à la confession. Car nous ne denyons  
que des premiers & tres anciens hõmes cõme de Adam, de Abraham,  
& des Patriarches, ne ayent esté en default de premier Patron, par  
nous controuuees phantastiquemët, selon leur description historialle.  
Car pourquoy ne nous sera cela aussi bien permis comme à Phidias,  
souuerain Statuaire, qui sur aucuns vers de Homere, deuina la forme  
de Iupiter inuisible, & en fabriqua celuy tãt renommé Olympicque?  
Que à Zeusis tres excellent peinctre? Qui de cent pucelles eleuës en  
la ville de Gergente, apprint par cogitation la forme de la tres belle  
Deesse? & icelle au vif representa: Pourquoy moins nous sera il loy-  
sible, que à Pollion Asin, qui le premier de tous les Romains osa fein-  
dre les visages, & figures des principaux auteurs de sa tresriche li-  
brairie? Pourquoy moins que à celuy qui coniectura quelle estoit la  
face de Homere, par la Poesie, & l'esperit de luy apparent en ses  
vers? & en fait image vray semblable: Et pource nous auons cõfiance  
que cela nous sera moins tourné à blasme. Car (comme à ce propos  
escrit Pline) Les choses qui ne sont, on les contrefaict: & les  
visages non veuz, engendrēt desir de les veoir. Et n'est plus  
grãde apparence de felicité, sinon en cela, que tous desirent  
fauoir quel a esté vn chascun. Vela que dict Pline. Nous donc en-  
suyuans tels exemples, & sans exemple de Patron ayans suiuy seule-  
ment le regard de l'histoire, & la phantasie, auons imaginé avec le  
conseil & aduis des plus doctes noz amis, les figures, & faces, nõ ia-  
mais par auãt veues en effigie des premiers hõmes, & aussi d'aucuns  
autres au milieu des temps. Desquelles les pourtraictures ne furent  
par cy deuant oncques faictes, & ce auons nous faict, affin que nostre  
histoire des Medalles tant peincte, cõme escripte, & tãt en figure cõ-  
me en lettre, ayt certain et semblable principe en l'vne & l'autre par-  
tie

tie. Encores depuis est aduenu que nous auons recourré de diuers Sei-  
 gneurs cinq ou six Medalles toutes antiques, & non supposees d'un  
 mesme Emp. ou d'un mesme Roy, ou d'autre personnage illustre, les-  
 quelles neantmoins quelquefois se trouuoient dissemblables, ou pour l'a-  
 ge diuers des personnes, ou par les diuers pais, ou elles estoient mar-  
 quees: ou par quelque autre accidēt. & entre icelles auons eleués les  
 plus vrayes, ou vray-semblables. Parquoy si aucun en ce Pröptuaire  
 treuve quelque Medalle differēte de celles qu'il pourroit auoir: sache  
 que ne la siēne, ne la nostre n'est pas seule au mode: & que semblable-  
 mēt nous pourriōs (voire & avec meilleure raison) arguer les siennes  
 de faulseté, quād vouldriōs estre que releux. Car qui aux siecles aue-  
 nir verra les especes de mōnoie d'argēt, ou d'or marquees de la teste,  
 & face, ou de Charles le 5. Emp. ou du treschrestien Roy de France  
 Hēri secōd, ou de Sultā Solymā grand Turc: & icelles neantmoins  
 toutes diuerses & differētes, tāt d'aage, que de forme: & d'habits: les  
 vnes icunes, les autres vieilles, les vnes sans barbe, les autres barbues,  
 les vnes à chef nud, les autres couuertes d'un bōnet, turbā, ou armet,  
 corōne, ou diademe: comme des à present on les voit estre. Si par celle  
 dissimilitude il les estimoit faulses: certainement luy mesme en seroit  
 faulx iuge: attendu les diuersitez sus alleguees des aages, habits, for-  
 mes, & pais: mesmemēt que la lettre à l'entour escripte le cōdāneroit:  
 & pource ne prēne nul occasion de calōnie sur telles diuersitez. Fina-  
 lemēt (hōnestē Lecteur) tu as icy cōme un tresor des plus riches pie-  
 ces du mode: & exēples de vertu, de gloire, d'hōneur, & d'immorta-  
 lité, & icy tu peux veoir cōme les chefz du mode, & leurs faces quasi  
 spirātes, & parlātes, mesmemēt des persōnages qui ont esté tresex-  
 cellēs, tresgandz & premiers en tous peuples, & natiōs, qui par bon  
 esprit, vertu, & excellence de nobles gestes se sont acquis honneur  
 immortel. Parquoy à l'imitation de leurs exemples tu puys faire en  
 telle sorte que par les louanges de tes vertus, tu merites que l'Image  
 & Medalle de toy puisse obtenir lieu entre les autres, en l'accroisse-  
 mēt, & succedētes Impressions de ce liure: qui ne peut auoir fin, tant  
 que les vertueux hōmes lairrōt memoire d'eux en faict, ou en escript.

LES NOMS DES AUTEURS,  
 & liures que nous auons alleguez en ce Prom-  
 ptuaire des Medales.

L A Bible	Eutrope	Solin
L Iosephe	Tertullian	Hermannus Cóntractus
Berose	Cassiodore	Sabelic
Homere	Suetone	Platine
Thucidides	Orose	Textor
Metasthenes	Florus	Boccace
Vergile	Pline	Volaterran
Xenophon	S. Augustin	P. Emil.
Ouide	S. Ierosme	Matth. Palmer.
Diogenes Laërtius	Eusebe	Ab. Vísperg.
Diodore Sicilien	L'histoire Eccles.	Paralipomena re. mem.
Herodote	L'histoire Tripart.	Chro. Carionis
Tite Liue	L'histoire Scholast.	Ioan. Nauclerus
Denis de Halicarnas	Prosper	Chro. Functij
Procopius	Fulgence	Supplem. Chro.
Cornelius Tacitus	Isidore	Budæus de Affe
Strabo	Lactance	Gaguin
Iuuenal	Le catalogue des Saints	La Chro. de Phry.
Dares de Phrygie	Spartian	Le grand Elucidaire
Diétis de Crete	Lampridius	Les Annales d'Aqui- taine.
Egesippus	Herodian	Les Illustrations de Gaule.
Valere le grand	Pomponius Letus	La Chron. des Chroni- ques
Iornandes	Dion Cassius	La Chro. des Roys de France
Machrobe	Iules Capitolin	La Cosmog. de Munst.
Appian Alexan.	Volcatius	Pau. Iouius
Plutarque	Fla. Vopiscus	Richerius des Turcs.
Iustin	Aurel. Victor	
Herodian	Bap. Egnace	
Aule Gelle	Am. Marcellin.	
Cicero	Claudian	
Horace	Celius Rhodigin	
Lucan	Blondus	

FIN.

A M Y Lecteur, quiconque traite les histoires, doit auant toutes choses auoir esgart au cōpte du tēps des hōmes, & de leurs faits: & pourtāt nous auons en ce vsé de toute diligence. Or pource que quāt aux aages se sont trouuees grandes differences & diuersitez es Auteurs, nous nous sommes resoluus à Phrygion, comme au chroniqueur plus certain & plus ample. Et quant aux temps modernes semblablement y a difference, comme pourras voir aux Ducs de Milan, dont nous auous mis le compte des ans selon les auteurs, affin de n'estre veuz temeraires: toutesfois pour vous montrer nostre diligence, auons fait vn brief recueil de l'ordre de leurs temps, tel que sensuit, S. Antonin Archeuesque de Florence, & le Supplement des Chroniques, & Iouius, tous trois s'accordent que le premier Duc qu'est Iean Galeas, mourut l'an 1402. mais quant à son regne, & comencemēt d'iceluy, tous sont discordās. Iouius ne dit l'an de son commencement: S. Antonin met qu'il commēça estre Duc l'an 1385. le Supplement 1382. & quant au temps qu'il a esté Duc, Iouius luy donne 24. ans. le Supplement 37. & S. Antonin n'en fait mention. Dont nous concluons par certaine raison, nous assurens sus Iouius, auteur bien approuué, que ledit premier Duc de Milan commença l'an 1378. Iean Maria Viconte, & second Duc succedant à son pere audit Duché, auquel il fut dix ans, mourut, à ce compte l'an 1412. Philippe Maria tiers Duc, entra au gouvernement, à cause qu'il y eut vaccāce, l'an 1413. & y demoura 33. ans: ainsi mourut 1446. à quoy s'accorde l'Archeuesque Antonin, qui estoit de son temps. François Sforce quatrieme Duc, ne paruint de trois ans apres audit Duché, pour cause du tumulte, & rebellion du peuple: & par force d'armes entra en iceluy, l'an 1449. selon l'Archeuesque Antonin: & fut Duc par 16. ans. ainsi mourut l'an 1465. & le Supplement dit qu'il mourut 1466. Galeas Maria cinquieme Duc, entra l'an 1466. & y demoura 10. ans. ainsi il mourut l'an 1476. Iean Maria Sforce fixieme Duc, print possession apres le trespas de son pere, l'an 1477. & fut Duc sous la charge de son oncle Louis Sforce, dit le More, iusques à l'an 1494. si qu'il fut Duc 18. ans & six mois. Louis Sforce susdit succeda incontinent à son nepueu en l'an 1494. & y demoura cinq ans six mois: & fut prins, & mené prisonier en France l'an 1500. Aussi faut entendre que peu d'historiens ou Chroniqueurs ont compté les mois & iours, qui eniambent & entreprenent sus les années: ce qui les à fait par trait de temps discordans quelques fois d'un an ou deux. Pareillement en la fin des descriptions de vie des personages, trouueras par fois vn seul auteur allegué, & par fois deux, bien qu'il y en ait quatre ou cinq qui en ayent escrit, & desquels nous auons recueilli le sommaire: par quoy si ne trouues le tout que nous disons, en vn ou deux, estime qu'il est aux autres, qui ont esté d'un mesme temps, ou traité de mesme affaires. Et mesme faut entendre que souuēt les auteurs sont contraires, mais que les auons accordez & d'iceux tiré

le



le meilleur, au mieux qui nous a esté possible, & les choses veritables, ou plus vraysemblables. Aussi ne faut ignorer que plusieurs liures en diuers temps & lieux imprimez, sont par fois diuisez diuerfement par chapitres: & que nous auons prins des plus nouueaux & plus corrects, noz allegations des chapitres. Aussi tu ne trouueras estrange que si quelquefois trouues les anneés & Medalles de quelque peu de temps les vnes deuant les autres: ce que nous auõs esté contraints à faire, pource qui nous a semblé plus plaifant de les accompagner ainsi deux à deux, ayant prins garde d'accóplir les personnes plus consonantes & plus prochaines de temps les vnes aux autres.

*Les erreurs suruenues en imprimant.*

En la page 79. de la premiere partie, ligne 8. la ville de Nabat, lisez la ville de Therfa. En la seconde partie, page 87. la medalle de Theodose a esté transposée pour celle de Iouian, & à la page 91. celle dudit Iouian a esté transposée pour celle de Theodose.



L'ESCRITVRE Sainte nous declare, qu'au cōmencement Dieu crea le ciel & la terre : & que le sixieme iour, il forma l'homme(c'est à sçauoir Adam & Eue) à son image & semblance:& les colloqua en Paradis terrestre, leur deffendant, sur peine de mort, qu'ils n'eussent à gouster du fruiçt de vie:mais incontinēt ils transgresserent ce saint commandement, par la deception de Satan:& pource furent mis en la subiection de peché & de mort. A ceste cause le Seigneur Dieu les dechassa, & les meit en la terre de malediçtion, à fin qu'en sueur & peine ils vfasent leur vie. Or quand Adam se veit ainsi deieçté, il commença à labourer la terre, avec grand trauail. Apres il congnut sa femme Eue:laquelle luy enfanta Cain:& derechef elle enfāta Abel: qui fut occis par son frere Cain, par vne meschante enuie, qu'il auoit conceue contre luy. Voyez Gen.cha.1.2.3.& 4.

A D A M estant en l'aage de 130.ans, engēdra vn fils: lequel il nomma Seth:duquel sont descendus les Saints-peres. Seth, aagé de 105. ans, engendra Enos:lequel commença à inuoyer le nom de Dieu. Enos estant en aage de 90.ans, engendra Cainam. Cainam en l'aage, de 70.ans, engendra Malaleel. Malaleel en l'aage de 65.ans engendra Jared. Jared estant aagé de 162. engendra Henoch. Henoch en l'aage de 65. engēdra Mathusalam. Or Henoch, en l'aage de 365.ans, fut transporté de Dieu. Mathusalam, aagé de 187. engendra Lamech. Lamech, en l'aage de 182. engendra Noe. Noe estant aagé de 500. engendra Sem, Cham & Iaphet 100.ans deuant le deluge. Voyez le 5.cha.de Gen. Noe auoit 600.ans, lors que le Deluge fut faiçt. Voyez Gene.7.chap. Adam mourut aagé de 930. ans.



**N O E**, fils de Lamech, a obtenu grace enuers Dieu, qui l'a reputè estre homme iuste & parfaict. En son temps estoient au monde aucuns Geans, qui faisoient beaucoup d'outrages à toutes nations du monde. Alors Dieu, voyant les grans maux qui regnoyēt en la terre, delibera en soy mesme, de destruire toutes creatures viuentes, fors Noe & sa famille: si luy feit commandement de faire vne Arche, laquelle il acheua en 100. ans. Apres Dieu luy commanda d'entrer dedans, avec sa famille, & qu'aussi il y feist entrer avec luy, de chacune espee de beste le masle & la femelle. Quand donques tout fut entré dedans, il survint vne tant grande inondation d'eauē sus la terre par 40. iours & 40. nuits, qu'elle surmonta les plus hautes mōtaignes de 15. coudees: & lors furent toutes creatures, tant raisonnables qu'irraisonnables, suffoquees & noyees, excepté Noe & sa famille, & les pairs des bestes qu'il auoit mis dedans l'Arche: ce fut en l'an du monde 1656. auant la nati. de Iesus, 2306. Mais apres que les eues se furent tenues 150. iours sur la terre, alors Dieu misericordieux, eut memoire de Noe, & feit diminuer les eues: & l'Arche demeura sus les mōtaignes d'Armenie. Or Noe, estāt sorti avec sa famille, sacrifia, rēdāt graces à Dieu: lequel luy mōstra l'arc celeste, en signe d'assurance perpetuelle, pour toute ame vivante, qu'il n'y auroit plus de deluge d'eau vniuersellement sur la terre. Voyez Gen. cha. 7. 8. & 9.

**S E M**, fils de Noe, engendra cinq enfans, dont le premier fut Aelam: duquel descendirent les Aelamites, qui furent principaux d'entre les Perſes. Le secōd estoit Assur: duquel vindrēt les Assyriēs. Le tiers, qu'il engēdra en l'aage de 102. ans, apres le deluge, fut Arphaxad: duquel sortirēt les Arphaxades, depuis nōmez Chaldees. Le quart fut Lud: duquel furēt nōmez les Lydiēs: le 5. fut Arā: qui dōna nō aux Aramenes, que les Grecs appelerēt Syriēs. Voyez en Gen. c. 10. & 11. & le 1. li. de Par. c. 1. & Iose. li. 1.



**CHAM** fils de Noe, receut malediction de son pere, à cause qu'apres que ledict Noé eut plâté la vigne, & beu de son vin, qui l'enyura, tant qu'il s'endormit, estant descouvert par les parties honteuses, ce mauuais fils s'en mocqua. Cestuy Cham engendra quatre enfans. Le premier auoit nom Chus: duquel sont descendus les Ethiopiens, qui se nommoyent Chuseens. Le second fut Mesraim: duquel veindrent les Mesreens, autrement nommez Egyptiens, comme Mesrin en Hebreu signifie Egypte. Le tiers est Phut: duquel sont venus les Libyens, lesquels de son nom il nōma Phutes. Le quart est Chanaan: duquel sont sortis les Chanaanens: & leur region a depuis esté appelée Iudee. Voyez le li. de Genese, chap. 9. & 10. & Iosephe li. 1. chap. 12.

**IAPHET**, fils de Noe, receut la benediction de son pere, avec son frere Sem: à raison qu'ils couurirent les parties honteuses de leur pere, quand il estoit yure. Or cestuy Iaphet engendra sept enfans: desquels descendirent plusieurs grandes lignees. Le premier auoit nom Gomer: duquel sont issus les Gomerites: qui depuis ont esté nommez Galates, par les Grecs. Le second estoit Magog: duquel prindrent origine & commencerent les Magogues, que les Grecs ont nommez Scythes. Le tiers estoit Madai: duquel veindrent les Medes. Le quart auoit nom Iauan: duquel sont issus les Ioniens en Grece. Le cinquieme fut Tubal: qui peupla les regions qui se nommoyent iadis Iberies, mais maintenãt sont les Espaignes. Le sixieme eut nom Mosoch: duquel ilsirent les Moschins, parapres nommez Cappadoces. Le septieme fut Thiras: qui appella ceux de sa race Tirennes, desquels les Grecs feirent le nom des Thraces. Voyez le liure de Genese, chap. 10. & Iosephe liure premier des Antiquitez chap. 11.



ARPHAXAD fils de Sem, fut né deux ans apres le De-  
luge, c'est a sauoir en l'an du monde 1658. auant la nati. de Iesus,  
2304. ans. & en l'aage de 35. ans engendra Sale: depuis il ves-  
quit encores 303. ans { la vieille edition dit 403. } durant lequel  
temps il engēdra fils & filles. D'iceluy Arphaxad est descendue,  
comme nous auons dit, la nation des Chaldeens, dont la region  
est appellee Chaldee: laquelle est situee aux parties de l'Asie, & se  
confine à l'Arabie: c'est vne contree de païs plat, qui a beaucoup  
de faulte d'eau & en icelle la grande ville de Babylone fut an-  
ciennement fondee, & batie. Voyez Gen. cha. 10. & 11. le Supple.  
des Chro. li. 2. Or Arphaxad nomma les Chaldeens, Arphaxa-  
deens, de son nom, pource qu'il estoit leur Seigneur: comme Io-  
sephe le recite en son liure des Antiquitez premier, au cha. 14. &  
S. August. li. 16. de la cité de Dieu, chap. 10. suyuant l'opinion des  
70. Interpretes, dit que Arphaxad engendra Cainan.

SALÉ fils d'Arphaxad susdit, ayant vescu 30. ans, engen-  
dra Heber: & puis apres il vesquit encores 403. ans, durāt lequel  
temps il engendra fils & filles. Voyez Gen. cha. 11. D'iceluy Sale  
sont issus les Sarmates, & d'iceux furent nommees les regions  
de Sarmatie, qui sont deux, l'vne est en Europe, & l'autre, que  
nous appelons Tartarie, est en Asie la maieur: qui est celle Sarma-  
tie qui a prins son nom de Sale. Lon estime icelle region, de la  
partie deuers Septentrion, comme deserte, & incongne, en la-  
quelle nonobstant ont esté autresfois trois bonnes villes, Her-  
monasa, Enantia, & Tyramba. Là est le mont Caucas: & y en a  
qui se sont abusez en estimant qu'audit mont sont les portes que  
lon appelle Caspies. Voyez Ptolemee li. 3. & 5. & le Supple. liu. 1.



HEBER, fils de Salé, estant paruenue en l'aage de trente quatre ans, engendra Phaleg, en l'an du monde 1758. Auant la natiuité de Iesus Christ 2204. & vesquit encores par l'espace de quatre cens & trente ans, engendrant fils & filles: puis mourut aagé de quatre cens soixante quatre ans. D'iceluy sont descendus les Iuifs: & pource, on les appelle Hebreux: & ausi, quand les langues furent diuisees, la langue Hebraique demoura en sa maison seule. En ce temps là, icelle langue Hebraique auoit nom humaine: à cause que tous les humains parloyent par icelle. Or iceluy Heber eut vn autre fils, lequel il nomma Ictan: duquel Moysse fait mention, & iceluy engendra plusieurs filz, c'est à sçauoir Elmodad, Saleph, Afarmoth, Iaré, Adoram, Vzar, Decla, Hebal, Abimaël, Saba, Ophir, Heuila, & Iobab. L'habitation d'iceux estoit depuis Messa iusques à vne montaigne Orientale, nommee Sephar: & ainsi estoient de la famille du bon homme Noé, selon leurs peuples & nations. Ceste prouince de Messa est situee en Iudee, ainsi que racompte saint Ierosme. Voyez Genese 10. & 11. chapitre. Iosephe liu. 1. chap. 14.

PHALEG, fils de Heber, en l'aage de trente ans engendra Reu, qui estoit en l'an de la creation du monde 1788. & auant la naissance de Iesus Christ 2174. & apres il vesquit encores deux cens trente neuf ans, engendrant autres fils & filles. Ice- luy est interpreté diuision: & ausi en son temps la terre fut diuisee. De ce temps là, le Royaume des Scythes print son cōmencemēt sous le Roy Tanais: lequel Royaume est situé en la partie Septentrionale. Voyez comme dessus: & saint Augustin en la cité de Dieu, & la chron. de Paul Constantin Phrygion.



NEMROD Saturnus, fils de Chus, qui fut fils de Chã, fils de Noé, commença à estre puissant sur la terre: & fut le cōmencement de son regne Babylon, Arach, Achad, & Chalanné, en la terre de Sennaar: qui fut en l'an du monde 1788. & auant la natiuité de Iesus Christ 2174. & de son temps fut la confusion des langues, en l'edification de la tour de Babel, cōme dit Iosephe, alleguant tels mots de la Sibylle: *Pendant que les hommes auoyent vn seul langage pour tous, aucuns d'eux edifierent vne tour fort haute, comme pour monter au Ciel par icelle: mais les Dieux, enuoyans des vents alencontre, renuerserēt la tour: & donnerent langage propre à chacun de ces hommes: & pourtant auint que la ville fut nommee Babylon: qui est à dire confusion.* Voyez Gene. 10. & 11. Iosephe 9. & 12. chap. du premier liu. & Berose 4. & 5. liu. & Paul Constan. Phry. & la Chronologie de Funccius.

BELVS Iuppiter, apres que son Pere Nemrod eut regné cinquante six ans, regna soixante deux ans. Iceluy eleua les fondemens ia desseignez pour Babylone, pour lors plustost villette que ville. Il vescu en paix iusques enuiron la fin de son regne.

En ce temps là Comerus Gallus enseigna ses Italiens à bastir ville par charios, à la maniere de Scythie, d'ou il venoit. Voyez Berose liure 5. & pour tous ces premiers Roys de Babylone & d'Assyrie, Iustin liure 1. & Diod. Si. li. 3. & Annius de Viterbe.



RE V, ou Rhagau, fils de Phaleg, en l'an trente deux de son aage, engēdra Sarug qui estoit l'an du monde 1820. & auāt la naissance de Iesus Christ 2142. & apres vesquit encores deux cens sept ans, & engendra d'autres enfans, fils & filles. Il edifia plusieurs temples: & aucuns Princes de son temps furēt adorez de leurs subiects. Pareillement quatre Royaumes prindrēt leur commencement: dont le premier fut le Royaume des Scythiēs: dont nous auons faict mention au parauant: & leur Roy auoit nom Tanaïs: duquel a prins son nom le fleue Tanaïs. Le second fut le Royaume des Amazones: lesquelles estans descendues des Scythiens, habiterent premierement aupres du fleue Tanaïs: & depuis, pres du fleue Termodoō, qui pourtāt a esté appellé Amazonius. Le tiers fut le Royaume d'Égypte: auquel regna premierement Sores, ou (comme disent aucūs) Vexores. Le quart fut le Royaume des Boemiens: lesquels auoyent vn Prince nommé Boemus. Touchant Reu, voyez Gene. II. chapi. Touchant les Royaumes, voyez Iustin, Eusebe, & les Chroniques des Boemiens, & la chro. de P. Con. Phry.

SARVG, fils de Reu, estoit aagé de trente ans, quand il engendra Nachor: qui fut en l'an du mōde 1850. & auant la natiui. de Iesus Christ 2113. apres la naissance duquel il vesquit encores deux cens ans, engendrant fils & filles. L'an vingtcinquieme de son aage print commencement le Royaume des Assyriens: qui estoit plus grād que tous les autres Royaumes: & dura (comme saint Augustin le racompte au second chapi. du liure 18. de la Cité de Dieu) par l'espace de treize cens deux ans. Apres que Sarug fut parueni en l'aage de deux cens trente ans, il mourut. Voyez Gene. II. chap.






NINVS, fils de Belus, fut tiers Roy des Babylonien en l'an du monde 1906. & auant la natiuité de Iesus Christ 2056. Il regna cinquante deux ans, faisant aspres guerres à ses voisins: à cause de la grand' cupidité qu'il auoit de regner sus les autres. En memoire de son pere Belus, fait faire vne Idole à la semblance d'iceluy son Pere, portant grande reuerence à ceste Idole. Apres il fait faire publication que tous malfaiçteurs qui se voudroyent humilier par deuant elle, obtiendroyét pardon de luy, pour tous & chacuns leurs crimes. Et, à son exemple, ayans plusieurs autres fait semblablement des Idoles, rememorās les personnes de leurs Peres, les malins espritz commencerent d'abuser les ignorans, en leur rendant responses par ces Idoles: & de là veindrent les noms de Bel, Baal, Bel-phegor, & Belzebub, noms d'Idoles. Voyez Daniel & saint Ierosme, tome 6. sus Hosee chap. 2. Beroſe & la chroni. de Paul Constant. Phrygion.

ZOROASTES, selon l'estime d'aucū, estoit second fils de Noé, nommé Cham. Iceluy fut le premier Roy des Baçtriās, homme certes fort ingenieux: car il fut le premier inuenteur de l'art Magique. Il trouua les sept Arts liberaux, & enseigna le cours du Ciel & des Estoilles. Aucuns Historiographes disent que quand il nasquit, commença à rire: ce qui n'estoit point bon signe, selon l'opinion d'aucū: à cause que la nature des naiffans est de pleurer: & aussi il fut vaincu en bataille par Ninus. Or cestuy Ninus fut aussi frappé d'une flèche, duquel coup il mourut, laissant son fils Ninias heritier. Iceluy Ninus edifia la ville de Niniue: qui auoit trois iournees de circuit: laquelle, apres, fut ruinee par Cyrus Roy d'Assyrie. Voyez saint Augustin, Euse. & Plin liu. 30. chap. 7.



T V Y S C O N, surnommé Ascenas par le Prophete Moyses, fut fils de Gomer, qui estoit le premier né de Iaphet, fils de Noé. D'iceluy Gomer sont issus les Cimbriens: Lesquelz se partirent d'Italie, pour aller habiter dedans Alemaigne, aux lieux Septentrionaux, tirans vers le país, qui maintenant est nommé Dannemarch, aupres de ceux que lon dit Norduegiens, & Gothiens. Ceux des Sarmates, qui habitent pres du Royaume de Poloigne, & que nous mettons maintenant entre les Alemans, descendirent de Tuyscon: qui leur enseigna les lettres, & leur establifit & ordonna des loix & ordonnances: & à luy commença le Royaume d'Alemaigne en l'an du monde 1909. Avant la naissance de Iesus Christ 2053. Apres qu'il eut regné par l'espace de cent cinquante ans, il fut nombré entre les Dieux. Voyez Berose.

S A M O T E S, surnommé Dis, fut environ ledict temps le premier Roy des Gaules, ainsi que recite Berose, au cinquieme de ses antiquitez: ce que Iules Cesar conferme au sixiesme liure de ses commentaires, quand il dit ainsi: *Galli se omnes à Dite patre prognatos predicant.* (Tous les Gaulois se vantent d'estre descendus de Dis.) Or c'estoit vn Prince fort excellent en science & prudence: & pourtant il eut nom Samotes: & aussi les Gaules on esté appelees Samotees: à cause qu'elles furent reduictes en Royaume par iceluy, comme tesmoigne Diogenes Laërtius, en son liure de la vie des Philosophes.





**NACHOR**, fils de Sarug, estant aagé de vingtneuf ans, engendra Tharé, en l'an de la creation du monde 1879. qui est deuât la Natiuité de Iesus Christ 2083. Puis viuant encor cent dixneuf ans, engendra plusieurs autres enfans, filz & filles:& apres auoir esté en ce monde cent quarante huit ans en tout, il finit ses iours. Voyez Gene. vnzieme chap. De ce temps commença le Royaume des Assyriens, ainsi que nous auons par cy deuant touché comme en passant:& auoyent Belus pour leur Roy:& pareillement commença le Royaume des Sicyoniens, desquelz Aegialeus auoit la domination.

**THARE**, fils de Nachor, vesquit septante ans: puis engendra Abram: qui fut apres appelé Abraham: qui fut en l'an de la creation du monde 1949. & auant la natiuité de Iesus Christ 2013. Il engendra pareillement Nachor, & Aran, & apres auoir vescu encor cent trente cinq ans, deceda de ce monde, ayât deux cens cinq ans. Abraham engendra Ismaël, & Isaac. Nachor engendra huit enfans de Melcha. Le premier estoit Hus, qui fut Pere de Iob. Le second Buz. Le tiers Camuel, Pere des Syriens. Le quatrieme Cased. Le cinquieme Asau. Le sixieme Pheldas. Le septieme Iëdlaph. Et le huitieme Bathuel, lequel engendra Rebecca. Iceluy Tharé, tant à cause qu'il ne s'aymoit point en la terre des Chaldeens (à raison de leur idolatrie: laquelle estoit alors en grand bruiet, lors que principalement les Chaldeens adoroyent le feu) que pour la mort de son filz Aran, laissa le país, & vint en la terre de Mesopotamie, en la ville de Charan, là ou il mourut. Voyez Gene. vnzieme & vingtdeuxieme chapi. & Isidore.



I A N V S, venant des parties d'Espaigne en Italie, & voyant que Camasenuus y gастоit toute la ieunesse, l'endura par trois ans: puis, luy assignant quelques Colonies, le fait sortir hors d'Italie: de laquelle il donna certaine portion à vne sienne fille, nommee Helerne: & apres eleut, pour son siege perpetuel, la ville de Ianiculum, par luy fondee parauant: qui fut en l'an du monde 1948. & auant la natiuite de Iesus Christ 2014. Il enseigna aussi à ses Ianigenes, surnommez Razenues, la Physique, l'Astronomie, les Deuinemens, & autres choses à garder & obseruer: & pour ceste cause ses gens luy porterent reuerence diuine, sous telz noms qu'en Armenie la Sague. Voyez Berose en son cinquieme liure des Antiquitez.

V E S T A, femme de Ianus, institua en vn temple six vierges, que lon nommoit Vestales, ayans, entre autres ceremonies, charge d'y entretenir perpetuellement du feu: & les y rendoit lon depuis six iusques à dix ans, pour y demourer trente ans: & lors se pouuoient marier, si bon leur sembloit: mais, si parauant aucune d'elles se trouuoit corrompue là dedans, elle estoit enterree toute viue. Voyez saint Augustin en la Cité de Dieu. liu. quatrieme, chapitre dixieme. Titeliue au premier liure. Saluste & Ouide. Ceste institution & ordonnance fut faict par ladicte Vesta en l'an de la creation mille neuf cens soixante trois, & auant la natiuite de Iesus Christ mille neuf cens nonante neuf.



DENIS, fils de Hammon, ayant pris les armes, dechacea Camasenuus & Rhea sa femme, hors du Royaume d'iceluy Hammon, son Pere: mais il retint leur fils, nommé Osiris, avec luy, & l'adopta pour sien, luy imposant vn autre nom, à sçauoir Hammon Iuppiter, luy donnant tout le Royaume d'Egypte. Voyez Berosé en son liure cinquieme. Ce fut fait en l'an du monde 1948. Auant la natiuité de Iesus Christ 2014. de ce temps Barsanes fut vaincu par Ninus.

PALLADON vierge (laquelle est nommée par les Grecs Minerue) en sa premiere enfance fut delaissee seule, aupres du lac Triton: & lors Denis Iuppiter susdict l'adopta pour sa fille, du temps des dates precedentes. Icelle enseigna toutes sortes de guerres aux Libyens, selon Berosé, elle fut aussi (suyuant quelques autres qui la nomment Pallas) la premiere qui trouua l'art de faire l'huile, & quand & quand de le mettre en effect. Elle trouua la maniere de nombrer, & de faire armures de fer. Pareillement (selon l'opinion de plusieurs) elle trouua l'invention & l'usage d'accoustrer la laine, cōme de la peigner avec les peignes de fer: & puis apres de la filer à la quenaille, & de la tistre: tellement que les Cardeurs de laine, les Foulons, les Tisserans & Teinturiers, & principalement les pucelles, commencerent à luy faire honneur, reuerence, & ser- uice, comme à vne Deesse.



OSIRIS, fils de Camafenuus, & de Rhea, & Roy des Aegyptiens, regna trente cinq ans. Éstant en Aegypte, enseigna à ceux du pais, plusieurs sortes d'Arts. En premier lieu il trouua l'inuention de labourer la terre avec la charrue, & toutes les choses appartenantes à l'Agriculture: & puis, peu à peu, s'en alla parmi le monde enseignant à vn chacun ce qu'il auoit inuenté: & par ce moyen il eut domination par tout, excepté en Babylo- ne. Voyez Berose, Diodore Sicilien, & Ouide en sa Metamor- phose.

ISIS, Iuno Egyptienne, fille de Camafenuus, & de Rhea sœur & femme d'Osiris, acquit iadis grand renom enuers les Egyptiens: ainsi qu'il se peut veoir pour lors en son Epitaphe: duquel l'escriture parle ainsi, estant inscript en vne coulomne:

*Ie suis Isis Royne d'Egypte, enseignee par Mercure.*

*Nul ne rompra les choses que i'ay establies par loix.*

*Ie suis femme d'Osiris.*

*Ie suis la premiere inuenteresse des fruiçts.*

*Ie suis mere du Roy Orus.*

*Ie suis resplendissante en l'Astre du Chien.*

*Pour moy a esté bastie la ville de Bubastie.*

*Resiouy toy, resiouy toy, Egypte, qui m'as nourrie.*

Qui fera curieux d'en sauoir d'auantage, pourra auoir re- cours à Diodore Sicilien: lequel en rapporte merueilles, au pre- mier & au second liure. Icelle Isis fut nee en l'an du monde mil- le neuf cens cinquante huit, qui estoit auant la natiuité de Je- sus Christ deux mille & quatre. Voyez la Chroni. & supputa- tion de Paul Constant. Phrygion: & la Chronologie de Func- ius: lesquels nous auons suyui par tout ce present recueil.



SEMIRAMIS, apres la mort de son mari, fut Royne d'Assyrie & d'Asie, pour vne grande partie: en l'an du monde 1958. Auant la natiuité de Iesus Christ 2004. Elle auoit vne tant grande enuie de regner qu'elle alloit en habit d'homme, à fin qu'on pensast qu'elle fust fils du Roy Ninus trespasé, & d'elle. Elle bastist Babylone plus somptueusemēt qu'elle n'estoit au parauant, la fortifiant encores de fossez, & de meilleures murailles. En faisant plusieurs guerres, elle augmenta grandement son Royaume comme du païs d'Egypte, & d'Ethiopie, & de plusieurs autres regions. Elle auoit pour sa gens-d'armes, quand elle alla guerroyer en Inde, trentefois cent mille hommes-de-pied, cinq cēs mille hommes-de-cheual, avec cent mille charios: & autant qu'elle auoit de chameaux, autant y auoit d'hommes dessus, qui portoyent glaiues de quatre coudees: & sur la mer, menoit deux mille nauires. Elle regna ainsi quarante deux ans: puis elle fut tuee par son propre Fils: à cause qu'elle l'auoit prouoqué à l'acte de luxure: car, estant beau Fils, elle desiroit habiter avec luy charnellement: ce qui estoit illicite. Voyez Diodo. Sicili. liu. 3. Iustin. liu. 1. Euse. en sa Chroni. & Berose comme dessus. Herodote. liu. 1.

ZAMEIS Ninias, cinquieme Roy des Assyriens, fils de Ninus & de Semiramis, regna trente huit ans. Il est nommé aux escriptures saines, Amraphel. Iceluy ne fait rien, qui soit digne de memoire, sinon qu'il viuoit en grande tranquillité, ornant les Temples des Dieux, & donna de grans dons aux gens sauans de Babylone. Voyez Gene. 14. Cassiodore, Berose, liu. 5. Diodore, liure 3. & Eusebe. Il commença à regner en l'an du monde 2000. Auant la natiuité de Iesus Christ 1962.



A B R A H A M, fils de Tharé, estoit aymé de Dieu. Il de-  
 laissa son pais en l'an du monde 2024. Auant la natiuité de  
 Iesus Christ 1938. Et alla habiter en la terre de Chanaan: là  
 ou il eut la promesse que de sa semence viendroit nostre Sauueur  
 Iesus Christ, par lequel Dieu vouloit donner benediction à tou-  
 tes nations. A icelle promesse fut adioutee la Circoncision: la-  
 quelle fut donnee audiect Abraham, estant aagé de nonáte neuf  
 ans: sous icelle luy donnant à entendre que, par iceluy Iesus  
 Christ, la vie eternelle seroit donnee à ceux qui auroyent fiance  
 en luy. Au parauant (à sauoir en l'an de son aage octante six) il  
 auoit engédré Ismaël, de sa chambriere Agar: laquelle luy auoit  
 baillee Sara sa femme, à raison qu'elle ne pouuoit engendrer.  
 Mais, apres, estant aagé de cent ans, & Sara de nonante, Dieu  
 voulut qu'ilz eussent vn fils: lequel fut nommé Isaac. Quand il  
 fut paruenü en l'aage de cent septante cinq ans, il mourut, & fut  
 enseueli, par ses enfans, en Hebron, avec Sara: laquelle estoit en-  
 seuelie en ce lieu là mesme, & y auoit ia trente huiet ans. Voyez  
 Gene. depuis l'onzieme chap. iusques au vingtcinquieme. Iosephe  
 liu. 1. depuis le chap. 16. iusques au 26.

S A R A, femme d'Abraham, & fille d'Aran, estoit vne fem-  
 me fort honneste. Elle demoura long temps sans auoir lignee:  
 mais, par le vouloir de Dieu, elle enfanta Isaac, comme dessus  
 est dict. Elle estoit fort belle femme, & bien-aymee de son ma-  
 ri: & aussi elle supportoit grandement les afflictions qui surue-  
 noyent. Elle rendit son ame à Dieu en l'aage de cent vingtsept  
 ans. Voyez Gene. chap. 23.





A G A R, se voyant enceinte, commença à mespriser sa Dame Sara: de laquelle elle fut rudement reprise: & pourtant s'en vouloit retourner en Egypte, quand l'Ange de Dieu luy feit commandement de retourner avec sa maistresse, & qu'elle se rendist humble enuers elle. Apres il luy dist qu'elle enfanteroit vn fils, qui auroit nom Ismaël. Or en ce lieu y auoit vn puis, qu'elle nomma le Puis du Viuant qui me voit: lequel puis estoit encor, du viuant de Moyse, entre Cades & Barad. Quand donques elle fut retournee, elle enfanta vn fils, qu'Abraham nomma Ismaël. Voyez Gene. 16. Iosephe liu. 1. chap. 18.

I S M A E L, filz d'Abrahã & d'Agar, fut né en l'an du monde 2036. auant la natiuité de Iesus Christ 1926. estant ieune homme, demoura parmi les desers, & deuint bon Archer. Il habita principalement dedans le desert de Pharan, apres que sa mere, & luy aussi, fut enuoyee hors de la maison d'Abraham: & apres cela, sa mere le maria à vne Egyptienne: de laquelle il eut douze enfans: lesquelz ont esté tous Princes, chacun de sa tribu. Or iceluy mourut estant en aage de cent trente sept ans. Voyez Gene. 16. & 25. Iosephe liu. 1. chap. 18. & 21.

Enuiron ce temps là Sodome, Gomorre, Adama, Seboim, & Segor furent subuerties à cause de leurs pechez, avec tous leurs habitans, excepté Lot, & ses deux filles, estant sa femme transformee en statue de sel. Voyez Gen. 19. Iosephe liu. 1. chap. 19. Cela fut en l'an du mode 2048. auant la natiuité de Iesus Christ 1914. enuiron ce temps nasquit Isaac: à sauoir vn an ou deux apres. Ararius le sixieme Roy des Assyriens, subiugua les Batrians, & tous les Caspiens. Voyez Berose.



ISAAC, fils d'Abraham & de Sara, fut offert en sacrifice en l'an du monde 2073. Avant la natiuité de Iesus Christ 1889. & apres que l'Ange l'eut deliuré du sacrifice que Dieu auoit commandé à son Pere, estant en l'aage de quarante ans, print en mariage Rebecca, la fille de Bathuel, ainsi que son Pere Abraham auoit ordonné. Icelle luy enfanta, lors qu'il estoit aagé de soixante ans, deux enfans gemeaux: dont celuy, qui sortit le premier, estoit roux & velu: & l'appellerent, par son nom, Esau: & son frere, qui sortit incontinent apres luy, Iacob. Finalement Isaac mourut en l'aage de cent octâte ans: & fut enseveli, par ses fils, en Hebron iouxte ses Pere & mere. Voyez Gene. 25. & 35. & Iosephe liu. i. chap. 26. & 28. & la Chrono. de Funccius.

REBECCA fut femme d'Isaac, & fille de Bathuel. Elle fut cause que Iacob receut la benedictiõ que deuoit auoir Esau, de leur Pere Isaac. Car estant iceluy Isaac, son mari, deuenu vieux, en sorte qu'il auoit perdu la veuë, & ayant enuoyé Esau, son mieux aymé, à la chace, Rebecca, ce pendant, enueloppa les mains & le col de Iacob, avec des peaux de cheureau: & ainsi fut pris pour Esau par son pere. Depuis, estant Esau retourné, & se voyant deceu, eut en haine son frere Iacob. Quoy sachant Rebecca, & oyant les menaces d'Esau, feit aller Iacob en la terre de Haran, en la maison de son frere Laban, faisant commandement à son dict fils Iacob d'estre là iusques à ce que la fureur de son frere Esau seroit rappaisée: mais il trouua sa mere morte, quand il fut de retour à son Pere, apres auoir fait paix avec Esau. Voyez Gene. chap. 27. & Iosephe liur. i. depuis le 26. chapi. iusques à la fin dudit liu. i.



**I A C O B**, fils d'Isaac, estant allé en Hará, vers son oncle Laban, fut receu en grande liesse: & apres auoir demouré avec luy par l'espace d'un moys, feirent tel pache ensemble que Iacob, qui auoit mis son amour en Rachel, l'une des filles dudit Laban, le seruiroit sept ans, pour icelle auoir en mariage: mais, à la fin du terme, Iacob ne l'obtint point: ains la premiere nuit de ses nopces, luy fut mise Lia secrettement au Lieu de Rachel: & au lendemain luy fut dict que ce n'estoit pas la coustume du pais de marier la plus ieune deuant la plus ancienne. Quoy voyant Iacob, seruit autres sept ans pour Rachel: & par ainsi eut les deux sœurs à femmes: desquelles deux, & de leurs deux chambrières, il eut douze fils & vne fille. En fin il mourut en Egypte, ou Ioseph son fils l'auoit retiré duránt la famine de sept ans: & à l'heure de sa mort estoit aagé de 147. De là il fut transporté inhumer aupres de ses peres en Hebron, par ses enfans. Voyez Gene. 29. cha. & depuis 37. iusques à la fin. Iosephe liu. 1. cha. 27. & chap. 8.

**L I A**, femme de Iacob, enfanta quatre fils, à sauoir Ruben, Simeon, Leui & Iuda: puis cessa d'enfanter: & alors bailla sa chambrière Zelpha à Iacob, laquelle luy enfanta deux fils, à sauoir Gad & Aser. Apres cela, Lia enfanta encores deux fils, & vne fille: à sauoir Issachar, Zabulon, & la fille ayant nom Dina. Voyez Gene. 29. & 30. chap.

**R A C H E L**, seconde femme de Iacob, voyant qu'elle estoit sterile dóna sa chambrière Balam à Iacob son mari: laquelle luy enfanta deux fils: Dan & Nephthalim. Apres, Dieu eut regard à l'amertume de Rachel: & elle enfanta deux fils: Ioseph & Benjamin: à l'enfantemét duquel Benjamin elle mourut. Voyez Gene. chap. 29, 30, 35. & Iosephe liu. 1. chap. 27.



IOSEPH, fils de Iacob & de Rachel, à cause qu'il estoit grandement aymé de son Pere, eut ses autres freres enuieux contre luy: & pourtant le ietterent en vne cisterne du desert de Sichem: mais, par le conseil de son frere Iuda, il fut tiré dehors, & puis vendu aux Ismaélites, lesquelz le vendirent à Phutiphar, Eunuque de Pharao. Quelque temps apres, à cause que sa maistresse le chargea qu'il l'auoit voulu forcer, quãd, au contraire, elle mesme le pressoit, fut mis en prisõ: là ou il exposa les songes du maistre des Boulengers & des Sommeliers de Pharao: & depuis fut mis hors de prison, pour exposer aussi ceux de Pharao mesme, qui luy donna tout gouvernement sous luy en Egypte, le nommant Sauueur du monde. Qui fut en l'an de la creation du monde 2 2 3 0. & auant la natiuité de nostre Sauueur Iesus Christ 1 7 3 2. Finalement il mourut en l'aage de cent & dix ans. Voyez Gene. 37. chap. iusques à la fin. Et Iosephe liu. 2. chap. 2. iusques au 9.

A S E N E T H, fille de Phutiphar, prestre de Heliopolis, fut femme de Ioseph: laquelle luy enfanta deux fils: à sauoir Manasses & Ephraim: lesquelz furent adoptez par Iacob, qui leur donna aussi sa benediction, deuant que rendre son ame à Dieu. Voyez comme dessus.



PROMETHEVS, fils de Iapetus, estoit hōme de grand fauoir, parquoy estoit fort estimé en Arcadie, à raison, qu'il enseignoit les gens rudes à viure ciuilement. Il fut inuenteur de faire les pourtraictures apres le naturel avec la terre grasse: & a faire sortir le feu de la pierre: & aussi trouua l'vsage de porter les anneaux aux doigts: mais au commencement ilz n'estoyent que de fer: & disoit qu'il les faloit porter au doigt qui est plus prochain du petit: à cause que la veine du cœur y est, & aussi on met l'anneau en ce doigt là, aux espousees. Il fut encor le premier qui enseigna l'Astrologie aux Syriens. Voyez saint Augustin en la Cité de Dieu liu. 10. Pline, & Casio.

ATLAS, frere de Prometheus, fut semblablement fort ingenieux: il eut grande congnoissance du cours des Planetes, & des constellations d'icelles: des influences & effectz du Soleil & de la Lune. Il fut le premier qui enseigna l'Astrologie aux Grecs: & pourtant les Poëtes ont fait qu'il portoit le Ciel. Voyez Herodo. Plutar. Pline.

ALTADAS, le douzieme Roy des Assyriens, regnoit en leur temps, qui fut enuiron l'an du monde 2263. & auant la natiuité de Iesus Christ 1699. lequel n'estimoit rien en ce monde, d'heureux, que plaisirs, richesses & triumphes: comme recitent Casio. & Bero.

GALATES regnoit sus les Gaulois: & Vandalus sus les Sarmates, qui sont Alemans habitans pres du Royaume de Pologne. Hispanus, le fils de Hispalis, regnoit en Espagne, duquel elle a prins le nom. Voyez comme dessus.



**CECROPS** Diphies, qui fut du temps de Moyse, le premier Roy des Atheniens, il edifia Athenes, laquelle fut premierement nommee Cecropie, qui fut en l'an du monde 2408. Avant la natiuité de Iesus Christ 1554. Iceluy fut le premier qui inuoqua Iuppiter, & trouua les simulachres au pais de Grece. Il inuenta de faire les autelz pour immoler les sacrifices, & fut pareillement le premier qui cōmença de conioindre l'homme & la femme par mariage audit pais. Voyez saint Augustin en la Cité de Dieu, liu. 18. chap. 8. Iustin liu. 2. & Eusebe en la preface de sa Chronique.

**DEUCALION**, fils de Prometheus, commença à regner en Grece, du temps qu'il vint pres le mont Parnassus, en l'an du monde 2428. Avant la natiui. de Iesus Christ. 1534. De son temps vint vn Deluge qui gasta vne partie de Grece: & fut en l'an du monde 2437. Quand Deucalion veit ces choses tant admirables, il se sauua dedans vne nacelle, & sa femme Pyrrha avec luy, & monterent en la montaigne de Parnassus, & à tous ceux qui se sauuoient par nacelles, & arriuoyent à luy, il leur bailloit lieu conuenable, pour là demourer. Voyez Berose.

De leur temps regnoit en Italie Iasus Ianigena, aux nopces duquel afsista Iö d'Égypte.

**CVRETES** & Coribantus edifierent Gnosson, lesquelz en sautant avec les armes, inuenterent de danser par mesure. Voyez Euseb.

**ASCATADES**, qui fut le dix huietieme Roy de Babylo ne, subiugua toute la Syrie, & la feit ioindre avec son Royaume.



MOYSE fut conducteur des enfans d'Israël, lesquels sortirent de la captiuité d'Égypte l'an du monde 2 4 5 3. & auant la naissance de Iesus Christ 1 5 0 9. Entre les Hebreux fut grandement aymé de Dieu, & des hommes: aussi il estoit doux & benin, & , entre les Prophetes , estoit tres excellent Historiographe. Apres auoir receu la Loy en la mōtagne de Sina, avec l'obseruā. ce des Ceremonies, il enseigna le peuple à garder & faire les cōmandemens de Dieu, & à obseruer toutes les choses que l'Eternel auoit ordōnees. Estant paruenue en l'aage de cent vingt ans, mourut sur le mont de Nobo, là ou Dieu mesmes l'a voulu enseuelir. Voyez Exo. Leui. Nomb. & Deuteronomie.

AARON frere de Moyse, estoit vn homme fort vertueux entre les Hebreux, lequel aussi estoit grandement orné d'eloquence: & pourtāt en l'an du monde 2 4 5 5. fut souuerain Sacrificateur de Dieu, selon la Loy. L'eternel luy ordonna vn testament perpetuel. Or quand il mettoit les hosties sur l'Autel pour sacrifier, le feu s'y mettoit diuinement par le commandement de Dieu, lequel feu enflammoit tout le Sacrifice. Iceluy Aaron engendra quatre enfans, c'est assauoir Ithamar, Eleasar, Nadab, & Abiud, lesquels furent bruslez en portant les hosties sur l'autel. Marie (la sœur des dessuditz Aaron & Moyse) mourut vn petit deuant que ledit Aaron eust rendu son esprit à Dieu en l'An de son aage cent vingt trois ans, ayant exercé l'office de Sacrificateur par l'espace de trente sept ans, & fut enseueli en la montaigne de Horeb. Voyez Nomb. 16. 17. & 20. Iosephe liure 4. chap. 5.



ELEASAR, fils d'Aaron, fut en l'an de la creation du monde 2491. fait grand Sacrificateur des Hebreux apres la mort de son Pere, & exercea l'office par l'espace de vingtsept ans. Iceluy obtint avec Iosué la terre des Chananeens, laquelle ilz nommerent Iudee, & fut diuisee en douze lignes entre les enfans d'Israël. Eleasar ministroit au Tabernacle en offrant Sacrifices à Dieu pour le peuple. Or ayant fait son cours de Nature, selon qu'il pleut à Dieu, il rendit l'esprit la mesme annee que Iosué mourut, delaisant la Sacrificature à son fils Phinees. Voyez Exode chap.6.& Iosué cha.24.

IOSVE', fils de Num, succeda à Moyse, quant à l'administration du gouvernement des enfans d'Israël, en l'an du monde 1493. avant la natiui. de Iesus Christ 1469. Lequel en ensuyuant le commandement de Dieu passa le fleuve de Iordan, à pied sec, & le peuple d'Israël avec luy. Apres il assiegea la ville de Iericho, laquelle en la fin de sept iours fut totalement destruite, excepté Raab, & toute sa famille, à cause qu'elle auoit sauué les deux explorateurs. Apres cela il alla apres cinq Roys, qui auoyent assiegé la ville de Gabaon. Le Soleil fut arresté (par la puissance de Dieu) par l'espace d'un iour, iusques à ce que Iosué eut deffait ses ennemis. Finalement il diuisa la terre au peuple d'Israël. Apres qu'il eut occis trente vng Roys, il mourut en l'aage de cent & dix ans: & fut enseveli avec Caleb.

Voyez le liu. de Iosué, & Iosephe liure 5. chapitre premier.





PERSEVS, fils de Iuppiter & de Danaé, occist Meduse l'une des Gorgones, en l'an du monde 2497. & auant la natiuité de Iesus Christ 1465. Print deliberation d'aller hors du pais de Grece, pour se transporter au pais d'Asie, auquel lieu ne fut point oisif: car il y souffrit grans labeurs, tellement qu'il fut contraint de combattre continuellement contre ceux du pais, qui estoient pour lors fort Barbares. Mais il fut tant prudent en ses affaires, qu'il obtint Seigneurie sur eux par sa prouesse: & les rendit subiects à luy, dont est venu que les Perseés ont obtenu nom de luy à cause de son bon gouuernement. Voyez Orose liure 1. chap. 11. Diod. Sici. liu. 4.

ANDROMEDA, fille de Cepheus Roy des Ethyopiés & de Cassiope sa femme, fut pour occasion de l'orgueil de sa mere, liee à vn Rocher par les Nymphes, pour là estre deuoree d'un monstre Marin: laquelle Andromeda fut deliuree par Perseus, & puis la print à femme. Apres cela, il retourna en son pais de Grece en la ville d'Arges, là ou il occist son Pere grand, à cause qu'estant petit enfant, Perseus auoit esté mis à l'auenture sur la mer avec sa mere Danaé par son-dict Pere grand. Parquoy il regna en Arges au lieu de celuy qu'il auoit occis. Voyez Euripides, & Properse.

De ce temps là Rameffes Aegyptus ietta hors du pais d'Egypte son frere Danaüs, & regna Roy d'iceluy pais, lequel au parauant estoit nommé Aeria, mais à cause d'iceluy Aegyptus il fut nommé Egypte. Or iceluy Danaüs estant chassé par son frere Rameffes, alla en Arges, ou il occist Stelenus, qui l'auoit receu, quand il estoit poure, & hors de son pais, à fin d'auoir sa domination. Voyez Orose liu. 1. chap. 11.



PHENIX, filz d'Agenor, avec son frere Cadmus, de Thebes d'Egypte vindrent en Syrie: en l'an du mōde 2506. avant la natiui. de Iesus Christ 1456. & regnerent sus Tyrus & Sidon. De Phenix fut nommee la region Phenice. Iceluy Phenix trouua l'inuētion de quelques lettres, lesquelles il enseigna aux Pheniciens, ses subiects. Apres il trouua l'inuention d'vser du Vermillon pour escrire. Lesdits Pheniciens trouuerēt le moyen de chasser aux oiseaux & aux poissons: aussi ilz trouuerent l'inuention d'vser de fer, duquel apres on fait toutes sortes d'outils. En ce pais là est situē le mont du Liban, & de Carmel, qui sont montagnes fort hautes. Voyez Isidore, & Mantuan, & Supplemen. Chro.

CADMVS, aussi filz d'Agenor, ayant laisē son frere Phenix en son pais, vint en Grece, & là, estant assis aupres d'une Fontaine, laquelle est nommee la Fontaine Hippocrenē, commença à penser, comment il pourroit trouuer aucuns caracteres pour sauoir escrire. Or quād il eut asses ruminē en son esprit, il en trouua vingt quatre: aucūns dient seize, lesquelles (avec grande dexteritē d'esprit) il enseigna aux Grecs. Il estoit homme de grand entendement: ce qui vint bien aux Grecs, car ilz estoient fort rudes. Voyez Supplemen. Chro.

De ce temps Corax le seizieme Roy des Sicyoniens regnoit. ROMVS regnoit sur les Celtes. Voyez Manethon.

Alors Asterius regnoit en Crete. Aussi le Temple de Delphi fut bruslé par Phlegyas. Voyez comme dessus.



DIONYSIVS, surnomé Liber-pater, & puis Bacchus, fut fils de Iuppiter & de Semelé, que les Grecs appellerét Dieu des yurongnes, à cause qu'il inuenta la vigne en leur país de Grece. On l'appelle Dionysius, à cause de Nyssa, qui est le lieu ou il fut nourri. On l'appelle Liber, pource qu'il batailla pour la liberté de son país, ou pource que le vin met l'esprit en liberté de tout souci, & la lãgue en liberté de parole. On l'appelle Bacchus, à cause des femmes Bacchãtes qui le suyuoient, pleines de fureur & de crierie: ou à cause des baces, qui sont menus fruiçts, qu'il enseigna mettre sur le pressoir, pour en faire de la boisson. Il inuenta encor la ceruoise, pour ceux dont la terre ne peut porter vigne. Aussi il fut le premier qui inuenta l'ordre militaire, & assembla plusieurs hõmes & femmes & les mena en guerre: avec lesquelz il circuit & enuirõna quasi tout le mõde: & exerçoit grãde iustice en corrigeãt les malfaiçteurs. Il fait guerre aux Indes en l'an du monde 2508. auãt la nati. de Iesu. 1454. & print en son aide les Amazones. Il edifia plusieurs villes: & restablist & augmenta celle que Ninus edifia, nõmee Nisibis: & la peupla de 50. mille hõmes. Il y a eu vn autre Dionysius plus ancien: mais, par ce que cestuy est le plus renõmé, à cause des Grecs, qui luy ont attribué tous les faicts de l'autre, cõme aussi ils ont fait à leur Hercules, nous l'auons mis le premier. Voyez Diod. li. 3. & 5. & Sup. Chro.

DIONYSIVS, plus ancien que le susdiçt, fut fils de Iuppiter & de Proserpine, appelé par aucuns Sebasis. Il fut le premier qui mit les bœufs au ioug pour labourer la terre. Il vint aux Indes, ou les habitans estoient fort rudes, & vsoient en leur manger d'escorces d'arbres avec la chair crue. Il les assembla aux villes, & leur apprint à semer le bled, apres auoir labouré la terre avec les bœufs. Apres qu'il eut regné sus les Indes cinquante deux ans, il mourut. Voyez comme dessus.



**OTHONIEL**, fils de Cenes, & frere puisné de Caleb, de la lignee de Iuda, deliura le peuple de la main de Chusam-Rafathaim, le Roy de Syrie, auquel Israëel auoit serui l'espace de huiët ans. Ce fut en l'an du monde 2538. Et auant la natiuité de Iesus Christ 1424. Il fut esleu Prince & Iuge du peuple d'Israël, & quand il exercea l'office, il auoit trente & deux ans: durant lequel gouvernement, le peuple fut sans guerre, & en grand repos. Il espousa la fille de son frere Caleb, laquelle auoit nom Acfa. Apres il rendit son ame à Dieu, quand il eut regné l'espace de quarante ans. Voyez le liure des Iuges, au troisieme chap. Iosephe liu. 5. chap. 7.

**ACSA** fut fille de Caleb & femme d'Othoniel, laquelle, estant montée sus vn asne, se ietta ius en terre, en la presence de son Pere: alors il luy demanda s'elle auoit à luy dire quelque chose: & elle respondit, que fust son plaisir de luy faire vn bien: à sauoir, puis que son vouloir auoit esté de luy donner la terre seche & non arrosée d'eau, qu'il luy donnast aussi la terre arrosée d'eau sourdante en icelle: & Caleb luy donna les terres de dessus & de dessous, qui estoient arrosées d'eau. Voyez le liure des Iuges premier chap.

Apres Othoniel Ahud fut Iuge en Israël, lequel tua virilement Eglon: auquel le peuple auoit serui dix huiët ans, & ayant Iugé Israël octante ans, il mourut. Voyez le liu. des Iug. c chap. 3.

Apres regna Sangar, homme fort puissant, qui tua six cens hommes des Philisthins avec vne gaule de quoy on pique les bœuf. Voyez Iug. 3. chap. 1.



PELOPS, le fils de Tantalus trespuissant Roy de Phrygie, aymoit d'une grande amour Hippodamie, & la fait demander en mariage, mais reieté par Enomaüs le Roy de Pise (qui estoit ville en Elis pres d'Archadie, dont les habitans bastirent au retour de la guerre de Troye, celle qui est de mesme nom en Italie) qui estoit Pere de ladicte Hippodamie. Et pour ceste cause la guerre fut entre eux, en sorte, qu'elle ne peut jamais estre estaincte, que premierement Pelops n'eust obtenu sa demande. Finalement en l'an du monde 2617. il iouyt de la belle Hippodamie, par le moyen de la trahison de Myrtilus chartier d'Enomaüs. Iceluy Pelops eut deux filz d'icelle noble Dame, à fauoir Atreus, & Thyestes. Apres auoir regné triomphamment l'espace de cinquante deux ans, il mourut, ayant subiugué à luy & aux siens par faitz d'armes la Prouince Peloponeffus, que l'on dit à present la Moree, qui est quasi Isle, que les Grecs appellēt Chersonesus, dont y en a quatre au monde, des principales.

HIPPODAMIE, fut fille d'Enomaüs, auquel fut reuelé qu'il seroit tué quād il la marieroit: à ceste cause institua vn chariot avec cheuaux cheminans d'une merueilleuse vistesse, promettant que quiconque courroit plus-tost que ledit chariot, il auroit ladicte fille en mariage: autrement seroit mis à mort: tellement que treize grans personages furent par vn tel moyen vaincus. Or Myrtilus fut corrompu par Pelops: si qu'il luy fait de cire laixieul du chariot: & pourtant ledict chariot en courant tomba & se rompit, & Enomaüs se tua & Myrtilus fut ietté en la mer par Pelops (laquelle de luy a esté appelee Myrtoe) lors qu'il demandoit que la promesse luy fust tenue, à fauoir de coucher la premiere nuit avec la belle Hippodamie.



AMPHION, fils de Iuppiter & d'Antiope, regnoit à Thebes, ville de Beotie, país de Grece, en l'an du monde 2636. auãt la natiuité de Iesus Christ 1326. ans. Il fut si parfait en l'art de Musique, que lon dit qu'il eut le Luc de Mercure, au son duquel, les Poëtes faignēt qu'il attiroit les pierres, pour bastir Thebes. Ce que Eusebe en sa Chronique, expose qu'il auoit des auditeurs rudes d'esprit, & (s'il fault ainsi parler) de pierre: à quoy s'accorde Horace en son Art Poëtique, disant qu'Amphion fut homme vertueux, sage, & eloquent, & que par sa prudence, & douceur d'eloquence, il persuada aux gens champestres, agrestes & ignorans, de se retirer ensemble, & habiter en ville close, & policee. Palephatus dit qu'Amphion par le moyen de son instrument de Musique, duquel il iouoit tresbien, gaigna argent, dont fait clore de murs la ville de Thebes.

NIOBE, fut fille de Tantalus, sœur de Pelops, & femme d'Amphion, auquel elle enfanta sept fils, & autant de filles de grande beauté. Pourquoy elle s'enorgueillit, & se prefera à la Deesse Latone, laquelle de ce indignee, mua Niobe en vne pierre (comme les Poëtes faignent) apres que son fils Apollo eut tué tous ses quatorze enfans. Voyez Ouide, au 6. liu. de la Metamorphose. Diodore liu. 5. Palephatus dit que ceste fable a prins son occasion, par ce que Niobe apres la mort de ses enfans, fait mettre son image de pierre, sus le sepulchre d'iceux, comme si elle les regrettoit, & pleuroit leur mort: & dit aussi que luy. mesme a veu icelle image de pierre, effigie de Niobe.



DEBORA, femme de Lapidoth, fut Prophete, & iugea le peuple d'Israël par quarante ans, commenceans en l'an du monde 2659. avant la natiuité de Iesus Christ 1303. ans. Elle constitua Barac Chef d'armee, & avec luy alla en guerre contre Sisara, qui estoit conducteur de l'armee de Iabin, Roy des Chaneens: laquelle fut déconfite & deffaite: & Sisara endormi fut transpersé par les temples de la teste, avec vn clou que Iahel, femme de Haber, luy ficha, & cloïra, à beaux coups de maillet. Ainsi fut deliuré le peuple d'Israël de la seruitude dudict Roy Iabin, en la subiection duquel auoit esté par vingt ans. Voyez le liure des Iuges cha. 4. Ioseph. 5. liu. des Antiquitez, chap. 9.

BARAC, fils d'Abinoam, de la lignee de Nephthalim, Chef & conducteur du peuple d'Israël (comme a esté dict) estoit vn vaillant Capitaine, qui avec dix mil hommes seulement, mit en route, & en fuite l'armee de Sisara, ou y auoit vingt fois plus de gens, leurs ennemis. Mais Barac & Debora estoient principalement armez & fortifiez de la puissance miraculeuse de Dieu. Voyez comme dessus.



**GEDEON**, autrement dict Ierobaal, fut fils de Ioas, de la lignee de Manasses, & fut Iuge du peuple d'Israël par quarante ans, commenceans en l'an du monde 2699. avant la natiuité de Iesu Christ 1263. ans. Auant que d'aller en guerre contre les Madianites, il demâda par deux fois signe à Dieu, pour estre acertainé que Dieu l'enuoyoit contre iceux: & Dieu luy demonstra par deux miracles: le premier fut à l'endroit du sacrifice que le feu miraculeusement vint tout consumer: & l'autre, fut en la toison, premierement humide de rosee, puis toute seche, ainsi fut sa foy fortifiée. Puis se mit si bien à guerroyer, qu'ayant deffaiât Oreb, & Zeb, Princes des Madianites, & Zebee, ou Zeba, & Zalmana, deliura le peuple de leur subiection, en laquelle auoyent esté par sept ans. Voyez le liure des Iuges 6.7.& 9. cha. Iosephe liu. des Antiquitez 5. cha. 10.

**ABIMELECH** fils de Gedeon, & de Droma sa concubine, ayant tué tous ses freres, au nombre de septante, excepté le plus ieune, print le gouvernement du peuple d'Israël, & fut Iuge par trois ans, commenceans en l'an du monde 2739. deuant la natiuité de Iesus Christ 1223. ans. Comme il assiegeoit, & assailloit vne certaine tour, ou il mettoit le feu à la porte, survint vne femme qui luy rua sus la teste vne pierre bien grosse, d'vne meule à moulin qui auoit esté rompue. Ainsi mourut malheureusement, comme auoit merité, celuy qui par tyrannie, & souillé du sang de ses freres, auoit vsurpé la domination, en laquelle ne regna que trois ans.

**THOLA** de la lignee d'Issachar, iugea le peuple apres Abimelech, par 23. ans. Voyez le liu. des Iuges cha. 10.

**IAIR** de Galaad, apres Thola fut Iuge par 22. ans. Voyez comme dessus.





EVROPA fut fille du Roy des Phœniciens, nommé Agenor, laquelle les Poëtes faignēt auoir esté rauie, & trāsportee en la Crete par mer, de Iuppiter, qui s'estoit desguisé en forme de Beuf: & que d'icelle engendra Minos, Rhadamantus, & Sarpedon. Voyez Diodore Sicilien lib. 5. Ouide en la Meta. liu. 2. Palephatus interprete ceste fable d'un certain homme de Crete, ou Candie, qui auoit nom Taurus, c'est à dire Taureau, lequel emmena, & raut icelle Europa.

Lon dit que de ladiete fille Europa, fut nōmee la tierce partie du monde, Europe, combien que Herodote liu. 4. ne soit pas de ceste opinion: qui dit que personne ne sçait, au vray, dōt est auenu ce nom à la tierce partie du monde.

MINOS fils de Iuppiter Asterius, & d'Europa, mit des vaisseaux sus mer: fut premier Seigneur des isles Cyclades, qui sont en nombre 54. en dechacea les Cariens, & y transmit de ses subiets, y constituant ses fils princes & dominateurs, ayant purgé la mer de tous pyrates & brigans: en l'an du monde 2710. auāt la natiuité de Iesus Christ 1252. ans. Voyez Thucydide en la peface de son histoire. Il fut estimé de tous homme iuste: lon dit aussi qu'il fut le premier qui persuada vser de loix escrites: & qu'il faignit que celles qu'il mettoit en auant, estoient introduictes par luy du commandement de Mercure, auquel Iuppiter auoit donné telle charge. Voyez Diod. li. 2. & 7. Denis de Hali. liu. 2. parlant des faits de Numa. Volater. liu. 33. Minos certes, pour sa grande iustice, a esté dict apres sa mort, estre Iuge aux enfers avec son frere Rhadamantus.



HERCVLES fils, comme lon dit, de Iuppiter & d'Alc-  
mene, femme d'Amphitryon, fut né en l'an du monde 2715.  
auãt la natiuité de Iesus Christ 1247. vesquit 52.ans: perit par  
feu, fut vn des plus grans brigans du monde. Voyez Manetho.  
Les Grecs, qui se vantent que Hercules estoit de leur nation, en  
dient beaucoup de belles fables, qu'il n'est ia besoing ny lieu ny  
temps de declarer icy: & au leur Hercules attribuent tous les  
haults faiçts des autres Hercules, comme ils ont coustume de  
faire. Ses faiçts les plus renommez sont en nombre douze, que  
Diodore descrit amplement. Eurystheus Roy de Mycene l'en-  
uoya combatre les monstres, esperant qu'il y mourroit: & ce à la  
persuasion de Iuno qui n'aymoit pas Hercules, comme engen-  
dré de son mari en vne autre femme. Il vint des Espagnes en  
Italie 55. ans deuant Eneas, tua Cacus, donna loix aux Italiens,  
puis print Troye, & en tua le Roy, qui estoit Laomedon, par ce  
qu'il ne luy tenoit promesse: & y mit Roy Priam fils de Laome-  
don. En fin pour remede à la trop aspre douleur qu'il sentoit  
par la chemise empoisonnee, se ietta dans vn grand feu. Denis  
de Halicarnas liu.1. dit que Hercules estoit vertueux & vaillant,  
qui a chacé du monde les tyrans.

DEIANIRE, fille d'Oeneus Roy de Calydon, fut fem-  
me d'Hercules, laquelle luy enuoya la chemise baignee au sang  
de Nessus, pensant que ce sang auoit vertu de retirer son mari  
de l'amour des autres femmes, comme Nessus luy auoit faulse-  
ment fait entendre. Mais ayant sceu le mal-heur de son mari,  
venant de par elle, toutesfois innocente, se pendit, mesme deuant  
que Hercules fust mort. Diodore liu.5. Ouide en son epistre 9.



SIBYLLE Persique, que d'aucuns appellēt Chaldee, d'autres Hebraique, auoit nom Sambetha: elle fut nee pres la mer rouge: son pere auoit nom Berossus, & sa mere, Erymanthe: elle composa vingt quatre liures, & a prophetizé beaucoup de choses de nostre Sauueur Iesus Christ: à laquelle les autres Sibylles s'accordent: car lon tient que ceste cy a esté la premiere: & d'icelle a fait mention Nicanor, qui a décrit les faictz d'Alexandre le grand. Voyez Lactance liu. i. cha. 6. S. Augustin de la Cité de Dieu liu. 18. cha. 23. on luy attribue ceste Prophetie: *O beste, tu seras surmarchee: Dieu naistra au monde: le verbe inuisible sera palpable, ou sera frapé.* aussi lon tient qu'elle predist le miracle des cinq pains & deux poissons. Voyez le liure des Sibylles.

SIBYLLE Libyque, ou Libyffe est la secōde, cōme a escrit Marc Varro en ses liures des choses diuines: & disoit q̄ les liures Sibyllins n'estoyēt point faits par vne seule Sibylle, mais qu'ils estoyēt appelez Sibyllins, à cause que toutes les femmes Prophetes, ont esté par les anciens appellees Sibylles: ou par ce qu'elles annonçoient le conseil de Dieu, selon l'etymologie, à la mode de parler Eolique (car les Eoles appellent les Dieux, *σιβς*, & *Βυλῆς*, conseil) ou pour cause d'une Prophete de Delphos, qui auoit nom Sibylle, en son propre nom. Voyez comme dessus. Lon dit qu'elle a ainsi prophetisé: *Les iours viendront que Dieu illuminera l'espeffeur des tenebres: le lien de la Synagogue sera rompu: les hommes se tairont, & verront le Roy des viuans, & vne vierge, dame des Gentils, le tiendra en son giron: il regnera en misericorde, puis sera mis entre les mains des meschans, & lon donnera des soufflets à Dieu: il sera comme miserable, & donnera secours aux miserables.*



**SIBYLLE** Delphique, de Delphos, en Grece, auoit nom Themis, ou bien Sibylle, duquel aucuns tiennent que depuis les autres ont esté ainsi appellees: autres dient qu'elle fut nommee Sibylle, par ce qu'elle rendoit responses vrayes, à ceux qui alloÿt à elle à conseil touchant des choses auenir, & mieux qu'Apollo mesme. Diodore dit que c'est Daphné, que les Grecs quād ilz eurent vaincu Thebes, enuoyerent en Delphos: ou elle eut plus de bruit que l'oracle d'Apollo. Lon dit qu'elle fut deuant que la destruction de Troye, de laquelle Homere a prins plusieurs vers, qu'il a mis en ses œuures. Voyez cōme dessus. Lon tient qu'elle a ainsi prophetizé: *Congnoy celuy ton Seigneur, qui est le vray fils de Dieu.* & Chrysippus recite qu'elle a predit *qu'il deuoit naistre vn Prophe- te, sans semence virile.* Elle mit par vers l'incarnation, doctrine, miracles, passion, resurrection, & ascension de nostre sauueur, si clement qu'elle semble plus auoir escrit histoire que prophetie.

**SIBYLLE** Cumee, dicte Italienne, par ce qu'elle estoit de Cumes, ville d'Italie, ou des enuirōs: & se tenoit là en vne cauerne, ou rendoit oracles & certaines responses aux gens, mesme: à Eneas elle predist les choses auenir. Tous les vers des Sibylles estoyēt permis en public, fors de ceste-cy: car les siennes propheties estoyēt cachees par les Romains, & n'y auoit que les Quinze hōmes qui les veifsēt. Aussi lon tient que c'est elle qui a escrit les destinees des Romains. Verg. touche de la substāce des vers d'icelle, en son eclogue 4. que lon entend de la natiuité de nostre Seigneur: & aucūs aussi de la naisāce du fils de Pollio. quoy que il en soit ceste eclogue touche bien auāt de nostre foy: ioinct que nostre Seigneur fut né de ce tēps là. Voyez cōme dessus. On dit que ceste Sibylle a prophetizé, *qu'vne belle fille vierge nourriroit vn enfant de sa liqueur, à sçauoir de laiēt enuoyé du ciel.*



NICOSTRATE, mere d'Euander, predisoit les choses auenir, & pour raison des carmes, ou vers, par lesquels elle declaroit les oracles d'Apollo, fut appelee Carmentis. aucuns dient qu'elle donna premierement l'invention des lettres aux latins. aussi Denis de Halicarnas, en son premier liure, recite que les Archades apporterent premiers les lettres en Italie, ou ilz vindrent apres les Troyens. & Tite Liue dit precisemēt, que ce fut Euander, sous telles paroles: Euander adonc fugitif de Peloponnesse, gouuernoit ce pais plus par reuerence que par puissance, estant homme esmerueillable pour le cas admirable des lettres, qui estoit chose nouvelle entre les gens du pais pour lors ignorans. à quoy s'accorde Cornelius Tacitus qui escrit que les Aborigenes ont aprins les lettres d'Euāder Archade. aussi dit Textor en son officine, que Nicostrate estant bien instruite es lettres Grecques, trouua premierement l'usage de plusieurs lettres Latines, qui ne sont point differentes des nostres Françoises: à quoy lon peut iuger qu'elle estoit femme de bon esprit, & remplie de plusieurs doctrines.

EVANDER fils de Nicostrate susdicte, ayant occis son pere, par cas fortuit, delaiissa l'Arcadie, & vint en Italie: d'ou dechaceant les Aborigenes, fit son habitation au mont Palatin: & receuant en don quelques terres que Faunus le ieune, Roy des Aborigenes, luy donnoit, eleut le mont qui est quasi au milieu de la ville de Romme, ou il edifia vn chasteau, ou bourgade, qu'il nomma Pallantium, ou Pallanteum, du nom de son grand ayeul, enuiron l'an du monde 2725. auant la natiuitè de Iesus Christ 1237. ans, c'est-à sauoir peu de temps auāt que Hercules vinst en Italie. Voyez Denis de Halicarnas liu. i. & Caelius Rhodiginus liu. ii. cha. 7. & Vergi. en son Encide liu. 8.



PRIAM fils de Laomedon, quand son pere fut tué, & la ville prinse d'affault par Hercules, fut constitué Roy par ledict Hercules, qui luy rendit le Royaume, comme à vn homme de bien, & amy sien. Diod. liu. 5.

Il y en a d'autres toutesfois qui dient que Priam fut mené captif en Grece, puis rachepté d'entre les mains d'Hercules, dont à cause du rachapt ou rāçon il porte, ce dit on, le nom de Priam. Il eut cinquante fils: dont de sa femme y en auoit dixsept, entre lesquels les plus renommez sont Hector, Paris, Deiphobus, Helenus, Polites, Polydorus. Quand la ville de Troye fut prinse par les Grecs, Priam fut tué, luy bon vieillart, cruellement par vn ieune fils d'Achilles, nommé Pyrrhus, & fait ce meurdre pres l'autel de Iuppiter, & au lieu mesme, ou son fils Polites estoit occis freschement. Voyez Dictys de Candie. Priam comença regner en Troye en l'an du monde 2725. auant la natiuité de Iesus Christ 1237. Il orna & amplifia la ville, si que elle surpassoit les autres.

HECVBA fille de Cisseus Roy de Thrace, fut femme de Priam: elle estant enceinte de Paris, songea qu'elle enfantoit vn flambeau ardent qui bruloit le païs. Lon fait qu'elle a esté trāsmuee en chienne, par ce qu'elle pleine de cris & douleurs, iniurioit vainement les Grecs, qui l'emmenoyent captiue, quād elle recongnut le corps de son fils Polydorus, que Polymnestor auoit ietté en la mer. Voyez Vergile au 10. liu. de l'Eneide, & Ouide au 13. de la Metamorphose.



HECTOR fut le plus fort & belliqueux des fils de Priam: lequel Hector se portant bien, les affaires de Troye aufsi se portoyent bien. Il tua plusieurs Grecs, mesmement Proteſilaüs, & puis Patroclus, en vengeance duquel Patroclus, il fut par Achilles tué, & trainé mort à l'entour du tombeau de Patroclus: & douze iours apres, son pere le rachepta tout mort. Voyez Dares de Phrygie: Homere en son Iliade, liu. 23. Vergile liure 1. de l'Encide, Volaterran liu. 15.

ANDROMACHE fille d'Ection Roy de Thebes en Cilice, fut femme d'Hector, & mere d'Aſtyanax, qu'elle enfanta depuis la guerre des Grecs commencee, & en la destruction de Troye le cacha: mais Vlyſſes le trouua, & le ietta du hault d'une tour. Pyrrhus print Andromache captiue & l'emmena en Grece, de qui elle eut vn fils nommé Moloffus. Puis fut baillee à Helenus pour femme, avec vne partie du Royaume d'Epire. Voyez Vergile liu. 3. de l'Encide. Strabo liu. 7. Volaterran. lib. 8. & 13.

Or en ceſt endroit ie veuil bien aduertir le lecteur que ie n'ay mis par tout le nombre des annees, & ne l'ay fait ſans cauſe, à ſauoir pour euitter redicte: car pluſieurs choſes ont eſté faiçtes en vn meſme temps: comme il eſt facile d'entendre à vn chacun qui aura tant ſoit peu d'eſprit, que Hector eſtant fils de Priam, eſtoit du temps de Priam, & Priam eſtoit du temps de la guerre de Troye: ainſi recourez à Priam, ou eſt miſe la date des annees.



**THESEVS** fils d'Egeus Roy d'Athenes, commença regner en Athenes en l'an du monde 2730. deuant la natiuité de Iesus Christ 1232. ans. Luy estant imitateur d'Hercules, monta sur mer:meit son cueur en haults faiçts de guerre, dont il esperoit honneur:tua Creon le tyran:puis le grand Taureau qui faisoit grand dommage au païs d'Attique:puis Scyron, Procrustes & Schynis, voleurs. Il fut en guerre avec Hercules contre les Amazones, ou il feit de grâs faiçts-d'armes: print leur Royne Hippolyte laquelle il emmena, & en eut vn fils Hippolyt. Voyez Iustin liu.2.Plutarque en la vie de Theseus:Ouide en ses epistres 4.& 10. Theseus eut tresferme amitié avec Pirithoïs.

**MINOTAVRE** fut fils de Pasiphaë, femme de Minos, & d'un ieune fils nommé Taurus, qui couchoit avec Pasiphaë, quand Minos estoit malade: & pourtant le fils qu'il engendra fut nommé Minotaure, comme ainsi soit qu'il fust reputé fils de Minos, estant toutesfois fils naturel de Taurus. Ce que congnoissant Minos, le chacea & poursuyuit: & contre luy en fin enuoya Theseus, qui prenant l'espee qu'Ariadne luy bailla, tua ce Minotaure:duquel les Poëtes ont fait beaucoup de choses, qu'il estoit demi homme & demi bœuf, enfermé dans le Labyrinthe que Dedalus auoit fait, & là deuoroit les gens que lon luy enuoyoit. Voyez Vergile liu.6.Oui.epistre 10.& Palephat.





MARTHESIE, ou Marpesie, & Lãpedo ou Lãpeto, furent Roynes des Amazones, qui comẽcerẽt à regner en l'an du mõde 2734. auant la natiuité de Iesus Christ 1228. ans. Elles diuiserent leur armee en deux, & l'vne apres l'autre faisoient la guerre, estans ia pleines de bon heur & de biens, & à fin que la gloire & honneur ne deffaillist à ces bonnes yssues de leurs entreprinſes, se vantoyent estre engendrees du Dieu Mars. Elles donques ayans subiugué vne grande partie de l'Europe, prendrent encor quelques villes de l'Asie: là elles bastirent Ephese, & plusieurs autres villes. puis vne partie de leur armee s'en retourna avec grand butin: l'autre partie demoura là avec Marthesie, pour defendre & garder le païs d'Asie: mais icelle Marthesie y fut deffaicte avec sa bande, par vne foule & surprinſe de gens barbares: & sa fille Orithye succeda en son lieu. Voyez Iustin. liu. 2. Oroſe liu. 1. cha. 15.

LAMPEDO, ou Lampeto qui fut Royne des Amazones avec Marthesie, apres grandes victoires obtenues en Asie, & plusieurs villes y edifices, s'en retourna avec partie de l'armee en son païs, pour le garder, car leur coustume estoit telle. Au reste comment elle mourut, ou comment elle fut defaicte, ny de ses autres faiçts ie n'en trouue rien de certain, non plus que Boccace en son liure des Dames de renom. Voyez comme deſſus.



MENALIPPE, sœur d'Orithye & d'Antiope, qui est oyēt toutes deux Roynes des Amazones, fut prinse en bataille par Hercules, & emmenee captiue: mais puis-apres, & bien tost, la rendit à la Roynne sa sœur, prenant les armures d'icelle Roynne, pour rançon. Ainsi Hercules s'en retourna, ayant fait le commandement d'Eurystheus, qui luy auoit donné ceste charge, comme impossible, de luy apporter les armures des Amazones. Voyez Iustin. liu. 2.

HIPPOLYTE, fille de Marthesie, & sœur d'Orithye, Antiope, & Menalippe, fut prinse, en mesme bataille que sa sœur susdicte, par Theseus, qui la print en mariage, & eut d'elle vn fils Hippolyt, qui fut treschaste chasseur. Voyez Iustin liu. 2. la Metamorphose liu. 15. & la 4. epistre d'Ouide.

Or quant à l'origine des Amazones i'en veuil bien toucher icy vn mot: elles sont donc yssues des Scythes, & habiterent en Cappadoce, pres le fleuue Thermoodon: là leurs maris qui auoyent acoustumé de courir sur les frontieres des circonuoi-  
fins, furent accablez & deffaits. Elles adonc que lon vouloit de-  
chacer, oultre ce qu'elles estoyent veuues, prennēt le cœur avec  
les armes, accroissent leur republique sans hommes, appellent  
mariage seruitude. puis, ayans acquis paix avec leurs voisins par  
force d'armes, se font habiter par eux, à ce que leur race ne def-  
faille: les masses qu'elles enfantent, elles tuent: les filles elles  
dressent aux armes, leur brulant le tetin droit, à fin qu'il ne les  
empesche à tirer de l'arc, dont elles ont le nom d'Amazones.



ORITHYE, Royne des Amazones apres sa mere Marthesie, fut grandement estimee en proüesse & chasteté. Elle estât Royne & chef-d'armee en cōquestes hors son país, si tost qu'elle entendit que ses sœurs susdictes auoyent esté prinsees d'assaut, & de surprinse soudaine, par Hercules & Theseus, enhorta ses compaignes à la vengeance: leur remonstre que c'est peu de faict d'auoir subiugué le país du Pont, & l'Asie, si elles se laissoyēt nō tant guerroyer que rapiner par les Grecs. Si prend secours du Roy des Scythes, & s'en va contre les Atheniens, dont Theseus estoit Roy: mais pour quelque dissention qu'il y eut en son camp, auant que combatre fut delaissee du secours, & ainsi combatant avec ses seules Amazones, perdit la bataille: toutesfois ne fut ny tuee ny prinse, ains s'en retourna avec ses Amazones en son royaume. Voyez Iustin liu. 2.

PENTHESILEE fut Royne des Amazones apres Orithye: elle donna secours aux Troyens contre les Grecs, mais apres plusieurs grans faicts-d'armes fut tuee par Achilles, ou (comme les autres dient) par Pyrrhus fils d'Achilles, & son armee deffaicte: si qu'à peine resta la puissance aux Amazones de se defendre depuis contre leurs voisins: toutesfois durerent iusques à Alexandre le grand, vers lequel Thalestris leur derniere Royne alla, sous espoir d'auoir generation de luy, lequel elle salua accompagnée de trois cens femmes, ayant commandé aux autres ne bouger & l'attendre. Si tost qu'elle le veit, descendit de son cheual, tenant deux lances en sa main droicte: ainsi le salua hardiment, & luy declarant la cause de son voyage, coucha avec luy par treize iours. retournée en son royaume mourut en brief, & avec elle le regne des Amazones. Voyez Quinte Curce liu. 6. & cy apres en Alexandre.



**MENELAVS** fils d'Atreus (autres dient de Plifthenes) & d'Europe, fut Roy de Lacedemon en l'an du monde 2758. avant la natiuité de Iesus Christ 1204. Il eut pour femme la belle Heleine, qui fut emmenee premieremēt par Theseus, puis par Paris, quand il alla en Grece pour ramener sa tante Hesione que Hercules auoit prinse en guerre, & donee en mariage à Telamon. Il enuoya ambassades pour rauoir sa femme, & en fin la recouura, par guerre qui dura pres de dix ans: apres lesquels la Troye estant prinse, mōta sus mer, ou il fut l'espace de huit ans, auāt que rentrer en son païs: tant de peine luy fait vne belle femme paillarde. Toutesfois Dictys de Cādie escrit que Menelaüs ne fut point tant fasché de sa femme que de Ethra & Clymene, parentes de luy, que lon auoit emmenees avec elle. Il eut d'elle auant que Paris la rauist, vne fille nommee Hermione. Voyez Dares Phrygien, & Ouide en sa Metamorphose liu. II.

**AGAMEMNON** fut Roy de Mycene en l'an du mōde 2768. avant la natiuité de Iesus Christ 1194. Il fut par le consentement des Grecs le principal chef de l'armee contre les Troyens: il mit sus mer cent soixante vaisseaux luy seul: & en toute l'armee y en auoit plus de mille. A son retour de la guerre, sa femme Clytemnestre le fait tuer par son paillard Egesthus: mais son fils Orestes pour vengeance tua sa mere & son paillard. Voyez Euripide en la Tragedie d'Orestes, Seneque en celle de Agamemnon. Il regna 18. ans, & au premier an fut rauie Heleine.



PARIS, autrement dict Alexandre, fut fils de Priam & de Hecuba. son pere commanda que lon le portast ietter dehors en quelque part, si tost qu'il seroit né, par ce que sa mere enceinte de luy, auoit songé qu'elle enfantoit vn flambeau ardent: toutefois la mere par vne affection maternelle le feit nourrir secrettement entre les bergers sur le mont Ida. En sa ieunesse ayma Enone Nymphes, de laquelle il eut deux fils. Puis estant recongnu & receu de ses parens, alla en ambassade en Grece pour rauoir Hesionne: & lors raut Heleine, & l'emmena à Troye en l'an du monde 2768. auant la natiuité de Iesus Christ 1194. dont vint la guerre des Grecs contre les Troyens. Herodote liure 2. escrit que Paris par force l'emmena, elle n'y consentant point, & qu'il print, par armes, Sparte, la ville ou elle estoit, autrement dicte Lacedemon: & que pourtant elle merita que son mari feist guerre pour la rauoir. Paris tua Achilles d'un coup de fesch: & luy aussi fut tué de Pyrrhus, fils d' Achilles. Voyez Dares & Dictys.

HELEINE, fille de Iuppiter & de Leda, fut premier emmenee bien ieune par Theseus: mais tost apres Castor & Pollux freres d'elle, l'allerent querre, & fut mariee à Menelaus. Paris puis apres, soit de bon gré, soit de mal gré d'elle, la print & emmena, & eut pour femme. Lon dit qu'elle fut consentant à la trahison par laquelle Troye fut surprinse, & qu'elle alluma, pour signe, le flambeau en la tour, & retourna en grace avec Menelaus son premier mari: apres la mort duquel elle fut fugitiue vers Polipe, & là fut en vn vergier pendue & estranglee par les Damoisselles de ladicte Polipe. Voyez les Illustr. de Gaule liu. 2. cha. 23. Du temple & image ou statue d'Heleine, voyez Herodote liu. 6.



VLYSSES fils de Laërtes & d'Anticlie, l'un des plus fins & sages Grecs qui furent en la guerre de Troye, du commencement feignoit estre fol à fin de n'y aller point, pour ne laisser sa femme ieune, qu'il ayroit bien : toutesfois, sa feintise & finesse descouverte par Palamedes, fut contraint d'y aller. Luy descouvert, descourit aussi Achilles, qui estoit déguisé en habit de fille entre les filles du Roy Lycomedes, ou sa mere l'auoit mis & caché, à fin qu'il n'allast à la guerre, ou elle auoit sceu qu'il deuoit perir. Vlysses alla donc en icelle guerre avec Achilles & autres, & partit d'Ithaque montant sus mer avec quarante siens vaisseaux, en l'an du monde 2 7 7 3. auant la natiuité de Iesus Christ 1 1 8 9. ans. Il fait donc en ceste guerre tant de choses grandes tant par fraude que par vertu, que la plus grand' part de la victoire luy est attribuee. Apres la Troye prinse, fut encor dix ans sus mer auant que retourner en son pais : ou quand il fut de retour, print vengeance finement des braues amoureux, qui faisoient la court à sa femme. En fin fut tué par son fils Telegonus, qu'il auoit eu de Circe, lequel ignoroit que fust son pere. Voyez Homere en son Odysee, & Vergile en son Eneide.

PENELOPE, fille d'Icarius & de Peribee, fut femme de Vlysses renommee de grande chasteté, combien que Lycophron en escriue autrement. Elle belle ieune dame attendit son mari l'espace de vingt ans, & ne la peut-on onques faire remarier, iacoit que force amoureux, & son pere mesme à ce la contraingnissent: mais les abusoit par certaine finesse, comme lon dit. Voyez la 1. epist. d'Ouide.



**A CHILLES** fils de Peleus, Roy de Theffalie, & de The-  
tis, fut estimé le plus fort de tous les Grecs, en son adolescence  
sa mere le mit & cacha, comme i'ay dit, entre les filles du Roy Ly-  
comedes, vestu de mesme (mais par Vlysses fut découuert) & en-  
tre les dictes filles luy vestu d'habit de fille, se ioua si bien qu'il en  
engroiffa l'une, à sauoir Deïdamie, & engendra Pyrrhus. Da-  
uantage estant en la guerre, desista de batailler pour l'amour de  
Briseïs, ieune dame, qui parauant estoit dicte Hippodamie, la-  
quelle il auoit prinse à l'assault de Lyrnese, & luy auoit esté or-  
donnee pour sa part du butin: toutesfois luy auoit depuis esté  
tollie par Agamemnon. mais quand il sceut la mort de Patroclus  
son grand amy, reprint les armes, & tua Hector qui auoit tué Pa-  
troclus: puis luy-mesme fut tué par Paris, qui luy trauersa le pied  
d'une sagette, lors qu'il estoit au temple d'Apollo à genoux, n'y  
pensant point, ains seulement à ses amours, & au mariage &  
traicté de nopces d'entre luy & Polyxene. Voyez Homere en  
son Iliade, & Vergile au 2. liu. de l'Éneide.

**POLYXENE** fille de Priam & de Hecuba, pleine de  
grande beauté, fut tuee par Pyrrhus au tombeau d'Achilles pour  
appaïser l'ame dudit Achilles son pere, qui auoit esté tué au tem-  
ple ou il pensoit la prendre en mariage. Car lon tient qu'Achil-  
les la voyant sus les murs de Troye, fut esprins de son amour, &  
la demanda pour femme, & son pere Priam luy ottroya: si qu'ils  
vindrent au temple d'Apollo pour traicter de la paix, & de ce  
mariage: mais le fol Paris troubla tout. Voyez comme dessus.



**NAUPLIVS** Roy de l'isle Euboëe, que lon dit à present Negrepont, fut pere de Palamedes, lequel pour vengeance de la mort de sondict fils, qui estoit mort par la faulse accusation de Vlysses, incita les dames de Grece à paillarder avec les ieunes gens, en absence de leurs maris qui estoyët à la guerre de Troye: estimant qu'à leur retour s'entretueroyent les vns les autres, pour cause des adulteres de leurs femmes. Dauantage s'en alla sur le mont Caphareus, ou il feit allumer des flambeaux quand il sentoit le retour des Grecs, lesquels, pour la plus grande partie, voyans ce feu de nuict, tirerent en celle part, comme pensans aborder au prochain port, & furent peris entre les rochers ou bancs, & sables de mer. Puis luy-mesme se ietta en la mer, de dueil qu'il eut qu'Vlysses & Diomedes, desquels sus tous il desiroit la perte, en estoient sortis à sauueté. Voyez Homere, Vergile, & Ouide en plusieurs lieux.

**PALAMEDES** fils de Nauplius inuenta, comme lon dit, quatre lettres grecques, & l'ordre d'un camp, avec le mot du guet, & les sentinelles pour veiller à l'exemple des grues: plus inuëta les iettons (aucuns diët les tables à iouer) les eschecs, les dez, les poiz & mesures. Aussi accommoda l'an au cours du Souleil, & les moys au cours de la Lune. En fin fut faulusement accusé par Vlysses, au camp, & illec lapidé. Voyez cōme dessus. & Rhodig. liu. 20. cha. 27. & liu. 7. cha. 31. & li. 20. cha. 30. Volat. liu. 18. Pli. liu. 7. cha. 56. Lon dit qu'Homere par enuie déchira ou brula les Poésies de Palamedes.





**IEPTE** fils illegitime de Galaad, fut iuge du peuple d'Israël en l'an du mode 2787. auãt la natiuité de Iesus Christ 1175. ans. Il batailla contre les Ammonites, qu'il vainquit par grande grace & faueur de Dieu. Il auoit toutesfois fait vn vœu assez sottement, c'est que le premier qu'il rencontreroit apres la victoire (si Dieu la luy donnoit) il le sacrifieroit à Dieu : & aduint qu'il rencontra sa propre fille, dont fut fort dolent, & déchira ses habits de despit, ce nonobstant la sacrifia deux mois apres, lesquels elle requist & obtint pour pleurer & plaindre sa virginité. Voyez le liure des Iuges 11. & 12. cha. Iosephe liu. 5. des Antiquitez, cha. 12. Iephté fut Iuge par l'espace de six ans.

**ABESAN**, de Beth-lehem, apres la mort de Iephté fut Iuge sus Israël par sept ans. Il eut trente fils, & trente filles, & maria tout: mais ne retint les filles en sa maison, & si fit bien ses fils avec leurs femmes. Voyez le liu. des Iuges cha. 12. Iosephe liu. 5. cha. 12. Rabbi Salomon, & le paraphraste Chaldeen, dient que cestuy Abezan est Boos.

Après Abesán, Elon de la lignee de Zabulon, fut Iuge par dix ans : & apres luy Abdon, de la lignee d'Ephraim, par huit ans : & puis Samson, duquel parleray cy-apres.



**L A T I N V S** Roy de Laurentes, fils de Faunus & de Marica, donna la main droicte en signe de foy & amitié à Eneas nouveau venu, soit que ledict Latinus fust ia vaincu par Eneas, soit que seulemēt il fust faict certain quel personage c'estoit que Eneas, deuāt que les trompettes sonnassent pour le combat. Puis ledict Roy luy bailla sa fille en mariage, combien qu'elle fust premierement promise à Turnus Roy des Rutules, comme i'ay dit cy deuant. Amata femme de Latinus se pendit de regret que sa fille Lauinia estoit mariee à Eneas: & Latinus mourut en guerre pour les Troyens contre Turnus, l'an du monde 2787. auant la natiuité de Iesus Christ 1175. Voyez Denis de Hali. & Tite Liue liu.1. & Vergile liu.12. de l'Encide.

**L A V I N I A** fut la seconde femme d'Eneas, apres la mort duquel fut tutrice d'Ascanius, qui puis apres luy donna Lauinium, ia florissante & opulente ville: & luy s'en alla bastir vne autre au mont Alban, laquelle il nomma Albe-longue, par ce qu'elle estoit estendue en long, au flanc de la montaigne.

Lauinia estoit enceinte quand son mari Eneas mourut, & enfanta Syluius-Posthumus tiers Roy des Latins, ainsi nommé à cause qu'apres la mort de son pere il fut né & nourri es forests: ou lon dit que sa mere s'estoit retiree pour crainte d'Ascanius, ce qu'il n'estoit besoing de faire, car il la traicta humainement. Voyez comme dessus.



**E N E A S** fils d'Anchises & de Venus, fut gendre de Priam. Vergile le décrit belliqueux, vertueux & humain, en faueur de Auguste, car autrement en dient d'autres auteurs dignes de foy. Lon dit qu'il porta son pere sus ses espauls pour le deliurer du feu de Troye, & qu'en la presse & confusion il perdit sa femme Creusa: puis nauigua en Italie, ou il vainquit Turnus en guerre, & print Lauinia fille du Roy Latinus, à femme, qui auoit esté premier promise à Turnus: puis edifia vne ville qu'il nomma Lauinium, du nom de sa femme: en l'an du monde 2788. auant la naissance de Iesus Christ 1104. ans. Quant est de ce que lon dit de Dido & Eneas, ie n'en parle, comme estimant estre chose fabuleuse: aussi de sa mort ie n'en trouue rien de certain: les historiens dient, que trois ans apres qu'il eut regné sus les Latins, apres la mort de son beau-pere Latinus, il eut grosse bataille contre les Rutules & Hetrusques, en laquelle d'une part & d'autre y eut grande défaiçte, & que lon ne peut onc trouuer Eneas entre les morts, & depuis ne fut veu: qui fut sept ans apres la destruction de Troye. voyez Denis de Halicarnas, & Tite-Liue, tous deux en leurs premiers liures.

**T V R N V S**, Roy des Rutules, cousin germain du Roy des Latins, ayant dueil qu'Eneas estrangier luy estoit preferé, fait guerre à tous deux, & en fin fut vaincu par Eneas en combat particulier d'homme à homme. Voyez comme dessus, & Verg. lib. 12. de son Eneide.



**ORESTES** fils d'Agamemnon & de Clytemnestra, apres que son pere eut esté tué par Egisthus, tua ledict Egisthus & sa mere qui y auoit consenti (comme i'ay dit cy dessus en parlant d'Agamemnon) & fut Roy de Mycene la grande apres son pere, en l'an du monde 2789. deuant la natiuité de Iesus Christ 1173. ans. Il tua aussi Pyrrhus fils d'Achilles, qui tenoit par force Hermione pour sa femme, & toutesfois auoit esté premier promise audict Orestes. Lon dit que pour tels homicides il deuint furieux & hors du sens, & ainsi couroit le pais: mais il eut vn vray-loyal ami Pylades, qui iamais ne l'abandonna: & ces deux s'entr'aymerét tant qu'ils voulurét bien mourir l'vn pour l'autre, comme Nysus & Eurialus en Vergile. Quand Orestes fut paruenue en la region Taurique, il trouua sa soeur Electra, & estant retourné en son bon sens, s'en vint avec elle en Italie. Voyez Sophocles en la Tragedie d'Electra, & Euripides en celle d'Orestes, & Cicero au li. de l'amitié, & au ij. li. des fins. Ouide, epistre viij.

**HERMIONE** fille de Menelaus & d'Heleine, fut premier baillee en mariage à Orestes, par Tyndarus ayeul maternel d'icelle: & ce fut du temps que son pere Menelaus estoit au camp deuant Troye, lequel ignorant de ce, la promit à Pyrrhus fils d'Achilles: qui à son retour l'emmena bon gré malgré: ce qui fut cause de sa mort: car Orestes le tua au temple d'Apollo, par l'ayde & faueur du prebtre Macareus. Voyez comme dessus.



ASCANIVS fils d'Eneas, fut Roy des Latins apres la mort de son pere, en l'an du monde 2789. avant la natiuité de Iesus Christ 1173. ans. Qui estoit l'an mesme qu'Orestes fut Roy de Mycene. Il a esté nommé Ascanius, du nom d'un fleuve de Phrygie: & puis Ilus, du nom d'un Roy des Troyens: & encor Iulus, à cause de sa premiere barbe follette. En son bas aage vne flamme de feu apparut sus sa teste sans le bruler: qui estoit presage, qu'il seroit quelquefois Roy: ce qu'il fut, comme aussi depuis nous lisons que le semblable aduint à Seruius Tullus en Romme, du temps de Tarquinius Priscus. Ascanius donc regna 25. ans en Lauinium, puis la donna à sa marastre Lauinia, de qui la ville portoit le nom: & luy s'en alla bastir Albe-longue: comme i'ay dit cy dessus, en parlant de Lauinia. Il fit son successeur au royaume, Sylvius Posthumus, son frere de par pere: à cause que son fils Iulus estoit encor trop ieune pour gouverner. Ascanius regna 38. ans à prendre tout, à sçauoir tant en Lauinium qu'en Albe-lōgue: & du nom de son fils Iulus, la maison & famille des Iules de Romme est procedee. Voyez Eutrope augmenté. Denis de Halicarnas, & Tite-Liue en leurs premiers liures.

SYLVIVS Posthumus fils d'Eneas & de Lauinia, regna sus les Latins apres son frere Ascanius, en l'an du mōde 2827. avant la natiuité de Iesus Christ 1135. ans. Son regne fut de 29. ans: durant lequel, Homere viuoit. Voyez comme dessus, & Casiodore.



SAMSON fils de Manué, de la lignee de Dan, fut Iuge du peuple d'Israël apres Abdon, par l'espace de 20. ans, commençans en l'an du monde 2818. deuant la natiuité de Iesus Christ 1144. ans. Il fut hōme tresfort, & mit en pieces à belles mains, le lion qu'il rencontra, comme si c'eust esté vn cheureau. Quelques iours apres trouua dedans la gueule de ce lion vne troupe de mouches à miel, avec vn rayon de miel. Il attacha des brandons de feu, à la queue de trois cens renars, & ainsi brula les blez des Philistins qui luy auoyent emmenee & ostee sa femme: & aussi en tua mille d'vne machoire d'asne. Quand il estoit en Gaza enuironné des gardes, à la porte de la ville, se leua à la minuit, & vint arracher les deux huis de la porte avec leurs poteaux & ferrures, puis les charge sus ses espauls, & les emporte au coupeau d'vne montaigne. Il deliura les enfans d'Israël de la subiection des Philistins. Voyez le liure des Iuges 14. & 15. ch. Iose. des Anti. li. 5. cha. 13. Apres Samson Heli fut Grand-prestre & Iuge du peuple par 40. ans: & apres luy Samuel.

DALIDA, ou Dalila, fut vne paillardes que Samson ayma: & la meschante le trahit, sous promesse d'argent, faicte par les Philistins, qui le prindrent, luy creuerent les yeux, & le feirent prisonnier: puis le manderent venir iouer deuant eux, pour se gaudir de luy: mais quand il fut venu, il fit son oraison à Dieu, disant: *Seigneur ie te prie, aye memoire de moy, & fortifie moy seulement ceste foys, & ie me vengeray maintenant des Philistins.* Puis il print les deux piliers de la sale avec ses deux mains, & la maison tomba sur eux & sur luy, ou moururent enuiron trois mil Philistins, que hommes, que femmes. Voyez le liu. des Iuges cha. 16.



BRVTVS fils de Syluius, qui estoit fils (les autres dient frere) d'Ascanius, chacea de grās, cruels & sauuages hōmes hors de leur habitation, & nomma de son nom ceste isle-là, Britānie, qui est Angleterre, laquelle au parauant estoit nommee Albion, du nom d'Albine, fille d'un Roy de Syrie, laquelle estoit là arriuee, apres auoir esté dechacee de son pere, avec trente deux de ses sœurs, dont chacune auoit tué son mari. Ce Brutus eut trois fils, qui constituerent trois royaumes: le premier fut Locrus, qui nomma son païs & royaume, Locrie, ou est Londres: le second Camber, qui nomma son païs Cambrie, ou est Cambre, depuis dicte Vuallia, & Lyfé, que lon veult dire Galles: le tiers fut Albanatus, qui nomma son païs Albanie, depuis dicte Escocce. Le premier suruesquit à tous ses freres, & fut seul iouissant de toute Angleterre: auquel succeda Maddan, qui y regna par quarante ans. Ce Brutus regnoit enuiron cinquante ans apres la destruction de Troye, à sauoir enuiron l'an du monde 2832. auant la naissance de Iesus Christ 1130. ans. Voyez Raphaël Volaterran en sa Geographie, liure tiers, des peuples & Roys d'Angleterre.

IGNOGNE fille de Pandrasus, Roy de Leo-grece, fut femme de ce Brutus, delaquelle il eut les trois enfans susdicts. Voyez la Chronique des Chroniques, & le Supplement des Chroniques, liure 4.



HOMERE, Poëte Grec tresrenommé, Poëtisoit enuiron l'an du monde 2838. auant la naissance de Iesus Christ 1124. ans, selon Cassiodore: Car Cornelius Nepos le dit auoir esté en l'an du monde 3051. deuant que Romme fust bastie 160. ans. Plutarque dit qu'il fut du temps de la guerre de Troye, & aucuns escriuent qu'il y estoit: autres le remettent à 100. ans, & autres encor à 150. ans apres. Sa mere l'enfanta aupres du fleuue Meletes, dont il fut nommé Melesigenes, & depuis Homere, quand il deuint auetugle. Il a escrit en vers, deux liures principaux, à fauoir l'Iliade, qui contient la guerre des Grecs pour le recouurement d'Heleine, & principalement les proïesses, d'Achilles: & l'Odysee, qui décrit le voyage & retour d'Vlysses, de la guerre de Troye en son païs. Je trouue qu'Homere mourut de grãd regret qu'il eut de n'auoir peu declarer cest enigme que d'aucuns pescheurs luy proposerent: *Ce que nous auons prins, nous l'auons laissé: & ce que nous n'auons prins, nous le portons.* Voyez Plutarque en la vie d'Homere.

HESIODE Poëte, fut peu plus ancien qu'Homere, toutesfois du mesme temps, & de mesme parentage. Herodote, qui viuoit en l'an du monde 2520. & auant la natiuité de Iesus Christ 1442. a escrit que tous deux l'ont precedé de 400. ans, & non plus. Hesiodo estoit d'un village de Beotie, nommé Ascra. il a esté le premier qui a escrit de l'agriculture en vers, & Vergile l'a imité en ses Georgiques. De sa mort miserable, & comment il fut tué par quelques ieunes gens de Locres, voyez Plutarque au conuiue des sept sages.





SAMVEL fut Iuge du peuple d'Israël apres Heli , en l'an du monde 2878. auant la naissance de Iesus Christ 1084. ans. Anne sa mere qui auoit esté long temps sans auoir enfans , pria tant Dieu qu'elle cōceut, & enfanta cestuy : & pourtāt il fut présenté & offert à Dieu, au temple, par son pere Elcan, & par sadi-cte mere. Du temps de sa Iudicature, qu'il tint par l'espace de 12. ans, selon les Hebreux, à sauoir iusques à Saul, premier Roy, les Philistins rendirent l'arche de Dieu. Il ne se laissa point corrompre par dons, & n'en print aucunemēt: & pourtāt tous Iuges, y doiuent prendre exemple. Il cōstitua ses fils Ioël & Abia Iuges, luy estāt en sa vieillesse, mais eux s'addōnans à l'auarice, & receuans les dons, corrompoient & vendoyēt leurs iugemens: parquoy les maieurs du peuple demāderēt à Samuel vn Roy, qui leur administrait iustice, à la maniere des autres nations, ce qu'ils obtindrent: Car Saul fut oinct Roy par Samuel, Dieu le commandant ainsi, à l'instance & importunité du peuple. Voyez le 1. liure des Roys, iusqu'au 9. cha. Iosephe liu. des Anti. 5. chap. 15.

SAVL fut premier Roy d'Israël, l'an mesme que Samuel constitua ses fils Iuges, qui fut l'an du monde 2889. auant la natiuité de Iesus 1073. ans. Il estoit plus hault que tous ses subiects depuis les espaules en dessus: & si tost que le peuple le veit, crierēt *Vive le Roy*. Il vainquit les Ammonites & Philistins: mais sacrifiant contre le commandement de Dieu, sans attendre Samuel, qui estoit souuerain sacrificateur, fut reiecté de Dieu. Aussi cōtre le cōmandemēt de Dieu, apres auoir vaincu les Amalecites, reserua leur Roy, & le butin. il maria sa fille Michol à Dauid. en fin, vaincu par les Philistins, se tua de ses propres mains, de peur d'estre tué par eux. regna deux ans. Voyez tout le 1. liur. des Roys, qu'aucuns diēt 1. li. de Samuel. Voyez aussi Iose. li. 6. ch. 4.



**DAVID** fils de Iesse, autrement dict Isai, regna sus la lignee de Iuda en Hebron, l'an du monde 2891. auant la natiuite de Iesus Christ 1071. an: du temps qu'Isboseth fut aussi Roy d'Israël. David regna sus les lignees de Iuda & Ben-jamin en Hebron sept ans & demi, & puis sus les autres dix lignees, & sus tout le peuple d'Israël, 33. ans. Luy estant Ieune enfant, comme il gardoit les brebis de son pere, tua vn lion, & vn ours, les prenant par la gueule: parquoy ne se deffia point que Dieu ne luy aydaist à déconfire Goliath, le Geant, qu'il tua d'vn coup de pierre ietee d'vne fonde. Le Prophete Nathan le reprint d'homicide, car il auoit fait tuer Vrie, le mari de Bethsabee, laquelle il print en mariage, apres auoir iouy d'elle du viuant de son mari. Dieu luy denōcea per le Prophete Gad, pource qu'il auoit nombré son peuple, trois sortes de punition: ou famine par sept ans, ou trois moys estre en fuite par ses ennemis, ou trois iours de pestilence, laquelle il eleut, & en moururent septante mil. Il enhorta le peuple & son fils Salomon à edifier le temple, dont il bailla la description, & les choses necessaires. Voyez le 2. liu. des Roys cha. 11, & les cha. suyuant. Iosephe liu. de Antiq. 6. cha. 10.

**SALOMON** fils de David & de Bethsabee, fut Roy d'Israël en l'an du monde 2931. auant la nati. de Iesus Christ 1031. an. il demāda à Dieu sapiēce, & luy fut ottroyee. Il eut pour l'edification du tēple septāte mil maneures, ou porte-fais, huiētante mil massons, & 3300. maistres & gouverneurs de l'œuure: il dist 3000. paraboles: cōposa 5000. vers: son reuenu estoit 666. talēs d'or, sans conter les gabelles. le talent d'or valoit enuiron 5000. escus. Voyez le 3. li. des Roys cha. 4. iusques au 10. & Iose. li. 8. Il eut des femmes cōme Roynes 700. de cōcubines 300. pour aux quelles cōplaire (car elles estoient de la race des Gentils) deuint idolatre: parquoy les dix lignees d'Israël furent ostees à son fils. Il regna 40. ans.



ROBOAM, fils de Salomon & de Naama fille de Pharaon, apres la mort de son pere fut Roy sus les enfans d'Israël qui habitoient aux villes de Iuda, en l'an du monde 2971. deuant la natiuité de nostre sauueur Iesus Christ. 991. an. Les dix lignees se departirent de luy, pour cause de l'idolatrie de son pere, comme nous auons dit: & feirent Ieroboam fils de Nabat, leur Roy: & à Roboam resterent seulement les deux lignees, Iuda & Ben-iamin. Il desprisa le conseil des anciens, & creut le conseil des ieunes gens, qui luy conseillerent respondre fierement au peuple, qui le prioit, de diminuer les charges, & imposts: & adonc les dix lignees se retirerent de son obeissance: pour à laquelle les ramener leua quatrevingts mil hommes, disant que ces dix lignees estoient subiettes de luy, vray fils & heritier de Salomon: mais Dieu leur defendit de batailler, disant que telle separation venoit de sa permission, comme il auoit predict par son Prophete Ahia. Il regna 17. ans, & à luy succeda son fils Abia, ou Abiam. Voyez le 3. liu. des Roys, 11. 12. 13. 14. cha. & le 2. li. de Paralipomenon, cha. 10. 11. 12. Iosephe 8. liu. des Antiquitez cha. 7. & 8.

SESAC Roy d'Egypte vint en armes cõtre Ierusalem, cinq ans apres que Roboam y commença regner: entra dedans, print & pilla les tresors de la maison de Dieu, qui estoit le temple de Salomon, & print aussi les tresors du Roy, & tout ce qu'il peut: ainsi s'en retourna en Egypte avec tout ce riche butin. Il auoit en son armee mil deux cens chariots, & soixante mil hommes-de-cheual. Voyez comme dessus.



AHIAS Silonite, Prophete, predist à Ieroboam que les dix lignes se rendroyent à luy: car prenant sa robe lōgue, & neuue, dont il estoit vestu (i'enten ledict Ahias) il la couppa ou déchira en douze pieces: puis dist à Ieroboam, pren pour toy dix de ces pieces de ma robe. Car voicy ce que le Seigneur, Dieu d'Israël, dit: *Je mettray en pieces le royaume de Salomon, & t'en donneray les dix lignes.* Voyez le tiers liure des Roys, II. chap. Iosephe liure des Antiquitez 8. cha. 7.

IEROBOAM, fils de Nabat, fut Roy en Israël, sus les dix lignes l'an mesme que Roboam sus les deux, comme auez veu en la page precedente. Il feit faire deux veaux d'or, pour retenir & diuertir le peuple, à ce qu'il ne mōtast en Ierusalem, pour adorer au temple de Salomon: & de crainte que par ce moyen le peuple fust soustraiēt, & ne l'abandonast, pour se rendre & reioindre à Roboam qui regnoit en Ierusalem. Ainsi pour son ambition, & conuoitise de regner, instruisit son peuple en idolatrie: car il mit ces veaux en public pour estre adorez, criant: *Ne vueillez cy-apres monter en Ierusalem, voici tes Dieux, o peuple d'Israel, lesquels t'ont deliuré de la captiuité d'Egypte.* Il estendit sa main sus le Prophete pour le battre, & elle luy deuint seche, & roide, si qu'il ne la peut retirer: mais à la priere du mesme Prophete, elle retourna saine comme deuant. en fin fut vaincu par le fils de Roboam: regna 22. ans, & à luy succeda son fils Nadab. Voyez le 3. liu. des Roys II. 12. 13. & 14. cha. Iose. des Anti. liu. 8. cha. 8. 9. & 11.



**ABIA**, ou Abiam, fils de Roboam, & de Maacha fille d'Abessalom, succeda à son pere au royaume de Iuda, en l'an du monde 2988. auant la natiuité de Iesus Christ 974. ans. Il fut meschât, & enfuyuit les vices de son pere: toutesfois à la priere de ses gens-de-guerre, vainquit Ieroboam. Lors furent defaits cinquante mil hommes des plus forts d'Israël. Car fault entendre que le peuple de Dieu estoit diuisé en deux royaumes, à-sauoir de Iuda & d'Israël, ou de Ierusalem, & de Samarie, iacoit que la ville Samarie fust bastie depuis, par Amri, comme verrez: le premier Roy iouïssoit de deux lignees, Iuda & Ben-jamin: & le second, des dix autres. Abia regna pres de trois ans. Voyez le 3. liure des Roys 15. cha. & le 2. liu. de Paralip. cha. 13. Iosephe liu. des Anti. 8. cha. 11.

**ASA**, fils d'Abia, succeda à son pere au royaume de Iuda en l'an du monde 2990. auant la natiuité de Iesus Christ 972. ans. Il fut bon Roy deuant Dieu & les hommes: rompit & abbatit les idoles, & leurs autels, & leurs bois ou boccages: commanda à son peuple de chercher & adorer le Seigneur, Dieu de ses peres, & d'accomplir la loy, & tous les commandemens. Il eut de la lignee de Iuda trois cens mil hommes-de-guerre, & de Ben-jamin deux cens cinquante mil, tresforts & vaillans: contre lesquels Zara le Roy d'Ethiopie, vint avec vn million d'hommes: mais le Roy Afa ayant inuoqué Dieu en son aide, les mit en route, & puis à mort. Apres fait paix avec Benadab le Roy de Syrie, craignant Baasa le Roy d'Israël: dont fut reprins par le Prophete Hanani, qui en fut mis aux fers. En fin Afa malade d'une grand' douleur de pieds, chercha plustost secours aux medecins qu'à Dieu. Voyez le 3. liu. des Roys 15. chap. le 2. liu. de Paral. 14. & 15. cha. Iosep. liu. 8. cha. 12.



**N A D A B**, fils de Ieroboam, succeda à son pere au royaume d'Israël, la seconde annee du regne du Roy Afa, dont auons parlé cy dessus, qui estoit en l'an du mōde 2 9 9 2. auant la natiuité de Iesus Christ 9 7 0. ans. Il fut meschant, & bien ressemblât à son pere, & ne regna gueres: fut occis par Baasa, l'an troisieme du regne d'Afa: & le meurdrer qui le tua, vsurpa son royaume. Voyez le tiers liure des Roys, cha. 14. & 15.

**B A A S A**, meurdrer du Roy Nadab, & puis vsurpateur de son royaume, regna apres luy sus Israël 2 4. ans, commenceans en l'an du monde 2 9 9 2. auant la natiuité de nostre sauueur Iesus Christ 9 7 0. ans. qui fut l'annee mesme que regna Nadab, cōme auez veu cy dessus. Luy donc ayāt acquis le royaume par meurdre & homicide commis en la personne du Roy, poursuyuit sa destinee: car il mit à l'espee toute la race & generation de Ieroboam. Il fait guerre contre le Roy Afa, & estant en armes contre le pais de Iuda, enuironnoit de murs Rama, petite ville, à ce que personne ne peust passer du royaume de Iuda, au royaume d'Israël: dont Afa fort troublé enuoya des presens à Ben-adab Roy de Syrie, luy demandant secours, comme i'ay dit en parlant du Roy Afa. En fin le Prophete Iehu predist à Baasa la ruine de luy, & des siens, pour cause d'idolatrie, comme à la maison & famille de Ieroboam. son fils Ela luy succeda. Voyez le tiers li. des Roys 15. & 16. cha. Iosephe 8. liu. des Antiq. cha. 12.



EL A, fils de Baafa, apres la mort de son pere regna en Israël, l'an vingtsixième du regne du Roy Afa, & l'an vingtseptième fut tué tout yure qu'il estoit, par Zambri, chef & conducteur de la moitié de sa gen-d'armerie. Ce Zambri incontinent vsurpant le royaume, mit à mort toute la race de Baafa. le peuple entendant ce fait, éleut, & constitua vn autre Roy nommé Ambri, qui assiegea Zambri en la ville de Therfa. mais voyant Zambri que la ville s'en alloit prinse, entra au palais, & se brula avec la maison royale. Ainsi luy, qui par tyrannie auoit obtenu le royaume, exercea aussi la tyrannie contre luy-mesme, le septième iour de son regne. Voyez comme dessus.

AMRI, que Iosephe appelle Amarin, fut Roy en Israel, en l'an du monde 3016. auant la nati. de Iesus Christ 946. ans. & fault sauoir qu'apres Zābri le peuple fut bandé en deux parts, l'vne fauorisoit à Thebni, l'autre à Amri. ceste dissension dura quelques annees, mais en fin ceux du parti d'Amri gaingnerent, & Thebni mourut. Ainsi le royaume demoura à Amri, au regne duquel sont adioustez les ans de ceste diuision & partialité, car lon compte de son regne douze ans. Il acheta le mont de Samarie de Somer (Iosephe l'appelle Samarus, dōt est dicte Samarie) pour deux talents d'argent : là il edifia la ville de Samarie, qu'il constitua siege & chef du Royaume : & habita six ans en Therfa, & le reste en Samarie. Voyez comme dessus, son fils Achab, meschant comme luy, luy succeda.



**A C H A B** regna sus Israël l'an 38. du regne d'Afa, qui estoit l'an du monde 3 0 2 7. auant la naissance de Iesus Christ 9 3 5. ans. Il tint son siege Royal en Samarie 2 2. ans, & passa tous les autres Roys precedens en impieté & idolatrie : espousa Iezabel, fille du Roy des Sidoniens, & dressa vn autel à Baal, au temple de Baal qu'il auoit edifié en Samarie, & adora iceluy Baal. Le Prophete Elie luy predist la famine qui dura trois ans. Puis Achab le rencontra, & luy dist, *N'es tu pas celuy qui troubles le peuple d'Israel? à quoy Elie respond: Je n'ay point troublé Israel, mais toy, & la maison de ton pere, qui auez delaisé les commandemēs de Dieu, & auez ensuyui Baal.* En apres quand le miracle fut fait sus le sacrifice de Elie, furent par le commandement dudit Prophete tuez tous les prebstres de Baal abuseurs, au nombre de 450. Achab vainquit par deux fois Ben-adab, mais à la tierce, bataillant mesme en habit déguisé, fut nauré d'vne flèche, par cas fortuit, & de ce coup mourut. Voyez comme dessus.

**I E Z A B E L** femme d'Achab mal-heureuse idolatre, fauorifant aux faux-prophetes de Baal, menassoit Elie de mort, & pour cause de telles menaces il s'enfuit. Elle machina aussi la mort de Naboth qui fut lapidé, & luy forgea des faux-tesmoins qui luy maintindrent qu'il auoit mal parlé de Dieu & du Roy. La source de ce mal venoit, que Naboth ne voulut bailler sa vigne au Roy, qu'il auoit euë de ses pere & mere. Voyez le 3. li. des Roys, chap. 19. & 21. Iose. li. 8. cha. 13. de sa fin voyez cy-apres en Iehu, qui la feit ietter du hault d'vne fenestre, & le 4. liure des Roys chap. 9.





ELIE Prophete florissoit du temps d'Achab & Ochofias, Roys d'Israël: il estoit homme velu, ou pelu, & portoit vne ceinture de cuir: fut grand zelateur de l'honneur de Dieu: fait plusieurs miracles de renō que chacū sçait: car quel besoin est-il reciter ici amplemēt, cōmēt au desert il fut repeu par les corbeaux? & puis par les Anges? cōment à sa priere Dieu enuoya la pluye? & n'auoit pleu de 3. ans, 6. mois. Comment il reprint, & tua les faux-prophetes, & seduēteurs? comment deux cinquateniers avec leurs cinquante hommes, enuoyez pour le prendre, furent brulez du feu du ciel? comment il separa l'eau du fleuve Iourdain avec son manteau dont il batoit l'eau, & se fit voye par la riuiere? & pour le dernier, comment il fut transporté au ciel dans vn chariot ardent, tiré par cheuaux de feu? Voyez le 3. liure des Roys depuis le 18. cha. iusqu'en fin, & Iosephe liu. 8. cha. 12. l'Eccl. 48. chap. S. Iac. cha. 5.

ELISEE fils de Saphat, par le commandement de Dieu fut oinct comme Prophete par Elie, pour audict Elie seruir, & à luy succeder. Elie le trouua comme il labouroit aux champs: ainsi de l'estat de labourage fut appelé pour estre Prophete. il demanda à Dieu qu'il luy donnast l'esprit d'Elie au double: il resuscita le fils de son hostesse: guerist de ladrerie Naaman le Syrien, & n'en voulut prendre payement ny salaire aucun. Sa vie, & ses miracles dont il resplendissoit, ie ne veux & ne puis ici poursuiure au lōg. Voyez le 4. liu. des Roys, dés le 1. cha. iusque'au 13. Vn homme mort fut ietté au sepulchre d'Elisee, & resuscita ayant touché ses os.



**I O S A P H A T** fils du Roy Afa, regna en Iuda l'an 4. du regne d'Achab, Roy d'Israël: qui estoit l'an du monde 3 0 3 1. avant la natiuité de Iesus Christ 9 3 1. an. Il regna 2 5. ans, & se monstra vray fils d'Afa, fut bon Roy gardât l'honneur de Dieu: mit sus mer des nauires pour singler en Ophir, & querir de l'or: les Philistins luy apportoyent des presens, avec tribut d'argent: les Arabes luy amenoyent force troupeaux de bœufs, moutons, & autres bestes, il bastist maints grans edifices en forme de palais & chasteaux. Le 3. an de son regne, enuoya gens par toutes les villes de son Royaume pour endoctriner le peuple, avec le liure de la loy de Dieu: & y ordōna par tout des Iuges, auxquels il disoit ainsi: *Aduisez bien à ce que vous ferez, car vous n'exercez pas le iugement des hommes, mais de Dieu: & tout ce que vous iugerez retournera sur vous.* Contre luy s'eleuerēt les Ammonites & Moabites, qui se retournans eux mesmes contre eux, s'entretuerent les vns les autres de coups fourrez: dont il recueillit riche butin. Voyez le 4. liu. des Roys 2 1. cha. le 2. liu. de Para. 17. 18. 19. & 20. cha. Iosc. liu. 9. cha. 1.

**I O R A M** fils de Iosaphat, succeda à son pere, & tua tous ses freres, & aucuns autres des premiers du royaume: espousa Athalia fille d'Amri, qui le feit idolatre: pourtāt receut lettres d'un Prophete, qui le menaçoit de vengeance diuine. Dieu donc permit que les Philistins & Arabes pillerent son pais & son palais, & tuerent tous ses enfans, fors Ioachas le plus petit. Ce Ioram regna 3. ans avec son pere, & 4. apres, son fils Ochosias luy succeda. Il y a vn autre Ioram & vn autre Ochosias, enfans de Achab, & Roys d'Israël, comme verrez.



**OCHOSIAS**, fils d'Achab, commença regner sus Israël en Samarie en l'an du monde 3049. avant la natiuité de Iesus Christ 913. ans. Il fut meschant & depraué comme ses pere & mere. estant malade d'une cheute, enuoya demander au dieu de Accaron (c'est à dire au diable, ou idole de ceste ville-là) pour auoir son opinion s'il recouureroit santé: ceux qu'il y auoit enuoyez, retournent sans parfaire leur voyage: dient qu'ils ont rencontré vn homme velu, ceinturé sus ses reins d'une ceinture de peau, qui leur a dit qu'ils s'en retournassent, & qu'ils dissent à Ochofias, qu'il n'en rechapera point. Lors le Roy, pensant que c'estoit Elie, qui auoit empesché, ses messagers, enuoya vers luy vn Capitaine avec cinquante hommes, pour le prendre, lesquels tous furent consumez par le feu du ciel. Le Roy y en renuoya pour la seconde fois autant, auxquels auint le semblable: & y renuoyant pour la tierce fois, le Capitaine se humilia deuant Elie, qui avec luy alla vers le Roy, le reprint, & luy dist les mesmes paroles qu'il auoit dictes aux messagers: à sauoir s'il n'y auoit point de Dieu en Israël, si qu'il faille enuoyer vers Beel-zebub, dieu de Accaron: & pourtant qu'il n'en releueroit de la maladie. il ne regna que deux ans. Ainsi mourut sans hoirs, parquoy à luy succeda son frere Ioram Voyez le 3. liu. des Roys chap. 22. & le 4. liu. cha. 1. Iosephe li. 9. cha. 2.

**IORAM** fils d'Achab, & frere dudiect Ochofias, luy succeda au royaume d'Israël, & regna en Samarie douze ans. De son temps Benadab Roy de Syrie, assiegea Samarie, ou y eut famine si grande que la teste d'un asne fut vendue 80. pieces d'argent. Voyez le 3. li. des Roys, cha. 20. Iosephe liu. 9. cha. 4. Iehu succeda à Ioram.



**OCHOSIAS** fils de Iorã, Roy de Iuda, succeda à son pere au dict royaume, en l'an 12. & dernier du regne de Iorã fils d'Achab Roy d'Israel. il auoit 22. ans quand il commença à regner, & regna vn an en Ierusalẽ, qui estoit l'an de la creation du monde 3060. auant la natiuité de Iesus Christ 902. ans. Il fut meschant, & ensuyuit la maison d'Achab, print alliance avec Ioram fils d'Achab, & avec luy alla en guerre contre Hazael Roy de Syrie. Or Iehu chef-d'armee du pere dudiẽt Ochosias, fut oinẽt Roy d'Israel, & luy fut commandé de tuer tous ceux de la maison d'iceluy Ochosias, & aussi de la maison d'Achab. Ainsi fut le Roy Ochosias, le premier an de son regne, occis par le commandement de Iehu. Voyez le 4. li. des Roys 8. & 9. cha. le 2. de Para. 22. cha. Il y a eu vn autre Ochosias, fils d'Achab, & frere de Ioram Roys d'Israel, dont auons parlé cy-dessus.

**ATHALIA** mere dudiẽt Ochosias, voyant le Roy son fils mort, fait tuer tous ceux de la semence Royale, fors le petit Ioas, fils d'iceluy Ochosias, que Iosaba sa tãte paternelle, retira secrettement. Athalia donc vsurpa ainsi le royaume de Iuda pres de sept ans: car lediẽt an septieme, fut Ioas oinẽt Roy de Iuda, par le Pontife Ioiada, mari de ladiẽte Iosaba: & par le commandement de luy fut Athalia menee à la porte des cheuaux & mules du Roy, & là occise. Voyez le 4. li. des Roys 11. cha. le 2. li. de Paral. 22. & 23. chap. Iosophe des Antiquitez liu. 9. chap. 7. qui appelle icelle Athalia, Gotholia.



**IEHV**, qui estoit Chef, & Courounal de l'armee de Ioram Roy de Iuda, fut oinct Roy d'Israël, lors que regnoit Ioram fils d'Achab sus Israel, & Ochosias fils de l'autre Ioram, sus Iuda. Iehu donc, ayant occis ces deux derniers Roys, regna sus Israel, l'an mesme qu'Athalia commença regner sus Iuda, qui estoit l'an du monde 3061. auant la naissance de Iesus Christ 901. an. Il extermina toute la race du Roy Achab, & trauersa d'une fagette Ioram Roy d'Israël: commanda que lon tuaist Ochosias Roy de Iuda, & que lon precipitast, & iettast du haut d'une fenestre, Iezabel, qui s'estoit bien atifee, & fardee pour le regarder entrer en la ville de Iezrahel. Voyez le 4. li. des Roys 9. & 10. cha. Iose. li. des Antiq. 9. chap. 10. Iehu feit aussi tuer tous les prebstres de Baal, feit bruler leur idole, abatre leur temple, & deputa le lieu à toute immundice & ordure: nonobstant ne laissa d'estre meschant, & d'ensuyure Ieroboam, & n'abandonna les veaux d'or.

**IOIADA** fut Pontife, ou Grand-prebstre des Iuifs, qui remit Ioas fils d'Ochosias Roy de Iuda, en son royaume, faisant occire Athalia, qui tyranniquement auoit vsurpé le royaume. Il feit accord avec ledict Roy Ioas, qui avec son peuple, iura & promit obeir aux commandemens de Dieu, & le peuple aussi promit obeir au Roy. Cela fait, abatirent & rompirent les autels & idoles de Baal: tuerēt Mathan, prebstre de Baal, mesme deuant son autel. toutesfois Ioas, apres la mort de Ioiada, s'adonna à idolatrie. Voyez le 4. li. des Roys 11. cha. le 2. liu. de Paralip. 24. cha. Iosephe liu. 9. cha. 7.



IOAS, fils d'Ochofias, Roy de Iuda, fut oinct Roy de Iuda par le Grand-prebtre Ioiada, l'an septieme du regne de sa mere Athalia, qui estoit l'an du monde 3067. auant la natiuite de Iesus Christ 895. ans. Nous auons dit cy-deuant comme sa tante Iofaba le cacha, & garentist de la furieuse cruauté de sa propre mere. Il print tous les tresors que les Roys Iosaphat, Ioram, & Ochofias, ses precesseurs, auoient donnez & consacrez au temple de Salomō: & tous les tresors du palais, & les enuoya vers Hazael Roy de Syrie (qui auoit prins Geth, & mōtoit droit en Ierusalem avec grosse armee) à fin de le faire desister de la guerre, & le réuoyer en son païs: ce qu'il fit. Mais quād Ioiada fut trespassé, Ioas fit tuer le Prophete Zacharie son fils, en recōnoissant mal le bien & hōneur q̄ luy auoit fait Ioiada: mais la vengeance suyuit de bien pres l'offence: car l'an estāt à peine reuolu, suruint la guerre de Syrie, qui en tua des principaux de Iuda. Puis Ioas fut tué par ses seruiteurs mesmes en son liēt, pour vengeance de la mort de Zacharie. Il regna 40. ans. Voyez le 4. li. des Roys, 11. & 12. cha. le 2. liu. de Paral. 24. cha. Iosephe li. 9. cha. 7. & 8. Il y eut vn autre Ioas fils de Ioachas, Roy d'Israel, comme verrez cy-apres.

AMASIAS fils de Ioas susdict, succeda à son pere au royaume de Iuda, en l'an du mōde 3107. auāt la natiuite de Iesus Christ 855. ans, qui estoit l'an secōd du regne de Ioas fils de Ioachas Roy d'Israel. Il vengea la mort de son pere sus ceux qui l'auoyent tué, & non sus leurs enfans. il vainquit les Idumeens, dont en tua dix mil, & dix autres mil furent iettez du haut à bas d'vn rocher. Puis apres adora les dieux des Idumeens: parquoy Dieu estant courroucé, permit qu'il fust prins captif par Ioas Roy d'Israel: & fut tué en l'an de son regne 29. Voyez le 4. liu. des Roys cha. 13. & 14. Iosephe. li. 9. cha. 9.



SICHEVS, oncle, & mari de Dido, fut prebtre d'Hercules, qui estoit la seconde dignité: car le Roy auoit la premiere. Il cacha ses tresors non en cofres, ny en chambres, mais en terre: & iaçoit que les gens ne le fauoyent au vray, la renommee toutefois le disoit: par laquelle Pygmalion, enflammé de conuoitise & auarice, le tua à l'impourueu, & en trahison, cōme il sacrifioit, & faisoit son office de prebtre. Ce Pygmalion estoit frere de Dido, & Roy de Tyrus, qui y regna 40. ans, & en l'an 7. de son regne Dido edifia Carthage, selon que dit Iosep. Voyez Verg. li. 1. & 4. de l'Enej, & Iustin li. 18. Sicheus est autremēt dict Siharbas.

DIDO fille de Belus, Roy des Pheniciens ou Tyriens, son mari estant occis, nauigua secretement en Afrique avec les tresors que Pygmalion auoit trop conuoitez. là elle acheta autant de terre qu'elle en pourroit enuironner d'une peau de beuf ou taureau, qu'elle decoupa bien menu, & en l'estendue d'icelle peau, contenant 22. stades, qui valent pres de trois mils d'Italie, fonda la ville de Carthage, en l'an du monde 3076. auant la natiuité de Iesus Christ 886. ans: depuis le bastiment du temple de Salomon 143. ans, selon Iosephe escriuant cōtre Apion, au 1. liu. Sa chasteté, nonobstant Vergile, & Ouide, est grandement estimee par Boccace & Ausone: car elle ayma mieux mourir que de se remarier avec le Roy Hiarbas: & aussi depuis Eneas iusqu'à elle, y a plus de cent ans à dire, selon les histoires. Son propre nom estoit Elisa: mais fut furnommee Dido, quasi hommace, pour la grandeur de ses faits. Elle fut honoree & adoree comme Deesse, & furent dressez & bastis temples à son nom & hōneur. Voyez Iusti. li. 18. Boc. li. 2. des Dames de renom.



**IOACHAS** fils de Iehu, regna sus Israel en Samarie, l'an 23. du regne de Ioas, fils d'Ochosias Roy de Iuda: qui fut l'an de la creation du monde 3089. auant la natiuité de Iesus Christ 873. ans. Il fut meschât, & ensuyuit Ieroboã fils de Nabat, & feit pecher le peuple d'Israel: Parquoy Dieu estant courroucé, les feit battre & vaincre par Hazael Roy de Syrie, & par Ben-adab son fils. Ioachas regna 16. ans, & à luy succeda son fils Ioas. Voyez le. 4. liure des Roys, cha. 13.

**IOAS**, fils de Ioachas, regna sus le peuple d'Israel, apres son pere, & autant que luy, à fauoir 16. ans, commenceans en l'an du monde 3105. auant la natiuité de Iesus Christ 857. ans. Il se gouerna meschamment, ensuyuant les pechez de Ieroboam comme auoit fait son pere. recouura & retira des mains & puissance de Ben-adab, les villes que son pere auoit perdues en guerre contre Hazael: & par trois fois vainquit iceluy Ben-adab. Pareillement feit guerre contre Amasias Roy de Iuda, le print, & pill a & saccagea le temple de Dieu: puis retournant en Samarie, mourut, & fut ensepulturé en Samarie avec les Roys d'Israel: & à luy succeda son fils Ieroboam. Voyez comme dessus, & Iosep. liu. 9. cha. 10. Il y a eu vn autre Ioas fils d'Ochosias, & d'Athalia, dont j'ay fait mention en la tierce page precedente.





LYCVRGVS ordonna certaines bonnes loix aux Lacedemoniens, quand Aremulus regnoit sus les Latins : qui fut environ l'an du monde 3090. avant la natiuité de Iesus Christ 872. ans. Premièrement institua 28. hommes d'aage qui aux Roys afsisteroyent, & moyenneroyent les affaires de sorte, que ils restreindroyent, ou empescheroyent la puissance du peuple, en faueur du Roy: & au contraire aussi, seroyent pour le peuple alencontre de la tyrannie du Prince. Secondement, il egala les terres & possessions, si que l'un n'en auoit point plus que l'autre. Puis abolist la monnoye d'or & d'argent: & ne laissa en vsage que la monnoye de fer: & refrena l'exces du viure, & des habits. Qui en vouldra sauoir d'auantage, lise Plutarque en la vie de Lycurgus. Il fut brief en paroles, harangues & escrits: faingnit qu'il tenoit de l'oracle d'Apollo Delphique, les loix qu'il ordōna, à ce que pour leur seuerité ne fussēt reiettees. il voulut que lon ne cōstituaist point argent en dot aux filles, à fin que les hommes les espouassent, non pour amasser argent, mais pour faire enfans: aussi à fin que les filles qui seroyent poures, ne demourassent à marier. il ne fut pas moins estimé à ses loix inuenter, qu'à exemple par luy-mesme monstrier: & n'ordonna onc rien qu'il n'observast le premier. Voyez Iustin en plusieurs lieux. S. Augustin de la Cité de Dieu liu. 2. cha. 16. & liu. 10. cha. 13. Xenophon en la police des Atheniens.

DIRCEVS, fut Poëte Athenien bien laid, qui inuenta la trompette. Les Lacedemoniens ayans responce d'Apollo, qu'ils ne vaincroient leurs ennemis sinon que cestuy fust Capitaine, il les espouenta si bien par le son de trompettes, que, s'enfuyans, facilement furent vaincus: Voyez le grand Elucidaire.



**I E R O B O A M** fils de Ioas Roy d'Israël succeda à son pere audict royaume l'an quinziesme du regne d'Amasias fils de Ioas Roy de Iuda, qui estoit l'an du monde 3 1 2 0. auant la natiuité de Iesus Christ 8 4 2. ans. Il fut aussi imitateur de l'impieté, ou idolatrie de Ieroboam fils de Nabat, qui feit pecher, & idolatrer le peuple d'Israël. Il restitua les limites des terres d'Israël depuis l'entree d'Emath iusques à la mer de solitude, selon que Dieu auoit dit par Ionas fils d'Amathi Prophete. car iceluy Ionas auoit prédit à Ieroboã qu'il vaincroit les Syriës, & dilateroit & accroistroit son royaume, quant à la partie du costé de Septentrion, iusques à la cité Hemathi: & quant à la partie du midi iusques au lac ou palu Asphaltite, que lon dit la mer morte. Voyez le 3. li. des Roys, cha. 14. Iosep. li. 9. cha. 11. Il regna 41. an.

**Z A C H A R I E** fils de Ieroboam susdict, succeda à son pere au royaume d'Israël l'an 38. du regne d'Azarias, dict aussi Ozias, Roy de Iuda, qui estoit l'an du monde 3 1 6 1. auant la naissance de Iesus Christ 8 0 1. an. Il fut meschant comme ses peres & predecesseurs. L'an sixième de son regne, Sellum fils de Iabes conspira contre luy, & le tua apertement: ainsi vsurpa le royaume, qu'il tint vn mois. Voyez le 4. li. des Roys cha. 15. Il y a eu d'autres Zacharies, comme le Prophete Zacharie, que Ioas Roy de Iuda, feit mettre à mort. Voyez le 2. li. de Paral. cha. 24. puis Zacharie fils de Barachie, qui admonesta le peuple de se cōuertir à Dieu. Voyez le 1. cha. de Zacha. puis encor y a Zacharie, pere de S. Iean Baptiste. Voyez S. Luc 1. chap.



O Z I A S, autrement dict Azarias, fut fils d'Amasias Roy de Iuda, & fut de tout le peuple élu & constitué Roy à seize ans au lieu de son pere encor viuant, & contre lequel on auoit conspi- ré: qui fut en l'an du monde 3124. auant la natiuité de Iesus Christ 838. ans: & regna 52. ans, à sçauoir 11. du viuant de son pere, & depuis la conspiration, & puis 41. an apres que son pere fut tué. Il fut bon Roy du commencement, aymé des hommes, & mesmement de Dieu, avec l'ayde duquel il vainquit les Philistins, les Arabes, & les Ammonites, qu'il feit ses tributaires. Il repara la ville de Ierusalem, fut fort opulent & riche, eut force bestail, & ayma le labourage: par ses grans biens & prosperitez fut bruit de luy bien loing. mais se mescōgnut, & par son outre- cuidance voulant sacrifier au temple, & vsurper l'office des preb- stres, qu'il menaceoit, quand de ce ils le reprenoyent, deuint la- dre, pour punition: parquoy fut mis hors par le prebstre Aza- rias, & autres: suyuant l'ordonnance de Moyses, qui commanda que les lepreux ou ladres fussent chacez hors du temple. Ainsi demoura ladre iusques à sa mort. Voyez le 4. liur. de Roys 14. & 15. cha. le 2. li. de Paralip. 26. cha. Iosephe liu. 9. cha. 11.

I O A T H A N fils dudit Ozias, fut Roy de Iuda apres luy, l'an 2. de Phacca fils de Romelie, Roy d'Israël: qui estoit l'an du monde 3176. auant la natiuité de Iesus Christ 786. ans. Il fut bon Roy & vertueux, edifia la haute porte du temple, & des vil- les aux montaignes, & des chasteaux & tours es forests. vainquit le Roy des Ammonites, & le feit son tributaire de cent talens d'argent, & dix mil mesures de froment, & autant d'orge pour quelques annees. regna 16. ans. Voyez comme dessus.



MANAHEN fils de Gadi de Therfa, vint en Samarie, & tua Sellum, qui y auoit regné vn moys, apres qu'il auoit occis Zacharie Roy d'Israël. Ainsi celuy, qui par meurdre, auoit vsurpé le royaume, fut par vn autre meurdrier dans vn moys opprimé, & deffait. Manahen donc tyran, qui tua vn autre tyran, tint le royaume d'Israël en l'an du monde 3162. auant la natiuité de Iesus Christ 800. ans. Il ensuiuit la meschanceté de Ieroboam fils de Nabat: & persecuta tellement la ville de Nabat, qui ne le vouloit point receuoir, qu'il feist fendre les femmes enceintes. Mais puis apres le Roy d'Assyrie, nommé Phul, assiegea icelle ville de Therfa, auquel Manahen fut contraint bailler mille talents d'argent. Voyez le 4. liure des Roys, au 15. chapit. Il regna l'espace de dix ans.

PHACEA fils de Manahen, regna sus Israel en Samarie, apres son pere, l'an cinquantième du regne d'Azarias, autrement dict Ozias, Roy de Iuda: qui estoit l'an du monde 3173. auant la natiuité de Iesus Christ 789. ans. Il fut aussi imitateur de Ieroboam fils de Nabat, le meschant & maudit Roy. Phacea fils de Romelie, qui estoit Capitaine du Roy Phacea, machina contre luy, & le tua en Samarie, en vne tour du palais royal, & occist aussi avec luy cinquante des fils de Galaad, & puis tint & vsurpa le royaume d'Israel. Voyez le 4. liu. des Roys, cha. 15. Iosephe liu. 9. cha. 11. cestuy Phacea fils de Manahen, regna deux ans.



PHACEA, ou Phacee, fils de Romelie, par meurdre, & tyrannie tint le royaume d'Israël, ayant occis le Roy Phacea, fils de Manahen, dont i'ay parlé en la page precedente. Ce Phacea fils de Romelie fut ainsi par voye inique Roy d'Israël, l'an cinquante deuxieme & dernier du regne d'Azarias, qui est dict aussi Ozias, Roy de Juda: qui estoit l'an du monde 3175. auant la natiuité de Iesus Christ 787. ans. Il fut adonné à meschance-té, en fuyuant les traces de Ieroboam fils de Nabat, son precesseur. De son temps Theglat-Phalassar Roy des Assyriens opprima & courut toute la region Galaadite, s'en fait seigneur, & transmit les habitans d'icelle en Assyrie. Or apres que ce Phacea eut regné vingt ans, fut tué en trahison par Osee, autrement dict Hosea, qui puis-apres se fait Roy. Voyez le 4. liu. des Roys, cha. 15. Iosephe, liu. 9. cha. 11.

HOSEA fils d'Ela, regna comme i'ay dit, apres Phacea qu'il occist, en l'an du monde 3195. auant la natiuité de Iesus Christ 767. ans. L'an septieme de son regne, Salmanazar Roy d'Assyrie, assiegea Samarie, & fait Hosea son tributaire: mais puis-apres se rebellant, & ne voulant payer tribut, ains demandant secours à Sua, Roy d'Egypte, fut assiegé, prins, & emprisonné par Salmanazar: qui print Samarie, & gasta tout le païs d'Israël: transporta les dix lignees en Assyrie: lesquelles depuis qu'elles se departirent de Roboam, & eleurēt Ieroboam, furent tousiours affligees, & mises en puissance de leurs ennemis, par iuste diuine punition de leurs pechez, memement d'idolatrie. Voyez le 4. liure des Roys, cha. 17. Iosephe, lib. 9. cha. 15.



**A CH A S** fils de Ioathan Roy de Iuda, succeda au royaume, apres son pere, en l'an du monde 3 1 9 2. auant la natiuité de Iesus Christ 7 7 0. ans. Il ne suyuit pas les traces de son pere, ains des Roys d'Israël: luy tresméchant, & cruel, sacrifia mesme son propre fils en le passant par le feu, selon la mode des sacrifices des idolatres Gentils. il fut assiegé par Phacea & par Rasis, Roy de Syrie, qui toutesfois ne le vainquirēt. il fit ligue avec Theglat-Phalasar Roy d'Assyrie, qui tua Rasis, puis pour luy agreer, delassa l'adoration de Dieu, & sacrifia aux Dieux de Syrie. puis mourut l'an 16. de son regne. Voyez le 4. li. des Roys, cha. 16. Iosephe li. 9. cha. 13.

**E Z E C H I A S** fils d'Achas, succeda à son pere au royaume de Iuda, l'an du monde 3 2 0 8. auant la natiuité de Iesus Christ 7 5 4. Il fut bon Roy suyuant Dauid, dissipa les lieux hauts, couppa les bois ou lon adoroit les idoles, & les cassa. rompit le serpent d'airin que Moysse auoit fait eriger, par ce que le peuple l'adoroit, & le parfumoit d'encens. Aussi Dieu fut pour luy: car il ne fut point assubiecti au Roy d'Assyrie, & si poursuyuit bien les Philistins. Sennacherib Roy d'Assyrie, grand blasphemateur du nom de Dieu, assiegea Ierusalem, qui par grand miracle fut deliuree: car l'Ange de Dieu tua en vne nuit 1 8 0 0 0 0. hommes, au camp de Sennacherib, qui lors se retira. Ezechias depuis estant malade, Esaye luy predist sa mort, toutesfois par pleurs & prieres obtint de Dieu que sa vie seroit alongee de 15. ans: & eut pour signe de sa conualescence l'ombre du soleil de dix lignes retrogradee en son orloge. Le Roy de Babylone, sachant sa maladie, luy enuoya lettres & presens. il regna 22. ans, vesquit 54. son fils Manasses luy succeda. Voyez le 4. li. des Roys, cha. 18. 19 & 20. Iosephe li. 9. cha. 10.



ROMVLVS, premier Roy des Romains, cōmencea regner en l'an du mōde 3212. auāt la natiuité de Iesus Christ 750. ans. il fut fils de Rhea Ilia Vestale, iumeau ou besō avec Remus: sa mere disoit que Mars les luy auoit engédrez, pour couvrir son offense. ils furent portez & laissez sus le riuage du Tybre, toutesfois Faustus les recueillit, & les porta à Accia Laurétia, qui les nourrist & alaita: qui deuenus grās assemblerent grād nōbre de bergers & tuerēt leur grād oncle Amulius, frere du pere de leur mere: puis remirent Numitor, leur grand-pere maternel, en son royaume: qui auoit esté dechacé par Amulius, son diēt frere puis-né: lequel puis-né, avec ce cōtraignit Rhea fille de son frere d'estre religieuse de la Deesse Vesta, sous espoir qu'elle ne feroit iamais enfans, qui peussent pretēdre au royaume des Latins: toutesfois elle enfanta Remus & Romulus d'vne portee, l'an 17. du regne d'Amulius. Puis edifierēt vne ville au lieu mesme ou ils auoyēt esté portez petis, & delaissez, laq̄lle depuis fut nōmee Rōme, du nō de Romulus: qui fait tuer son frere, à cause qu'en mespris de son edict, il auoit pafsé par dessus les nouveaux murs de Romme. Romulus estant seul Roy, ordonna cent senateurs, qui furent appelez peres pour honneur, & leur generation patrices: & trois cens hōmes armez, pour la garde de son corps, en temps de guerre ou de paix. Ayant subiugué plusieurs de ses voisins ennemis, comme il असistoit & harāguoit à la reueuē de son armee, vne subite tempeste, avec gros bruit de tonnerre, l'enuironna de vne nuee si espoisse, que ses gens le perdirent de veuē: & iamais depuis ne fut veu. Il regna 36. ans. Voyez Tite-Liue, liu. 1. & Denis de Halicar. liu. 1. & 2.

HERSILIA fut femme de Romulus. Voyez cōme dessus. Ouide fait quelque fiction d'elle en fin du 14. liu. de la Metamo.



SIBYLLE Erythre, qu'aucuns appellēt Heriphile, estoit, comme lon tient, avant la guerre de Troye, iacoit qu'Eusebe la mette au temps de Romulus, ce que nous auons suyui. Apollodorus Erytrheen, afferme qu'elle estoit citoyenne d'Erythre, cōme luy: & qu'elle predist aux Grecs la destruction de Troye, & que Homere escriroit des mensonges. mais Strabo met deux Sibylles Erythrees, l'une du vieux temps, l'autre, nommee Athenain du temps d'Alexandre le Grand. Lactance n'en met qu'une, & dit qu'elle estoit nee en Babylone, mais qu'elle ayma mieux se nōmer Erythre, & est seule qui ait mis son nom en ses vers prophetiques: pourtant les propheties des autres ne se peuuēt discerner, ny asseurer de quelle Sibylle elles sont. Voyez Lactan. liu. i. cha. 6. Et au li. de l'ire de Dieu cha. 22. il dit que des Grecs & Latins ceste-ci est estimee par sus toutes. Aussi Fenestella recite que le Senat Romain enuoya Ambassadeurs à Erythre, ville de Asie la mineur, pour en rapporter les vers de ceste Sibylle: & ordonna que les Consuls Curio & Octavius, auroyent la charge de les faire serrer & garder dans le Capitole, qui estoit rebasti par Q. Catulus. On dit qu'elle a ainsi prophetizé: *Au dernier aage Dieu sera humilié, la race diuine sera faicte homme: diuinité sera vnie à humanité: l'agneau sera mis sus le foin, & par vne fille, qui en fera son deuoir, sera nourri.*

SIBYLLE de Samos, isle de Grece, florissoit, selon Eusebe & Cassiodore, en l'an du mōde 3297. auāt la natiuité de Iesus Christ, 665. ans. on l'appelle Herophile: Eratosthenes dit auoir trouué aux vieux annales des Samiens, qu'elle auoit non Phyto. On luy attribue cette prophetie: *Toy donc sotte Iudee, tu n'as point congnu ton Dieu, ains tu l'as couronné despines, & luy as fait vne mixtion de fiel amer.*





**SALMANASAR** Roy des Assyriens, leua vne grosse armee, alla cõtre Samarie, la print, & fait le Roy Hosea son tributaire: comme i'ay dit cy dessus en la vie d'Hosea: qui quelques annees apres, se voulant exempter de ce tribut, fut cause que Salmanasar retourna de-rechef en armes contre Samarie, laquelle il print trois ans apres qu'il l'eut assiegee, & emmena les dix lignees d'Israël en Assyrie, neuf ans apres qu'Hosea se voulut reuolter, qui estoit en l'an du mōde 3 2 1 3. auāt la natiuité de Iesus Christ 7 4 9. Telle fin print le royaume d'Israël, qui auoit duré 2 4 2. ans sous 18. Roys: en prenant le cōmencement à la mort de Salomon, & au regne de Ieroboã fils de Nabat, sous lequel & auquel les dix lignees se renegerēt, delaisans Roboam fils de Salomon. Voyez le 4. li. des Roys, cha. 17. & 81. Iosephe li. 9. ch. 15.

**SENNACHERIB**, Roy des Assyriens, grand blasphemateur contre la puissance de Dieu, menassa le Roy Ezechias, & son peuple, par ses Herauts, crians publiquement à haute voix: *Escoutez les paroles du grand Roy, Roy des Assyriens: Le Roy dit ainsi: Ne vous fiez ny abusez point à vostre Roy Ezechias, car il ne vous pourra pas garentir de ma main: & ne vous amusez à ses propos de la fiance de Dieu, disant que Dieu vous gardera, & ne sera la ville de Ierusalem prinse par le Roy des Assyriens.* Du siege qu'il mit deuant la ville, & comment il s'en retourna confus, voyez cy-deuant en Ezechias. Luy de retour en sa ville de Ninie, mit à mort plusieurs Iuifs que le bon Tobie enseuelissoit de nuit: pourquoy furent tous ses biens confisqueez, & luy fugitif tout nu avec sa femme et son fils. mais 45. iours apres, fut Sennacherib luy-mesme tué par ses propres fils, comme il adoroit ses idoles, & faux dieux, Adramelech, & Sarasar. Voyez comme dessus, & Iose. li. 10. cha. 1.



MANASSES, fils d'Ezechias Roy de Iuda, succeda à son pere audit royaume, en l'an du monde 3237. auant la natiuité de Iesus Christ 725. ans. Il fut meschant, & restitua l'idolatrie que son pere auoit abolie, sacrifia ses enfans aux idoles: & remplit la ville de Ierusalem du sang des innocens, & gens de bien. Pourquoy Dieu se courroucea, & suscita alencôte de luy le Roy de Babylone, qui assaillist Ierusalẽ, print Manasses, le lia de chaines, & luy mit les fers aux pied, & ainsi l'emmena captif en Babylone, ou il demeura sept ou huit ans. Lors reconnoissant son Dieu, & luy requerant pardon de ses fautes, fut en fin remis en son royaume. Depuis reietta toute idolatrie, & vesquit le reste de sa vie en la crainte de Dieu: mourut en l'an de son regne 55. vesquit 67. ans. Voyez le 4. li. des Roys, cha. 21. le 2. li. de Paral. cha. 33. Iosephe. li. 10. cha. 4. & 5.

ESAI E le Prophete, natif de noble lieu de Ierusalem, prophetisa en Iudee, mesme au par- auant que les dix lignées fussent par Salmanasar, menées captiues. il traicte en ses propheties de l'un & de l'autre royaume, de Iuda, & d'Israël, quelquesfois tout ensemble, quelquesfois separément, & en particulier. Or, bien que souuent il suyue, & ayt l'œil sus l'histoire pour lors presente, & qu'il predise & annonce apres la captiuité de Babylone, la deliurance, toutesfois son principal but, & intention est de traiter de la venue de Iesus Christ, & de la vocation & salut des Gẽtils. Manasses, Roy susdict le fait mourir tyranniquement & d'une mode nouvelle, car il le fait sier d'une sie de bois, par le milieu du corps. Voyez le 4. li. des Roys 19. & 20. cha. & S. Iero. sur Esaie.



**CANDAVLES** fut quatrieme Roy de Lydie, en l'an du monde 3248. auant la natiuité de Iesus Christ 714. ans. Il ayma fort sa femme, que ne faisant que prescher de sa beauté (cōme si n'en parlant point, sa beauté eust esté diminuee) en fin la fait voir, par vn soir, & toute nue, à Gyges son familier, quoy faisant, rendit son ami ennemi, l'induisant à mal & à tétation: & perdit l'amitié de sa femme, comme l'abandonnant à autruy: Si que bien tost la mort de Candaulles luy fut le loyer de son mariage: la femme ayant comme pour douaire le sang de son mari, donna le royaume d'iceluy, & elle-mesme, à son paillard. Voyez Iustin li. i. Herodote escrit en son li. i. que la Royne manda le lendemain querir Gyges, & luy dist telles paroles (bien que repugnant, & cōtraint l'eust veuë toute nue) ou il faut que celuy qui t'a cōseillé, meure, ou toy-mesme qui m'as regardée nue. luy oyant tel propos, & qu'il falloit passer par là, eleut plus-tost de tuer le Roy. Si s'en vint le trouuer le soir, dormant, & le tua au lieu mesme ou il auoit veuë la Royne nue. Voyez comme dessus.

**GYGES** fut Roy de Lydie apres qu'il eut tué Candaulles, en l'an du monde 3265. auant la natiuité de Iesus Christ 697. ans. Il fait guerre contre Milete, & Smyrne, villes, & print par force celle de Colophon. Voyez Herodote liu. i. Lon dit de luy, chose fabuleuse, qu'il entra dans vn cheual d'airin, qui auoit ouverture au flanc, & trouua leans vn homme mort, ayant vn anneau d'or en vn de ses doigts, lequel anneau il print: & le porta en son doigt: & quād il ne vouloit estre veu de persōne, tournoit la pierre, ou chaton de l'anneau, dedans sa main: ainsi (dit-on) il coucha avec la Royne, & tua le Roy, sans estre aperceu: & puis fut Roy luy-mesme. Voyez Cice. 4. li. des Offi.



NUMA-POMPILIUS secōd Roy des Romains, com mença regner en l'an du monde 3250. auant la natiuité de Iesus Christ 712.ans. Car quād Romulus fut mort, le royaume tōba en Interregne, c'estadire vacation de Roy: & les Senateurs constituans dix Decurions, regirent le Royaume vn an. Numa a tousiours aymé vne vie tranquille, mesme auant qu'il fust Roy:& ne fait aucunes guerres, toutesfois n'a point moins apporté de profit à la ville que Romulus mesme: car il institua les Romains en loix, & bones mœurs, lesquelz estoient ia pour l'acoutumance, & longue vsance des guerres, estimez comme brigans, & demi-barbares. il adiouta deux moys à l'an, à sauoir Iāuier, & Feurier: car au parauant l'an n'estoit que de dix moys, quant aux Romains. Tatius Roy des Sabins, luy donna sa fille vniue en mariage, apres la mort de laquelle, laissa la Court, & habita aux champs, & lieux solitaires: mais par prieres s'en retira, estāt appelé pour gouuerner le Royaume des Romains, qu'il refusa premieremēt, puis à la sollicitation de l'ambassade Romaine & grāde instance de ses parens, & amis l'accepta. Il edifia force temples, institua force cerimonies & sacrifices. En fin mourut aagé de 80.ans, ayant regné 43. De son temps Glaucus inuenta de souder le fer. Voyez Tite-Liue Decade. i. li. i. Denis de Halic. li. 2. & Eutrope liure premier.

EGERIA fut Nymphe ou Deesse, que lon dit auoir esté femme de Numa-Pompilius, au moins luy se disoit frequenter avec elle de nuit: & par son aduertissement instituer le seruice diuin agreable aux Dieux: les Poètes faingnent qu'elle fut conuertie en vne fontaine apres la mort de son mari. Voyez Oui. li. 3. des Fastes, & li. 15. de la Meta.



**A M O N** fils de Manasses succeda apres son pere au royaume de Iuda, en l'an du monde 3 2 9 2. auant la natiuité de Iesus Christ 6 7 0. ans. Luy meschant, ensuyuit la meschanceté, & idolatrie de son pere : & sacrifia à toutes les idoles que son pere auoit fait faire, les reuera, & adora. commença regner en l'aage de 2 2. ans, & ne dura son regne que deux ans : & fut tué en sa maison par ses gens mesmes, & par ses propres seruiteurs, qui furent aussi tuez tost apres par le peuple. Voyez le 4. li. des Roys, 2 2. cha. le 2. li. de Paralip. chap. 3 3. & Iosephe li. 10. cha. 4.

**I O S I A S** fils d'Amō, regna apres luy par 3 1. an. Il fut iuste, debonnaire, & imitateur de Daud. L'an 1 2. de son regne purgea son païs de toutes idoles & idolatries : & en sa presence fit abatre les autels de Baalim, & les simulacres ou idoles qui estoient dessus : fait reparer le tēple de Salomon : Helcias prebstre, y trouua le liure de la loy de Dieu, qui auoit esté baillé par les mains de Moysē. Le Roy mesme, en l'assemblée de tout le peuple dans le temple, leut ce liure tout du long : & assis en son siege Royal, promit deuant Dieu, & adiura le peuple d'observer le contenu, & celebra le Phase, qui est la pasque, à la mode du vieil testament. En fin, bataillant contre Nechaon Roy d'Egypte, fut nauré d'un coup de flesche, dont il mourut. Si fut ploré, & regretté de tout le peuple, mesmement du Prophete Ieremie, qui en fit vne deploration en vers lamentables, que lon appelle les lamentations de Ieremie. Voyez le 4. li. des Roys 2 2. & 2 3. chap. & le 2. liu. de Paralip. 3 4. & 3 5. cha. & Iosephe li. 10. cha. 5. & 6.



TVLLVS Hostilius tiers Roy des Romains, regna 32... ans, commenceans en l'an du monde 3293. avant la natiuité de Iesus Christ 669. ans. Il fut le premier des Romains qui mit en auant, & en vsage, habits de pourpre, & fasces: remit sus, le train de guerre, se confiant en la ieunesse bien aguerrie: batailla six diuerses fois contre les Albans, & les vainquit: & fit raser la ville d'Albe, receuant les Albans comme citoyens, & ne faisant d'iceux & des Romains qu'un peuple. Il eut aussi victoire des Ve gens, Fidenats, & Sabins. Fit escarteler Metius Suffetius, qui fut tiré au cul de deux charettes, comme infracteur de paix, & fainct, & mal-eureux dissimulateur qu'il estoit. L'on tient que ce Roy feuilletant les registres de Numa, & y trouuant auoir esté faits quelques secrets sacrifices, s'en voulut entremettre, mais n'en sachant pas bien venir à effect, non seulement n'eut aucune vision celeste, mais aussi la foudre y tomba, brulant maistre & maison. Il accreut la ville de Romme du mont Celius: & de son temps fut bastie Constantinople, par Pausanias, Roy de Sparte. Voyez Tite-liue li. i. Decade i. Denis de Halicarnas li. 3. & Eutrope liure premier.

ANCVS Martius fils de la fille de Numa, fut Roy apres Tullus Hostilius en l'an du monde 3325. avant la natiuité de Iesus Christ 637. ans. Il vainquit les Latins, accreut la ville de Romme des monts Auentin & Ianicul: fit le pont Sublice sus le Tybre: edifia Ostie sus la mer, à seize mils de Romme. de son temps Lucumo, qui fut nommé Tarquin Prisque, vint à Romme, avec sa femme Tanaquil: & fut la ville de Baudras edifiee. il mourut de maladie l'an 24. de son regne. Voyez comme dessus.



SIBYLLE Cumane, eut nom Amalthee : Suidas l'appelle Hierophile, & dit, avec la cōmune opinion, qu'elle apporta neuf liures à Tarquin le Prisque (autres dient l'orgueilleux) & les luy fait trois cens escus: le Roy esbahi de si grande somme, se mocqua d'elle: lors en presence de luy, elle en brula vn (autres dient trois) & du reste en demanda autant: le Roy se pense que elle deuiet encor plus fole: elle en brule encor vn (autres dient encor trois) & du reste demandant encor autant, le Roy, estonné, luy donne de trois liures (Plin dit d'vn restant de trois) trois cens escus. ceste femme ancienne & incongnue, onques puis ne fut veuë, comme lon dit: & ses liures, furent gardez dignement au Capitole, sous la charge des Quinze-hommes, qui en cas douteux à la republique, les alloyent visiter, pour y prendre conseil: & demurerent ces liures iusqu'à la guerre Marsique, & du tēps de Marius furent brulez avec le temple. mais Auguste en fait par tout chercher & trouuer d'autres, qui furent remis au Capitole rebasti: lesquels aussi Stilico brula, voulant faire guerre à son gendre l'Empereur Honorius. Voyez Lactāc. li. i. cha. 6. Pli. li. 13. cha. 13. Aul. Gel. li. i. cha. 19. la Chr. de Nacler genera. 52. Cuma, est vne ville d'Asie mineur, dont estoit ceste Sibylle, à laquelle on attribue ceste prophetie: *Ayant pris le sommeil de trois, il metra fin à la destinee de mort: lors retournant des mors, viendra en lumiere, monstrant premier le commencement de resurrection.*

SIBYLLE Hellepontique fut nee en la terre de Troye. Heraclides Pontic escrit qu'elle fut du temps de Cyrus. Heraclit luy attribue ceste prophetie: *Du hault palais du ciel, Dieu a regardé ses humbles subiects, & sera né d'une vierge Hebraique.*



ZALEVCVS, ayant ordonné en la ville de Locres, qui est en Grece, ou en Calabre, certaines bōnes loix, pour la police, & sain entretenemēt de la chose-publique, entre lesquelles loix par luy establies & introduictes, y en auoit vne, *Que quiconque seroit trouuē en adultere, auroit les deux yeux arrachez pour punition: & aduint que son propre fils trāsgressa ladicte loy. ainsi deuoit perdre les deux yeux: mais pour l'honneur du bon pere, toute la ville pardonnoit à ce fils, & le pere y repugnoit, voulāt que son fils, fust puni, comme l'ordonnance portoit. toutesfois en fin, vaincu par les prieres du peuple, & pour montrer qu'il entendoit que sa loy fust inuiolablement gardee, se fait arracher premieremēt vn œil, puis à son fils vn autre: ainsi laissant l'vsage de la veuē à luy, & à son fils, par merueilleuse attrempance d'equité, se montra pere misericordieux, & iuste legis-lateur, executant la peine deuē selon son edict. Voyez Vale. li. 6. cha. 5. Ce fut enuiron l'an du monde 3300. auant la natiuité de Iesus Christ 660. Diog. Laër. dit que Zaleucus fut endoctriné par Pythagoras, dont verrez cy-apres: ainsi quant au temps ne s'accorde pas trop bien avec la Chronique, non plus qu'en plusieurs autres passages.*

Icy deuons bien considerer, quelle peine deuons prendre à obseruer les commandemens de Dieu: veu que ce Payen fut tant entier en l'obseruation des siēs, que pour icelle il n'espargna son œil, qui est la plus tendre, & plus noble partie de tout le corps.

De ce temps florissoyent Archiloc historien, qui a escrit vn liure des temps, & Simonides, & Aristoxenus Philosophe & medecin bien renommé. Aussi fut de ce temps Albe-lōngue ruinee, qui auoit duré & regné 487. ans. Voyez Denis de Halic. li. 3.





**I E R E M I E** Prophete, commença à prophetizer des sa ieu-  
 nesse en l'an du monde 3307. auant la natiuité de Iesus Christ  
 655. ans. Il prophetiza seulement en Iuda & Ben-iamin : car ia  
 les Assyriens auoyent transporté chez les Medes les dix autres  
 lignees d'Israël. Il a deploré & lamenté la ruine de Ierusalem par  
 l'alphabet hebraic quatrefois repeté. il estoit natif d'un petit vil-  
 lage nommé Anatoth, à vne lieue loing de Ierusalem. fut de lignee  
 & de qualité sacerdotale, & sanctifié des le ventre de sa mere, &  
 appelé à la dignité de Prophetie, laquelle il refusoit, disant qu'il  
 n'estoit pas sauant, & qu'il n'estoit qu'un enfant : mais Dieu luy  
 donna sciéce & courage. En fin fut lapidé du peuple en Egypte,  
 & mourut ainsi. Voyez S. Ierosme sur la Prophetie de Ieremie,  
 & ladicte Prophetie, & l'Ecclesiastic. au cha. 49. Iosephe liure des  
 Antiquitez 10. cha. 8.

**B A R V C H** Prophete, fut secretaire ou escriuain de Iere-  
 mie, & escriuit sous luy le liure des choses qui deuoient aduenir  
 à la ville de Ierusalem: aussi quand Ieremie fut emprisonné il le  
 seruit, & l'accompagna en son exil, sans iamais l'abandonner.  
 Il leut sa Prophetie deuant le Roy Iechonias en la captiuité de  
 Babylone, & predist plusieurs & grans mysteres de l'incarna-  
 tion de nostre Sauueur Iesus Christ, & de la fin du mode. Voyez  
 le liure de Baruch, & Iosep. li. 10. ch. 8. & le catalogue des Saints.



ELIACIM, qui eut aufsi nom Ioacim, fut fils de Iofias, Roy fufdit & regna onze ans, apres que Ioachas, fon frere puifné, eut esté depofé du royaume (ou il ne regna que trois mois) par Nechao, ou Necho, Roy d'Egypte, qui le mena captif en fon païs, ou il mourut bien toft, & mit Eliacim Roy en fon lieu, luy changeant fon nom Ioacim en l'an du monde 3326. auant la natiuité de Iefus Christ 636. ans. Eliacim fut mal-eureux idolatre, & auare: aufsi Dieu le punift: car Nabuchodonofor Roy de Chaldee, le print, le fait lier de cheines pour le mener captif en Babylone (y transportant aufsi les vaiſſeaux du temple, leſquels il fait feruir au ſien) & depuis commanda qu'on le tuaſt & iettaſt hors des murailles avec les autres corps mors (comme auoit predict Ieremie qu'il ſeroit enſeueli cōme vn afne) Car il reſuſoit, payer le tribut impofé, & accordé, de cent talens d'argent, & vn d'or: ſe fiant trop ſolemēt que les Egyptiens aſſaudroyēt Nabuchodonofor, contre l'auertiffement de Ieremie. Voyez le 4. li. des Rois, cha. 23. & 24. le 2. li. de Para. cha. 36. & Iofeph. li. 10. chap. 8. il regna onze ans.

IOACHIN, autrement dict Iechonias, fut fils d'Eliacim, fufdit, & luy ſucceda au royaume, auquel ne regna que trois mois: qui fut en l'an du monde. 3337. auāt la natiuité de Iefus Christ, ſix cens vint cinq ans. il fut meſchant, enſuyuant les traces de fon pere: ſe rendit à Nabuchodonofor par le cōſeil de Ieremie, avec toute ſa famille, à ce que Ieruſalē ne fuſt point deſtruite, & que les gens n'euffent aucun mal: mais Nabuchodonofor ne luy tint pas foy: ains l'ēmena captif en Babylone avec les ſeigneurs, gēs-de-guerre, & artiſāns, au nōbre de dix mil. Apres cette trāsmigratiō, & captiuité de 37. ās, Euilmerodac ſucceſſeur de Nabuchodonozor, mit Ioachin en liberté, qui, peu apres ēgēdra Meſezebel, ſurnōmé Salathiel. Voyez Ier. cha. 32. & 52. & Philō.



**NABUCHODONOSOR** le grand, que les Ebreux appellēt Nabucadnezer, cōmēça regner en Babylone l'an 4. dū regne d'Eliacim susdit. & regna 42. ans. Il dōna la bataille à Pharaon Necho Roy d'Egypte, pres Circhamis, ou Archamis, ville, & le vainquit: print toute la Syrie depuis Eufrates iusques à Pelusiū, fors la Iudee. depuis rēdit Eliacin tributaire, & 3. ans apres, refusant le tribut, le fait son prisonnier, le lia de cheines pour le mener captif en Babylone, puis se rauisa, & le fait tuer, comme ia ay dit: & en son lieu mit Ioachin fils d'Eliacim: peu apres y retourna en armes, print ledit Ioachin, & l'emmena avec dix mil captifs, laissant en son lieu Sedechias. Puis encor enuoya son couronal Nabufardā, qui print la ville, & le Roy Sedechias refusant le tribut promis. Or s'eleua Nabuchodonosor en orgueil: mais par punition de Dieu, deuint fol, & fut dechacé de son royaume par ses seruiteurs: erroit par les champs, mangeāt herbe & foin cōme vn bœuf, par 7. ans: son corps fut teinct de la rosee du ciel, iusques à ce q̄ son poil creut cōme celuy d'un aigle, & ses ongles cōme les ongles d'oiseaux. mais Daniel captif, prioit Dieu pour luy, si qu'il reuint en son bon sens, recongnut Dieu, & fut remis en son royaume. Voyez comme dessus, & les li. de Daniel & Iudith, iusques aux 3. ou 4. premiers cha.

**SEDECHIAS**, diēt Mathanias, fut fils de Iosias, & tint le royaume de Iuda 11. ans: il fut mis au lieu de son nepueu Ioachin, sous cōdition de payer tribut à Nabuchodonosor: mais ne tint sa foy, croyant plustost aux paroles des meschans, qu'à Ezechiel & Ieremie. dont aduint que luy fut mené captifs en Babylone, l'an du monde 3348. auant la naissance de Iesus Christ 614. ans, & lors fut la grande captiuité de Babylone. Les enfans de Sedechias furent tuez deuant luy, & puis luy-mesme eut les yeux arrachez. Voyez comme dessus, & Iere. & Eze.



**DANIEL** Prophete, prophetisoit du tēps de Ioachin Roy de Iuda, diēt Iechonias, & aussi du temps de Ieremie: il fut emmené captif en Babylone par Nabuchodonosor en l'an du monde 3348. auant la natiuité de Iesus Christ 614. ans: il aprint avec ses cōpaignons les arts & la langue des Chaldeens, par 3. ans: & exposa les songes de Nabuchodonosor, & la vision de Baltasar. Au reste commēt il fut mis en la fosse aux Lions, & comment il en fut mis hors: comment aussi l'Ange Gabriel luy declara la vision des 70. hebdomades, & du songe de 4. bestes, qui sont les 4. monarchies, & cōment il deliura Susanne, voyez le li. de Daniel. & Iose. li. 10. cha. 12. Nabuchodonosor le nōma Baltasar, comme son fils, & le vouloit faire son heritier avec ses enfans (par ce qu'il auoit prié Dieu pour luy, & predict qu'il reprendroit la forme d'homme, & le royaume) mais il ne voulut accepter l'hoirie. il mourut en Babylone, & fut enterré en vne cauerne royale honorablement. Voyez Epipha.

**EZECHIEL** (Prophete du temps de Ieremie, Baruch, & Daniel) fut bien ieune mené captif en Babylone avec les autres, ou il commença à prophetizer en l'an du monde 3349. auant la natiuité de Iesus Christ 613. ans. il prophetiza en Chaldee quand Ieremie prophetizoit en Iudee: & est sa prophetie bien ample: Voyez là, & Iosep. liu. 10. cha. 9. & l'Ecclesiast. cha. 49. En Babylone il fut Iuge des lignees Dan & Gad, & predict que par leur faute le peuple ne retourneroit iusqu'à ce qu'ils eussent reconnu leur peché. pource le tirerent avec des cheuaux parmi des roches, & luy rompirent la ceruelle, & l'enseuelirent au sepulchre de Sem & Arphaxad. Voyez S. Iero. & la chro. de Guillel.



**TARQVIN** le Prisque, ou l'ancien, qui premierement auoit nō Lucumo, fut cinquieme Roy des Romains, l'an du monde 3349. auant la naissance de Iesus Christ 613. ans. Il doubla le nombre des Senateurs, & aussi des Cheualiers: enuironna de fortes murailles vne partie de Romme: institua aucuns ieux de grand appareil, & magnificence: vainquit les Sabins, dompta les Latins: fut le premier qui entra en triomphe à Romme. Feit vne ceinture de murs à Romme, pour exercer les cheuaucheurs, & luiteurs: & lon appeloit ce lieu Cirque, par ce qu'il estoit rōd, comme vn cercle. Il commença de bastir le Capitole, ainsi nommé, à cause qu'on y trouua vne teste d'homme. Mais en l'an 37. de son regne fut tué par les enfans d'Ancus Martius, auquel il auoit succédé. De son temps fut Ierusalem prinse & destruiete par Nabuchodonosor, comme auons dit: & la ville de Marseille bastie. Voyez Tite-Liue li. i. & i. decade: Denis de Halicar. liu. 3. & Eutrope li. i. Cestuy fut le premier qui par ambition feit brigue & harangue pour paruenir à la couronne.

**TANAQVIL** fut femme de Tarquin le Prisque, que les Latins appellent Tarquinius Priscus. Elle estoit bien experte & entēdue en augures, prodiges, & diuinations, comme estoient communement les Etrusques. & fault entendre que comme son mari, auant qu'il fust Roy, entroit premierement à Romme, vn aigle voletant doucement sus la teste de luy, print son bonnet ou chapeau, puis incontinent, comme enuoyé pour celeste message, le luy remit honnestemēt sus la teste: adonc Tanaquil embrace son mari, & luy donne courage d'auoir bonne esperance: luy assurant que ce presage ou augure, luy signifioit qu'il paruiendroit à dignité royale: autāt en dit elle de Seruius Tullius, quād, luy ieune enfant, & dormāt, vne flāme de feu apparut sus sa teste: & auint que tous deux depuis furent Roys. Voyez cōme dessus.



SAPPHO fut femme Poete , du temps de Tarquin Prisque , & d'icelle Plato mesme , admiroit la sapience : toutesfois estât veuve d'un homme bien riche, de qui elle eut vne fille, s'enamoura de Phaon demesurément: car comme il fut allé en Sicile, & elle eust doute d'estre peu aymee de luy, d'une ardeur & rage impatiente d'amour proposa au peril de sa vie , appaiser ceste fureur, & se ietta d'un môt d'Epire en la mer: Elle eut pour amie Erinne, aussi Poete : & lon trouue en vn epigramme Grec , que d'autant que Sappho en vers lyriques passoit Erinne , d'autant Erinne passoit Sappho en vers exametres. Elle inuēta vne sorte de vers qu'on appelle Sapphiques, à cause de son nō: elle fut dicte la 10. Muse, & nombree entre les 9. Poetes Lyriques. Elle estoit de Metelin ou y eut vne autre Sappho, mais de mauuais bruit. Voyez Rhodig. li. 9. cha. 24. & liu. 10. cha. 2. & liu. 14. cha. 1. & la 21. epistre d'Ouide.

PANTHEE femme d'excellente beauté & chasteté, estât prinse en guerre par Cyrus, fut baillee en charge à Araspes , qui afferma deuant Cyrus qu'onques n'estoit nee femme plus belle. toutesfois Cyrus constant n'alla vers elle, ny ne la manda , pour ne distraire son esprit de ses emprises. elle voulant recōgnoistre cela pour vn grand bien, à sauoir qu'il ne l'auoit visitee, ny pressee de son honneur, incita son mari, qui n'estoit pas captif, prendre alliance de Cyrus, & luy venu avec ses gens-de-guerre, fut par elle mesme animé, & armé, à combatre pour Cyrus: mais il y demoura: & elle mettant la teste sus l'estomac de son mari mort, se coupa la gorge : autant en feirent trois de ses seruiteurs, qui auoyent veu ce piteux cas. Voyez la Cyropedie de Xenophon li. 7. & Rhodig. li. 13. cha. 33.



**THALES**, de Milet, ville d'Ionie (quelcun l'appelle Thales de Milesie, monstrent son ignorāce) fut appelé premier sage & Philosophe Physicien, en l'an du monde 3325. auant la natiuité de Iesus Christ 637. ans, du temps de Iosias, Roy de Iuda: autres le mettent du temps d'Ezechias & de Romulus, & mal, car il vesquit iusqu'à Cyrus: quelcun le met encor du temps d'Achas, qu'il nomme mal Acham. Il estoit de la race de Cadmus & Agenor: & venāt de Phenice avec Neleus, fut receu bourgeois de Milet: dont on l'appelle Milesien, mais nō pas de Milesie, car seroit mal entendu. apres qu'il eut vacqué aux affaires de la Republique, s'addōna, à la Philosophie. aucuns le dient auoir le premier dit, les ames estre immortelles, & auoir compassé le cours du Souleil. Sensuyuent aucunes de ses sentences: *Peu parler, est signe d'un esprit sage & rassis. Ne fay ce que tu blasmes en autruy.*

*Nous deuous auoir pareille souuenāce d'amis absens & presens. Ne te fay point riche par iniquité. Comme tu auras fait à pere & mere, tes enfans te feront. Dieu congnoit bien non seulement ceux qui mal font, mais aussi ceux qui mal pensent. Il est bien difficile de se congnoistre. Voyez Dioge. Laër. li. i. il vesquit plus de cent ans.*

**CHILO** Lacedemoniē, l'vn des Ephores, & des sept sages de Grece, estoit du temps de Thales, de Solon & d'Esope, ce dit Plutar. en Solon. Sensuyuent aucunes de ses sentences: *Tousiours fault refrener sa langue, mais principalement en banquets. Il ne fault menacer personne, car c'est à faire aux femmes. Il vault mieux perdre, que profiter iniquemēt. L'or s'esprouue à la touche, & le cueur de l'homme à l'or. Voyez comme deffus. il mourut de ioye que son fils fut couronné aux jeux Olympiques.*



PIT T A C V S estoit de Mitylene, ville de Lesbos (isle que l'on dit Methelin) dont il dechacea vn tyran: vainquit & tua en combat particulier, Phrynon chef des ennemis, enuelopant iceluy subtilement d'un filé, ou rets, qu'il auoit mis sus son bouclier: ainsi gaigna pour son païs les terres querelees, en l'an du monde 3356. auant la natiuité de Iesus Christ 606. ans. Il fut Seigneur, & cōme Roy, par dix ans. puis de son gré laissa cette charge, mesme des terres qu'on luy dōna, en laissa vne partie, disant, *la moitié est plus que le tout.* Batailla cōtre Cresus, (comme aussi feit Solon) & mesme refusa son or & argent, protestant qu'il auoit deux fois plus qu'il ne vouloit: ordōna que les yurongnes fussent punis au double. Sensuyuent aucunes de ses sentences: *Estre en autorité esprouue l'homme. La terre est fiable, la mer non. C'est le faict d'un sage de preuoir les infortunes, & y obuier: & d'un fort de cueur, quand elles sont auenues, les porter patiemment. Ne reuele ce que tu veux faire, car si tu n'en viens à chef, tu seras mocqué. Ne reproche à personne son maleur.* Voyez Dioge. Laër. li. i.

B I A S de Priene (ville pres de Milet, la riuiere de Meādre entre deux) cōme chacun s'enfuyoit trouffant ses hardes, à la prinse de la ville, & luy n'emportant rien, fust aduertit de faire le semblable: respōdit, ie le fay, car ie porte tout mon bien avec moy: ainsi ne voulut estimer ses biens, les abus & ieux de fortune, que lon estime tant: autant en dist Stilpo à Demetrius Polyorcetes, à la prinse de Megare. Sensuyuent aucunes sentences de Bias, qui mourut doucement, endormi au giron du fils de sa fille: *Malheureux est qui ne peut supporter mal-eur, ou male fortune. C'est vne maladie d'esprit, aymer & conuoiter les choses impossibles, & n'auoir souuenance des pertes & experiences d'autruy. Pour cause des richesses ne louë l'homme indigne. Attribute à Dieu tout le bien que tu feras.* Voyez comme dessus. & Cice. aux Para. Vale. li. 7. cha. 2.







CLEOBVL de Lindus, anciennement ville de l'isle de Rhodes, fut l'un des sept Sages de Grece. & passoit de force & de beauté tous ceux de son temps. on luy attribue l'enigme suyuant: Vn pere a douze enfans, dont chacun a trente filles, mais toutes differentes, celles-cy sont blanches, celles-là sont noires de visage: & cōbien, qu'elles soyēt immortelles, nonobstāt elles meurent toutes. Or cela signifie l'an, qui a douze moys, chacun desquels a trente iournees: lesquelles sont bigarrees, car de iour sont blanches, & de nuict noires: & iaçoit qu'elles soyēt immortelles, c'est adire qu'elles retournent tousiours, toutesfois elles meurent toutes incontinent l'une apres l'autre. Sensuyuent aucunes sentences de Cleobul: *Entretien tes amis par bien-faiçts, à ce qu'ils te soyent encor plus amis: & de tes ennemis fais en tes amis.*

*Il fault estre plus prest & curieux d'escouter que de parler. Avec femme ne fault vser de mignotise & flaterie: ny aussi en presence d'estrangers, tenser & debatre: cela demonstre l'homme sot: ceci, l'homme fol. Voyez Diog. Laër. li. 1. il eut vne fille Cleobuline, renommee en enigmes qu'elle mit en vers heroiques.*

PERIANDRE de Corynthe, fut l'un des sept sages de Grece: il y en a qui s'abusent en le prenāt pour le tyran qui estoit du temps de Sedechias: mais y en a eu deux de ce nom, & tous deux de Corynthe: l'un renommé en sagesse, l'autre en tyrānie, qui sont choses bien contraires. Voyez Rhod. li. 2 1. cha. 37. Sensuyuent aucunes sentences de Periander: *Tranquillité est bonne chose, temerité est dangereuse. Gain ou profit terrien, est chose vile.*

*Plaisirs mondains sont transitoires: honneurs par vertu, sont immortels. En prosperité sois moderé: en aduersité sois auisé, & prudent. En prosperité ou aduersité d'amis, sois leur tousiours semblable. Voyez comme dessus.*



SERVIVS Tullius fut 6. Roy des Romains , en l'an du monde 3387. avant la natiuité de Iesus Christ 575. Estant ieune enfant, vne flamme de feu apparut sus sa teste sans luy faire aucun mal (comme i'ay dit aussi d'Ascanius:) qui signifioit que quelque fois il seroit Roy, comme Tanaquil interpreta, laquelle depuis le nourrist soigneusemēt, avec ses enfans:& puis il espou-  
sa la fille de Tarquin susdict, & de Tanaquil: apres la mort duquel Tarquin Prisque, ledict Seruius Tullius fut eleu Roy des Romains par les Senateurs, & puis par le peuple. Il surmonta les Sabins, vainquit les Etrusques, cōtre lesquels eut guerre par l'espace de vingt ans: dont les plus rebelles estoient les Ceretās, & Vegens. fut le premier qui ordonna le cens, c'est adire que chacū bailleroit le denōbrement de ses biens par deuant les Censeurs, pour selon la valeur d'iceux, estre cottisé: chose (comme dit Tite Liue) tresutile à vn si grand Empire futur. Lors se trouua quatre vingts quatre mil chefs, tant de la ville de Romme que des champs. Il amplifia la ville de trois monts, Quirinal, Viminal, & Esquilin, & fit des fossez enuiron les murailles: & fut tué l'an 44. de son regne, par Tarquin l'orgueilleux, qui estoit son gendre, & à la suasion mesme de Tullia sa propre fille. Voyez Tite Liue li. 1. de la 1. Decade. Eutrope aussi li. 1. & Denis de Hali. li. 4.

OCRISIA, femme de Publius Cornicula, fut mere de Seruius Tullius, & serue captiue de Tanaquil, Royne susdicte. Plin ne li. 36. cha. 27. racompte merueilles de ceste Ocrisia, comment elle conceut Seruius Tullius: vous le pouez lire.



ESOP E fut vn homme fort laid, & difforme de corps & de visage: mais d'esprit fin & rusé, & de propos ioyeux, & recreatif: fut serf de condition & estat: viuoit du temps de Cresus Roy des Lydiens: (dont ie parleray cy-apres, & en la page suyuant, & là pourrez veoir la date du temps qu'il estoit viuant) estoit natif de Phrygie. Il a escrit des fables qu'Aristote ne dédaigne point d'alleguer au 2. li. de sa Rhetorique, ne Platō aussi en son Phedre: & Apuleius de Deo som. En cest endroit-ci, ny le lieu ny le tēps ne me permettent racompter sa vie, ny ses fables: & aussi elles sont si cōgnues, & communes, qu'il n'est ia besoing m'en traouiller ici. Qui vouldra, voye & lise Raphael Volaterran liu. 13. & 38. & la vie d'Esop descrite en Grec par Maximus Planudes, qui a aussi esté traduite en latin. Il fut par enuie, fausement accusé de larcin en la ville de Delphos: & luy auoit-on mis secrettement en sa couche vne fiole d'or, dont puis apres surprins, & accusé, luy poure innocent fut ietté du haut d'un rocher: & ainsi mourut.

RHODOPE, ou Rhodopis, estoit vne femme de mauuais gouvernement de son corps, tresbelle toutesfois, & natiue de Thrace: elle fut serue, ou seruante, en la maison mesme ou Esop estoit serf, ou seruiteur, & tout d'un temps. Depuis fut affrâchie, deliuree de seruitude, & rachetee à grosse somme d'argent par Caraxus, frere de Sapho. Pline li. trēte six cha. douze, escrit qu'elle, par sa beauté, amassa tant d'argent, qu'elle fait bastir & eriger vne triomphante & somptueuse tour, ou pyramide.



**CRESVS** fut Roy de Lydie en l'an du mōde 3402. auant la natiui. de Ies. 560. ans. Luy estāt fort abondāt en trefors, se courut les Babylonienſ contre Cyrus: toutesfois vaincu, se retira en son royaume de Lydie. Mais Cyrus venu au dessus de ses affaires contre les Babylonienſ, se iette en armes sus la Lydie, ou il deffit facilement l'armee de Cresus, ia affoiblie, & estonnee du mauuais choc de la fortune, qui auoit bien-dit à Cyrus. Ainsi Cyrus prent Cresus, le fait lier, & mettre sus vn grand tas de bois pour le bruler tout vif avec 14. ieunes enfans Lydiens. Lors Cresus s'escria par trois fois à haulte voix: *O Solon, Solon, Solon.* Ce que Cyrus entendant, voulut sauoir que signifioit: & Cresus respondit, que sus l'heure luy estoit souuenu que Solon luy dist vne fois, *Que nul n'est bien-heureux en ce monde auant la mort.* Adonc Cyrus se repentit, recongnoissant que luy aussi estoit homme, & que la fortune luy pourroit vn iour autant mal dire. si commanda que le feu, ia alumé, fust tost estaint: & depuis eut Cresus en grand honneur, & le feit l'vn des principaux de son conseil. Voyez Herodote, lib. 1. & Iustin li. 1.

**SOLON**, l'vn des sept sages de Grece, dōna loix aux Athenienſ, abolist celles de Draco, qui estoient trop seueres: fors toutesfois celles qui punissoyent l'homicide: refusa la principauté: & mesme voyant Pisistratus son parent l'vsurper, demanda aux Athenienſ licence pour dix ans, & alla en Egypte vaquer à l'estude de sapience. Puis mandé par Cresus, & ayant veu tous ses trefors, ne les estima rien: disant que *Nul n'est bien-heureux auant la mort.* Voyez Plutarque en Solon. il mourut à Rhodes aagé de 80. ans.



CYRVS fut premier Roy de Perse en l'an du mōde 3403. auāt la nat. de Ies. 559. ans. & regna 30. ans. il fut fils de Cābyfes, & de Mandane, qui estoit fille d'Astyages, Roy des Medes. A douze ans les bergers l'appellerēt Roy, par ieu: car entre eux fut nourri, par ce qu'Astyages, qui auoit songé que de la nature de sa fille sortoit vn sep de vigne, qui couuroit toute l'Asie, cōmāda à Harpagus qu'il print Cyrus, & le tuaist: mais Harpagus le bailla à Mitradates, lequel le bailla à sa femme Cyno, qui l'alaieta au lieu du siē, mort. Deue nu grād, fait guerre cōtre Astyages, par la menee de Harpagus, chef. d'armee d'Astyages, qui se vouloit vēger du Roy, qui luy auoit fait manger de la chair de son fils, par ce qu'il n'auoit tué Cyrus, quand il fut né: toutesfois les Medes meirent en fuite les Persans: mais leurs meres & femmes leur vont au deuant & descouurans leurs ventres, demandent s'ils veulent rentrer dedans, & s'y cacher: lors de honte retournent en bataille, & la gaingnent. Adonc fut Cyrus Roy de Perse & de Mede: il print Babylone (selon la Prophetie de Daniel) & en fut occis le Roy, Baltasar, & vingt ans deuāt, auoit regné sur les Medes. Daniel ch. 5. & Esd. li. 3. cha. 3. l'appellent Darius. Voyez Iustin li. 1. Herod. li. 1. Oro. li. 2. ch. 6. Plut. des Dames. Xen. li. 8.

TOMIRIS, Royne des Massagetes, pour se venger de la mort de son fils, que Cyrus auoit deffait & occis avec les siēs, par vne ruse, & surprise fait guerre cōtre Cyrus, & le surprīt (avec les siens, ioyeux de la recēte victoire) par mesme dol qu'il auoit fait l'autre: & de ses gens qui estoyēt vingt mil, iamais hōme n'en retourna dire des nouvelles. Elle fait chercher le corps de Cyrus entre les morts: luy fait trēcher la teste, qu'elle mit dās vn vaisseau plein de sang humain, en disant: *O Cyrus, tu as tué mon fils par dol, & surprinse, & as eu soif du sang humain, dont tu as esté insatiable par trente ans, maintenant saoule toy de sang humain.* Voyez comme dessus.



ZOROBABEL, fils de Salathiel, fut Duc, Chef, ou Capitaine & gouverneur des Iuifs en l'an du monde 3418. auant la natiuité de Iesus Christ 544. ans. Par la permission de Cyrus Roy de Perse (dont auons fait mention ample, cy-deuant en la page prochainement precedente) lequel Cyrus auoit prins Baby lone, & transporté le royaume & Monarchie aux Perses, Zorobabel sortit de la captiuité Babylonique avec le Grand-prebstre ou Pontife Iosue, & plusieurs mille des Iuifs, qui commencerēt à reedifier le temple depuis les fondemens, mais l'œuure fut empeschee premierement par les peuples circonuoisins, puis par Cambyses fils de Cyrus, lequel Cambyses est appelé Artaxerxes: mais apres luy Darius fils de Hystaspes permit poursuyure l'edifice encommencé. Voyez Esdras i. liu. i. cha. & les chapitres suyuant, & pareillement Aggée & Zacharie prophetes: aussi le Ecclesiastique chap. 49. & Iosephe liu. des Antiquitez 10. chap. 1. Carion li. 2.

IEHOSUA ou Iosue, autrement aussi nommé Iesus, fut Grand-prebstre ou Pontife des Iuifs, du temps de Zorobabel susdict. Voyez les liures & passages alleguez cy-dessus. Philon recite que cestuy a escrit l'histoire de Iudith & d'Hester.



**HIPPONAX**, Poete Iambique, fut renommé de grande laideur & difformité : pourquoy Bupalus & Anthermus, sculpteurs, ou imagers, le contrefeirent, & meirent en euidéce publique mēt son image, ou effigie, par maniere de moquerie, & pour faire rire les gens. Ce que le Poete eut à si grand deplaisir, & porta si indignement, & impatientement cest outrage, qu'il desgaina l'espee de son esprit, à sauoir ses vers, contre eux, avec telle vehemence & vindication, que d'aucuns dient qu'il les contraignit à se pendre: tant trouuerēt amere & poignante la force de sesdicts vers. Lon dit aussi qu'il inuēta le Scazon, qui est vne certaine espeece de vers iambic, lequel vers iambic, de son nom, fut appellé Hipponactic. Voyez Pline li. 36. cha. 5. Cestuy Hipponax viuoit, & Poetisoit en honneur, enuiron l'an du monde 3424. auant la natiuité de Iesus Christ 538.

**BVPALVS** & Anthermus, freres, & fils d'Anthermus de l'Isle de Chios, furent tailleurs d'images singuliers, & fort renommés. L'on tient qu'ils feirent vne image à la semblance du Poete Hipponax, pour moquerie, à cause qu'il estoit fort laid, comme i'ay dit: mais quant à ce que lon dit qu'ils se pendirēt, se sentans touchez au vif par les vers & vengeance du Poete, Pline n'en est d'opinion: ains dit que depuis les vers ainsi composez, feirent plusieurs images aux lieux circonuoisins, mesme en Delos, sous lesquelles, y mirent des vers à leur louange sous tel sens, que l'isle de Chios n'estoit point seulement renommee en bon vin, mais aussi en bons ouuriers & artisans, fils d'Anthermus. Lon dit qu'en icelle isle y auoit l'image de Diane, de leur ouurage, laquelle mise en lieu haut, monstroit triste visage à ceux qui entroyent, & ioyeux & riant à ceux qui sortoyent. Voyez comme dessus.



TARQVIN le fier 7. & dernier Roy des Romains, regna 25. ans, commenceans en l'an du monde 3 4 3 1. auant la natiuité de Iesus Christ 5 3 1. an. il fut fils de Tarquin le Prisque, & gēdre de Ser. Tullius. Ayāt prins la dominatiō sans election des Senateurs ny du peuple, fait mourir les principaux, & son nepueu Tarquin, fils de sa sœur, & frere de Brutus, à cause qu'ils auoyent donné faueur à son dict precesseur Ser. Tullius. Fut le premier qui inuēta plusieurs sortes de tormēs, nerfs de taureaux pour foyter, bastonnades pour fraper, cheines & carquants pour lier & enfermer, fers chauts pour bruler, & bannissemens. Il vainquit les Volsques, sur lesquels print d'affault Suesse-Pometie, & Gabes, deux bonnes villes, & fortes: edifia vn temple à Iuppiter, au Capitole. Mais assiegeant la ville Ardee, fut avec toute sa race, dechacé par les Rōmains, desquels il estoit haï, qui prindrēt occasion sur l'efforcement faict à la chaste Lucrece, par le fils du dict Roy. Ainsi sa gēf-d'armerie le delaiissa: & luy s'en vint pour entrer à Romme, ou il trouua visage de bois. Voyez Tite-Liue li. 1. Denis de Hali. li. 4. & Eutro. li. 1.

TULLIE, fut femme de Tarquin l'orgueilleux, & fille de Ser. Tullius, tresmeschante: car outre ce qu'elle fut consentant à la mort de son pere, elle se fait porter audacieusement dans vn chariot, au Palais, ou s'assembloyent les gens d'autorité, & sans aucune reuerence enuers eulx, appela son mari, & luy sorti, adōc elle par vne arrogance fut la premiere qui l'appela Roy: Puis lon dit qu'au retour, elle commanda au chartier faire passer le chariot sus le corps de son pere, qui estoit là tout mort estendu en la rue. Voyez comme dessus.





CAMBYSES, fils de Cyrus, fut second Roy de Perse, en l'an du monde 3433. auant la natiuité de Iesus Christ 529. ans. Esdras li. i. cha. 4. l'appelle Artaxerxes, & dit qu'il fait cesser la reedification du temple, & cité de Ierusalem, que son pere auoit permise. Sous cetuy les Hebreux diét auoir esté fait ce que nous lisons en l'histoire de Hester: les autres le remettent au regne de Darius, fils d'Hystaspes. Il vainquit Psammenit, dernier Roy de Egypte, & adiouta ce royaume au sien. Estant fasché des superstitions des Egyptiens, commanda abbatre le temple d'Apis, & de leurs autres dieux, ou idoles. Aussi enuoya son armee pour destruire le temple de leur dieu Ammon: mais icelle siene armee, fut toute perie, & perdue dans les sablons mouuans de Libye, la deserte. Il fait tuer son frere Smerdis: print sa sœur en mariage, laquelle aussi puis apres il occist. En fin se tua soy-mesme de sa propre espee, comme il assiegeoit Actabane en Egypte, l'an 8. de son regne. & apres luy regna Smerdes Magus sept moys: puis apres Darius fils de Hystaspes. Il y a eu vn autre Cabyfes, ayeul paternel de cestuy. Voyez Hero. li. 3. Xenophon li. 8. de la Cyropédie. Iustin li. i. Iosephe li. ii. cha. 2.

HOLOFERNES, Chef de l'armee de Cambyfes, fut par luy enuoyé contre les nations qui ne se vouloyent rendre à luy: & luy fut commandé ne pardonner à nul. Or comme il assiegeoit Bethulie, les habitans mourans de soif, se vouloient redre à luy: mais par le fait Heroique de la prudente & vaillante Dame Iudith, furent deliurez: car elle coupa la teste à Holofernes. Voyez le liure de Iudith.



EPIMENIDES Poete natif de Cádiz, comme les Atheniens estoient persecutez de peste, dist qu'il falloit expier, c'est-à-dire purger la ville d'Athenes par certaines ceremonies, & sacrifices. les habitans ayans ouy le bruit de ce propos, enuoyerent vers luy, & le prierent de venir en la ville pour faire l'expiation qu'il entendoit, contre la pestilence. Luy venu, commanda immoler & sacrifier en la place dicte Areopage, des brebis blâches & noires. Puis ayant appaisé ceste pestilence, s'en retourna en son païs, & ne voulut prendre aucun argent des Atheniens: car aussi Poetes ne sont pas communemēt subiets à l'auarice. Estant ieune, fut enuoyé aux châps par son pere Agiasarchus, pour garder les brebis, & dit-on qu'il s'endormit en vne cauerne par l'espace de pres de 80. ans. Ion dit aussi qu'il fut le premier qui expia maisons, & châps: il expia Athenes en l'an du monde 3368. auant la natiuité de Iesus Christ, 594. ans. Voyez Diog. Laer. li. 1. Plato li. des loix 1. & 2. Apul. li. 2. des Florides.

PYTHAGORAS Philosophe, natif de l'isle de Samos, florissoit en l'an du monde 3439. auant la natiuité de Iesus Christ 523. ans. il fut le premier qui dist, *Amitié estre vne equalité, & qu'entre les amis tous biens sont communs*: aussi ses disciples mettoyent tout en commun, & faisoient silence par cinq ans. Il defendit manger chose qui a vie, acoutumant les gens à viure plus facilement. Ion dit qu'il fut le premier qui enseigna aux Grecs à peser & mesurer: & que l'estoile du iour, & celle de la nuict, n'estoit qu'une. il disoit qu'il ne faut point outrepasser la balance, ny toucher le feu avec vne espee, ny pissier contre le Soleil, ny aller hors le grand chemin. & plusieurs autres sentences que pouuez voir en Diog. Laër. li. 8.



**DARIVS** fils de Hyftaspes, fut eleu Roy de Perse, à cause du hannissement de son cheual: & regna 36. ans, commenceans en l'an du monde 3441. auant la natiuité de Iesus Christ 521. an. deuant qu'il fust Roy, furent tuez Smerdis & Patizithes, qui auoyēt vsurpé le Royaume par force: mesme il tua Smerdis de sa main, quād Otanes eut descouuert que ce Smerdis n'auoit point d'oreilles, & que ce n'estoit celuy qui estoit frere de Cambyfes (lequel de faict auoit esté tué par le commandement de Cambyfes) non obstant qu'il se dist estre luy, par ce qu'il luy ressembloit de nom, & de visage. Darius eut à femme Atossa, fille de Cyrus, qu'aucuns dient estre Hester, & dient que ce Darius est nommé Assuerus par Esdras. Il permit aux Iuifs retourner en Iudee, & rebastir le temple, duquel il rendit les tresors: ordonna vingt prouinces, ou il enuoya gouuerneurs. & leur imposa tribut à chacun tant: car sous Cyrus & Cambyfes ne se leuoyēt tributs, ains le peuple de son bon gré apportoit des presens. il subiuga les Gettes: les Thraces se rendirent à luy, mais les Scythes le feirent fuyr. Voyez Herodo. li. 3. Iustin li. 1. Oro. li. 2. cha. 8.

**ZOPYRVS**, comme Darius susdict assiegeoit Babylone qui s'estoit reuoltee, & ne la pouuoit prendre, y ayant tenu siege pres de deux ans, vfa d'une ruse, & d'un si grād cueur, qu'il se fait couper, tout à propos, les leures, le nez, & les oreilles, puis s'enfuit vers les Babyloniés, disant auoir esté ainsi mal traité de Darius, & le menaccant de s'en venger. eux y adioutans foy, & bien ioyeux de ceste rencontre, le feirent Chef de leur armee, dont mal leur en print, car il rendit la ville à Darius: lequel l'aymant, qu'il disoit qu'il aymoît mieux auoir vn seul Zopyrus, que plusieurs villes pareilles à Babylone. Voyez comme dessus.



TARQVIN Collatin, mari de la belle & chaste Lucrece, estant au camp des Romains deuant la ville Ardee, soupoit vn iour avec les Princes, & Seigneurs: le propos fut mis sus, à l'honneur des Dames, chacun louë sa femme par sus les autres: le debat eschaufé, & le propos bien en train, Collatin va dire, quel besoin est-il de tant de paroles? en peu de temps on peult sauoir combien ma Lucrece surpasse toutes les autres. ils picquent iusques à Rôme: trouuent les brus, ou belles-filles du Roy en ieux, banquets, danses, pompes, & toutes dissolutions. puis vont en Collace, ou trouuent Lucrece de nuit bien tard, occupee en ourage de laine, au milieu de ses seruantes, chacune aussi occupee à sa tasche. Si iugent qu'elle emporte le pris, sus le debat mis en auant. Mais adonc la mauuaise concupiscence de violer Lucrece, surprint Sext Tarquin: qui quelque iour apres, s'en vint avec son espee toute nue vers elle dormant en son liët, lors que son mari estoit au Camp: & iouïst d'elle par force. la vengeance suyuit de bien pres le peché: car pour ce fait le pere fut dechacé du Royaume, & le fils violateur fut tué. Voyez Tite-Liue li. I.

LVCRECE noble dame Romaine, miroir de toute chasteté, incōtinēt apres auoir esté violee par force, de pesche messagers vers son pere, & vers son mari: leur mādē venir en toute diligēce avec leurs amis, car vn grād incōueniēt est aduenu, qui requiert celerité. ils viennent: elle leur cōfesse que son corps a esté violé, mais en se tuant tesmoigne que son cueur ne l'a point esté. Brutus (comme le pere & mari estoient troublez de plaints & pleurs) tirant le glaiue, dont Lucrece s'estoit tuee, va iurer par le sang treschaste d'elle, que par toute voye, il dechacera le Roy avec toute sa race, ce qui fut fait. Adonc l'estat Romain vint aux Consuls en l'an du monde 3456. auant la natiuité de Iesus Christ 506.



**CORIO LAN**, Patrice Romain fort belliqueux, apres auoir rapporté maintes victoires aux Romains, mesme des Volfques, sur lesquels il print le chasteau nommé Corioli, dont luy porte le nom de Coriolan, fut refusé demadant l'office de Consulat, & fut banni: car le peuple redoutoit sa trop grande audace: ioint qu'il estoit grand aduersaire des Tribuns, qui estoient establis pour defendre & soulager le peuple. Si se retire de despit vers les Volfques, qui le reçoient, & luy baillēt gens pour aller contre les Romains, lesquels il vainquit plusieurs fois: & mesme vint à vne lieuë ou deux pres de Romme, voulant destruire son propre pais, & ne luy voulant pardonner (quelques ambassades & requestes que lon luy feist) iusqu'à ce que sa mere & sa femme, portans deux de ses petis enfans, luy vindrent au deuant. Voyez Tite-Liue lib. 2. Eutro. lib. 1. Ici appert la force & vertu des pleurs & prieres des femmes: comme aussi de la femme de Meleager, en la 3. epi. d'Ouide, que Briseis enuoye à Achilles.

**VETVRIA** fut mere de Coriolan susdict, vers laquelle allerent les Dames Romaines toutes esplorees, & feirent tant qu'elle donna secours au grand danger où le pais estoit: car elle alla avec Volomnia, femme de son fils, & avec les deux petis Coriolans, prier sondict fils en son cāp de se vouloir retirer, ce qu'il feit à leur instance: iacoit que ia prié & sollicité par deux ambassades, n'en auoit rien voulu faire. Ainsi fut Coriolan adouci par pleurs, & prieres de femmes, qui par nulles harāgues d'hommes ne l'auoit peu estre. Pourquoy le Senat ordonna que seroit basti vn femenin temple à la deesse Fortune, auquel les femmes feyroient tous les ans leurs sacrifices, à tel iour qu'elles auoyēt deliuré la ville. Voyez comme dessus: & Denis de Hali. li. 7. & 8. Ce fut fait en l'an du monde 3 4 7 5. auāt la natiuité de Iesus Christ 4 8 7. ans.



PORSENA, autrement nommé Lartes, Roy des Clusins, qui estoient en Hetrurie, recueillit le Roy des Romains, Tarquin l'orgueilleux qui estoit dechacé: & en sa faueur fait guerre contre iceux, en l'an du monde 3 4 5 7. auant la natiuité de Iesus Christ 5 0 5. ans: & estant accompaigné dudit Tarquin, & de ses fils, tint la ville de Romme en crainte par 3. ans. mais le grand cueur de Mutius Sceuola en deliura la ville: car il tua vn des Seigneurs qui estoit aupres du Roy Porfena, comme il craingnoit demander lequel estoit le Roy. & n'y auoit pas long temps que Cocles auoit aussi vsé d'une grâde prouësse: car faisant rompre le pont Sublice, pour empescher que les ennemis entrassent en la ville, ce pendant qu'on l'abbatoit, luy-mesme tenoit le pas contre les ennemis. Aussi Publicola Consul, ioua d'une ruse, tuant partie des ennemis, qui furent enclos. Voyez Tite-Liue li. 2. & Martial, liu. 1. qui a fait vn bel epigramme de Sceuola.

CLELIA, fut l'une des pucelles que les Romains baille-  
rent en ostage au Roy Porfena, iusques à ce que leur appointe-  
ment fust parfait: mais elle d'un grand cueur de fille, comme  
Porfena campegeoit assez pres du Tybre, incita ses autres com-  
paignes à se sauuer, & fut leur guide à trauerfer à nage le Tybre  
(au desceu de leurs gardes) & les rendit à leurs parens. De quoy  
le Roy Porfena irrité la mande requerir: on la luy renuoye: lors  
tournant son ire en admiration, estima son fait par dessus celui  
de Cocles, & de Sceuola: & non seulement ne luy fait aucun tort,  
ains aussi l'honora, & luy donna de grace, vne partie de ses osta-  
ges. Les Romains pour memoire de sa magnanimité, luy feirent  
dresser vne statue, representant vne fille à cheual. Voyez comme  
dessus.



**XERXES** cinquieme Roy de Perse, fils de Darius Hyſtaſpes, regna 20. ans, commençans en l'an du monde 3477. auât la natiuité de Ieſus Chriſt 485. ans. il eut quelque different avec ſon frere ainſné Artabarzanes: mais le cas fut facilement apointé: & fut conclu, que ce Xerxes, fils d'Atoſſa, ſeconde femme du dict Darius, & fille de Cyrus, ſeroit Roy. Premierement ſubiugua les Egyptiens qui s'eſtoient reuoltez: puis mena ſi groſſe armee contre les Grecs, que iamais n'en fut veuë, ny eſcrite de pareille, ce dient les auteurs: ſi qu'il faiſoit tarir les petites riuieres, comme Scamander, quand les hommes & cheuaux en auoyent tous beu. Il eſtonna, & tormenta fort la Grece: brula Athenes, & autres villes circonuoifines. mais en fin fut bien repouſé par les vaillás capitaines Leonidas, & Themiftocles, & fut nauré deux fois pour vn iour: meſmement fut contraint s'enfuir dans vne petite barque de peſcheur, & ſe ſauuer en ſon païs. En fin fut tué avec ſon fils Darius, par Artabanus, qui affectoit le royaume, lequel auſſi receut ſon loyer par Artaxerxes. Voyez Iuſtin liu. 1. 2. & 3. Plutar. en la vie de Themift. & d'Ageſi. Herodo. lib. 7.

**CIMON**, vaillât capitaine Athenië, deſſeit par deux fois en vn iour l'armee de Xerxes, premieremēt par mer, ou il print 200. vaiſſeaux, puis par terre: & fait tant qu'il dechacea tout le reſte hors de Grece. Puis fait encor plus fort: car il trauerſa la mer, & print vne partie d'Asie la mineur. Ainſi faiēt riche du butin des ennemis, en distribua grande partie aux poures: & d'auantage tint table ouuerte aux poures, & aux paſſans eſtrangers. Voyez Plutar. en ſa vie.



**THEMISTOCLES**, Capitaine Athenien fort belliqueux, eloquēt & prudēt, chacea les Persans, avec leur Roy Xerxes susdict: reedifia Athenes, & l'enuironna de murs en l'an du monde 3492. auant la nat. de Iesus Christ 470. ans: & toutesfois ne fut point sans enuieux: & disoit souuent que les Atheniens ne luy donnoyēt estat, office ou autorité de bon gré, ny ne l'auoyent en estime: mais en troublement & tempeste auoyent recours à luy, comme on se sauue de la nuee suruenant, souz l'arbre nommé Platan: mais la tempeste passée, & le beau temps venu, ils le vouloyent arracher, & desraciner. Il fut donc dechacé, & s'en alla vers le Roy de Perse, qui luy commanda faire guerre contre les Grecs, & le feit Chef & cōducteur de son armee: mais incontinent, vainqueur de son courage, & ne donnant tant de lieu à son despit, ne voulut batailler contre son païs, pour quelques hōneurs & biens que luy offrist le Roy de Perse: ains ayma mieux prendre le choys de la mort, en beuuant du sang de taureau empoisonné: soit qu'il le feist par pitié de son païs ingrat, ou par desespoir d'estre vainqueur, lors que Cimon preux Capitaine Athenien florissoit: craignant, possible, venir à deshonneur, au lieu ou il auoit esté en honneur. Voyez Plutar. en sa vie. & Thucy. liu. 1. aussi Erasme en ses apophthegmes liu. 5. & 8.

**STESILEE**, femme excellente en beauté, fut aymee de Themistocles, & Aristides. & de là peult estre venuë l'enuie, & inimitié qu'ils ont tousiours eu l'un cōtre l'autre: ia-soit que lon die aussi qu'ils estoient dutout contraires de mœurs: si que tousiours estoit en opinion & auis, Aristides contraire à Themistocles. Voyez Plutar. en la vie de Themistocles.





**ARTAXERXES** fils de Xerxes susdict, fut Roy de Perse par quarante ans ou peu plus, cōmēceās en l'an du mōde 3497. avant la nati. de Ies. 465. ans. Il fut appelé par les Grecs simplement, Artaxerxes Longue-main, par ce qu'il auoit la main droite plus grāde que l'autre. Metasthenes le nōme Darius: & Esdras, indifferēment Darius, & Artaxerxes: car les Persans vsent de ces deux noms, comme noz Empereurs s'appellent Cefars, & Augustes. Pour venger la mort de son pere & de son frere il en tua le meurdrier Artaban, par vne galante ruse pour vn si ieune Prince: car il faingnit vouloir changer de harnois avec l'autre, & ainsi son ennemi descouuert, fut par luy trauersé de son espee. puis fait occire tous les enfans dudit Artaban. Iose. dit ce que nous lisons d'Hester, auoir esté fait sous ce Roy: combien qu'il y ayt apparece que ce fust sous Darius, fils de Hystaspes, que Metasthenes, Esdras, & Philon appellēt Artaxerxes-Assuerus. Voyez Esd. i. li. cha. 4. & 7. Iust. li. 3. & 10. Hero. li. 7. Plu. en la vie d'Artaxerxes.

**ESDRAS** Prophete, vint de Babylone vers Artaxerxes, & luy fait requeste, que bien amplement le Roy luy accorda, avec present de grād somme d'argent pour reedifier le temple, & permission aux Iuifs de s'en retourner: si s'en retourna en Ierusalē avec 1200. Iuifs sortās de captiuité: & eut charge & puissance de constituer iuges & gouuerneurs, & remettre sus, la republique Iudaique. il s'y porta d'un grand zele, & remit la loy de Dieu, iacq̃oit que les Chaldeens en eussent brulé les liures, mais il l'auoit toute en sa memoire par inspiration diuine. Voyez son i. li. chap. 7. & là commencent les 70. hebdomades de Daniel: Voyez aussi le 8. 9. & 10. cha. de sondict liure.



L. QVINTIVS Cincinnatus fut enuoyé querir par le Senat Romain pour estre Dictateur, en l'an du monde 3506. auant la natiuité de Iesus Christ 456. ans. Les commis à ce message, le trouuerent en labourant à la charue, de laquelle il fut appelé au plus grand honneur & office, & vestit lors la Pretexce, robe de dignité. & ainsi s'en alla à Romme, ou prenât l'estat de Dictateur, à luy offert, assembla vne armee, poursuyuit les ennemis, & en rapporta vne belle victoire: lors que Minutius Cōsul Romain, par les Eques & Volsques surmonté, auoit prins la fuite, & estoit enuironné & oppressé & de famine, & des ennemis: & se fust tresmal porté l'estat des Romains, si ledict Quintius ne eust mis le ioug sus les Eques, & tenant la victoire, comme le manche de la charue, n'eust premier chassé deuant luy, les ennemis, en les subiugant. il entra donc en leur camp & tentes bien munies de toutes munitions, donna tout ce riche butin à ses gēs, & pour luy ne reserua rien: & ce pendant tan soit & reprenoit le Consul Minutius & ses gens, en disant: *Vous ne participerez point à ce butin gainné sus l'ennemi, duquel vous auez presque esté le butin, & la proye.* Il eut l'hōneur de triomphe, comme il meritoit bien. Puis delaisa la Dictature pour retourner à l'agriculture. Voyez Tite-Liue i. Deca. liu. 3. & Eutro. liu. i.

RACILIA fut femme de L. Quintius, laquelle luy alla querir en sa maisonnette, la Toge, robe longue & honorable, quand l'Ambassade le vint querir pour estre Dictateur: car luy ayant ce mot entendu, ne voulut parler plus auant, aux Ambassadeurs, touchant le mandement du Senat, qu'il n'eust vestu sa robe d'honneur. Voyez comme dessus.



**SOCRATES** Philosophe, fut fils de Sophroniscus tailleur d'images, & de Phanareta, sage-femme, qui releuoit ou receuoit les enfans des accouchees. Il fut poure, mais par l'oracle de Apollo, estimé le plus sage du monde. delaiissa la Philosophie naturelle, pour la morale. fut toujours en vn estat, ne plus triste, ne plus ioyeux. florissoit en l'an du monde 3531. auant la natiuité de Iesus Christ 431. an. disoit que la vraye Philosophie estoit de se cōgnoistre soy-mesme: & qu'il faut estre tel que lon veult apparoir. en son cachet estoit grauee cette deuise: *l'ami de l'homme est son sauoir: & son ennemi est sa folie.* il ne fut point sans enuieux (comme ne sont volontiers gens de vertu) ains à cause de sa sapience & de ses disputes, par lesquelles il rembarroit si bien ceux qui s'estimoyent sages, acquist des ennemis: & fut faulusement accusé d'auoir mauuaise opinion de leurs dieux: fut toujours cōstant & sans crainte deuant ses Iuges: & ne se voulut seruir de la defence que Lysias, grand Orateur, luy auoit preparee en forme de belle harāgue pour remōstrer son innocēce deuant ses Iuges. beut cōstāmēt la poison à laquelle il fut cōdāné. mais puis apres les Atheniēs congnoissans leur faute, feirent mourir ses accusateurs: & si mirēt en leur temple vne image de cuyure pour representation & honneur de Socrates, mort iniquemēt. Voyez Cicero liu. 1. de l'orateur, Elian, & Pli. lib. 7. S. Augustin de la Cité de Dieu li. 8. cha. 3. & Diog. Laer. en plusieurs li. & les apoph. d'Eras.

**XANTIPPE**, femme de Socrates, luy fut fort tempestatiue, & iniurieuse iour & nuict: Alcibiades s'esmerueillāt de la patience de Socrates, luy demāda pourquoy il ne la dechassoit: & il respōdit, qu'en endurāt d'elle en la maison, il aprenoit, & s'acoutumoit à endurer des autres hors la maison. vn iour apres qu'elle luy eut bien crié, elle luy ietta de l'eau orde: lors il dist, ie sauois bien qu'apres le tonnerre viendroit la pluye. Gel. li. 1. chap. 17.



ASPASIE, fille d'Axiochus Milesien, fut fort sauante en l'art oratoire : & Pericles s'enamoura tellement d'elle, qu'il en delaiſſa ſa femme (auſſi luy & ſa femme ne s'accordoyēt pas fort bien) & print ceſte-cy en mariage: elle fut cauſe de grādes guerres: Pericles l'ayma tāt que toutes les fois qu'il entroit en ſa maiſon, ou qu'il en ſortoit, il la baiſoit. Voyez Plu. en la vie de Peri.

PERICLES, Capitaine des Atheniens fort preux & ſage, fut enuoyé avec le Poete Sophocles, en guerre contre les Lacedemoniens, qui faiſoyent grand degaſt au païs des Atheniēs: mais ce Pericles les repouſſa ſi bien, & tant gaſta leur païs auſſi, qu'il les contraignit faire trēues de 30. ans. toutesſois ſe rebelle-  
rent 15. ans apres, & vindrent courir derechef ſus les terres des Atheniens, y faiſans grans dōmages, fors qu'aux terres de Pericles: qui laiſſa paſſer ceſte fureur pour ceſte fois: puis y retourna, & pilla tout leur païs, ſi qu'ils renouellerēt trēues, & les feirēt pour 40. ou 50. ans, qui n'en durerēt toutesſois que ſix. Ce fut en l'an du monde 3536. auant la natiuité de Ieſus Chriſt 426. ans. & lors recommēça la guerre mortelle entre les Grecs, appellee Peloponneſiaque, qui dura 27. ans, laquelle eſt deſcrite par Thucydides & Xenophon. Si mourut Pericles apres qu'il eut gouuerné les Atheniens par 40. ans. Anaxagoras fut ſon precepteur, qui le rendit ſi eloquent que les Poetes Comiques l'appelloyent Olympius, à raiſon qu'il eſtoit ſi ardent & vehemēt en ſes harangues, qu'il ſembloit foudroyer ou tonner. Thucydides luy fut cōtraire en l'adminiſtration de la choſe-publique, & le repre-  
noit de ce qu'il faiſoit pluſieurs baſtimēs des deniers communs: mais le peuple fut pour luy, reſpondant qu'il pouoit bien baſtir des deniers publics. Voyez Juſtin li. 3. & Plutar. en la vie de Pericles, & les apophth. d'Eraſ. li. 5. & 8.



ALCIBIADES fut enuoyé, Chef de l'armée des Athéniens, contre les Siciliens en l'an du monde 3548. auant la natiuité de Iesus Christ 414. ans. il estoit florissant de ieunesse, de beauté, & d'eloquence. mais de son naturel fut plus adonné à faire amis, qu'à les entretenir, & pourtant luy qui auoit excité & conduit ceste guerre & voyage de Sicile, fut accusé en Athenes, & mandé par les Iuges & gouuerneurs, de venir en iustice, & laisser la guerre. luy donc (soit qu'il se sentist coupable, & redoubtast la iustice, soit de despit d'estre ainsi rengé, & soufms en iugement) secretement s'enfuit en Elis, qui est en la Moree, puis en Sparte: dont il concita le Roy contre les Atheniens. mais sa vertu attira & rencontra plus d'enuie que de faueur enuers les Spartains. Pourquoy auerti par la Royne (qu'il auoit cōgnue charnellemēt) que lon luy brassoit mauuais parti, se retira vers Tisafernes, Grād. maistre en la maison de Darius Roy de Perse. En fin mourut en Phrygie, par la conspiration & mandement des trēte Tyrans d'Athenes. Ceux qui auoyent charge de le prendre, ou tuer, ne l'osans assaillir apertement, mirent le feu au tour de la chambre ou il dormoit: mais luy, sortant subit, & se defendant d'un grand cueur, fut assommé. aucuns dient qu'en faueur des Lacedemoniēs, il fut ainsi tué par les gens de Pharnabazus: & les autres dient que ce fut par aucuns siēs familiers, desquels il entretenoit la sœur. Voyez Iustin. li. 5. Plutar. en sa vie, Thucy. li. 6.

TIMANDRE estoit vne femme de mauuais bruit, qu'Alcibiades entretenoit: & auquel, quand il fut mort, elle feit faire enterrement & funerailles en grande somptuosité. Lon dit que Laïs, fut fille de ceste Timandre: ainsi elle suyuit bien les traces de sa mere. Voyez Plutar. en la vie d'Alcibiades.




CONON fut eleu Chef-d'armee des Atheniens au lieu de Alcibiades. il mit par grand' industrie vne armee sus mer en l'an du monde 3553. auant la natiuite de Iesus Christ 409. ans: mais aux vaisseaux qu'il auoit assemblez, n'y auoit pas quantite de gens, requise: par ce que la force de la gens-d'armerie auoit este rompue & perdue au saccagement de l'Asie. & pourtant il y en mit & de vieillards & de ieunes pour remplir: si que telle armee, pour cause de l'aage, ne peut faire grande resistace, ains tous, que prins que tuez, y demeurerent, fors leur Capitaine Conon: qui craignant la rigueur des Atheniens, s'en alla à refuge vers le Roy de Cypre. Lors furent eleuz trente hommes que lon dit les 30. Tyrans d'Athenes, pour gouverner la Republique d'Athenes. les Lacedemoniens vainqueurs commirent Lysander au regime d'Athenes: toute la Grece fut remplie d'Atheniens fugitifs. Depuis Pharnabazus & Conon mirent armee sus mer, & feirent grans dommages aux villes maritimes des Lacedemoniens. il y eut bataille, & Conon vainquit. Voyez Iustin li. 5. & 6.

LYSANDER, Capitaine des Lacedemoniens, seditieux qu'il estoit, accusa, & mit en danger de la vie Alcibiades, par ses menes, & machinations enuieuses: & fut cause que toute la Grece fut esmue & incitee contre les Lacedemoniens. Il eut victoire de Conon sus mer, mais peu apres, la chance tournee, Conon le vainquit sus terre en bataille, ou fut tue ledict Lysander: & lors Conon recouura la liberte des Atheniens qu'il auoit perdue à la premiere bataille. Les Lacedemoniens ainsi vaincus, se ioingnerent avec les Thebains, ennemis mortels des Atheniens: mais furent encor avec iceux allies, vaincus. Voyez comme dessus, & Plutar. en sa vie.



THRASYBVLVS, qui estoit de grãd cueur & de grãd amour enuers le pais, apres estre dechacé par les 30. Tyrãs d'Athenes, assembla vne armee de tous ceux qui estoient dechacez comme luy: donna secours par armes, à la republique oppressee. mais fait premierement vn edict, que les torts & iniures d'vne part & d'autre ia faiçtes, seroyent remises & effacees. Ainsi vainquit les Tyrans, & remit sus, l'estat populaire, en l'an du monde 3558. auant la naissance de Iesus Christ 404. ans. Voyez Plutar. comme dessus, Iustin li.5. & Cice. aux Philip.

EPAMINONDAS, tres-vaillant Capitaine des Thebains, florissoit en l'an du monde 3590. auant la nati. de Ies. 372. ans. De bouche & d'habits fut fort moderé, & de corps bien endurant les trauaux. Il fut seul à qui Pelopidas (aussi vaillant Capitaine & son singulier ami) ne peut onc persuader de recevoir dons & presens. Il eut victoire sus les Lacedemoniës, mais nauré & demi-mort, demandoit si les ennemis luy auoyët point prins sa rondelle, quãd il estoit tombé: & quãd on la luy eut apportee, la print & embrassa, comme compaigne de ses labeurs & honneurs. puis demanda derechef, lesquels auoyent la victoire: & quand il entendit que c'estoyent ses gens, adonc alaigrement rendit l'esprit, se reiouyssant avec son pais, de ce bien. Lon doute s'il fut meilleur homme que meilleur Capitaine. Es offices & dignitez se porta si bien, qu'il les rendoit honorables, & non elles luy. fut si sauant es lettres, & en Philosophie, que lon s'esmerueilloit comment il estoit si expert en guerre, pour vn homme d'estude. Voyez Plutar. en la vie de Pelopidas. Iustin li.6. Cice. en l'epi. à Luceius.



**DIOGENES**, Philosophe Cynique, portoit vne robbe double cōtre le froid, vne bissache, & vn baston. il habitoit communement à l'entree des maisons, & des villes, & là demandoit sa vie. quand il se retournoit & son tonneau, il se gaudissoit, disant qu'il auoit vne maison qui tourne, & qui se change selon le temps: car durant le froid, il tournoit la bouche du tonneau au midi: & durant le chaud, au septentrion. Comme les autres Philosophes allassent vers Alexandre, quand il print la Grece, Alexandre vint vers cestuy: le trouue au Souleil, luy demande s'il a affaire de quelque chose: il luy respond, recule toy vn petit arriere de mon Soleil que tu m'empeschés. Alexandre le Grand fut si resiouy & esbahi de ceste response, qu'en s'en retournāt, comme aucuns de ses amis l'en gaudissoyent, & en riant l'en piquoyent, il respondit grauement: *Je voudrois, certes, estre Diogenes, si ie n'estois Alexandre.* Diogenes veit vn enfant qui beuuoit de l'eau avec la main: & considerant l'esprit de cest enfant qui se seruoit de la main, comme d'une naturelle tasse, ietta son escuelle. On luy demanda pourquoy on l'appeloit chien, il respondit: *pource que ie fay feste à ceux qui me donnent, ie iappe à ceux qui ne me donnent point, & ie mors les meschans.* il ne vouloit point estre enterré: & ses amis luy demanderent s'il vouloit que son corps fust mangé des bestes, il respondit, non: mais mettez vn baston aupres de moy pour les chacer. il viuoit en l'an du monde 3568. auant la natiui. de Iesus 394. ans. il y en a eu quatre autres de ce nom. Voyez Diog. Laër. & Pluta. en la vie d'Alex. & les apoph. d'Eraf.

**CRATES**, de Thebes, pour mieux Philosopher, ietta en la mer, grāde quantité d'or, en disant, *allez en fonds maudites cupiditez, ie vous noyeray, à fin que ie ne soye noyé de vous.* ainsi estima qu'il ne pouuoit ensemble retenir les vertus & les richesses. Voyez Cice. aux Paradoxes.





**PLATO**, Philosophe, fut fils d'Ariston Patrice, Citoyen d'Athenes, sa mere auoit nom Perictiona ou Prona. il estoit descendu de Codrus par son pere, & de Solon par sa mere: estoit en bruit en l'an du mōde 3 5 7 5. auāt la natiuité de Iesus Christ 3 8 7.ans. fut appellé Platon, pourtāt qu'il estoit large de corps, ou pour l'abondance de son eloquence: car au par-auant auoit nom Aristocles, comme son ayeul. A vingt ans s'adonna fort en Poésie: composa des Tragedies estimees, & autres vers, quil pronça avec vne fort douce voix, mais qui tēdoit plus à estre clere & deliee qu'autrement. Puis mettāt son cœur en Philosophie, laissa la Poésie. fut disciple de Socrates, & precepteur d'Aristote & de Xenocrates. fut trois fois en guerre, ou se porta vaillāt. fut trois fois en Sicile, & au retour de la derniere fois, fut vēdu, & si fut en danger de sa vie, par Denis le Tyran. fut en Egypte, ou il aprint tout ce qui estoit là en estime. diuisa la Philosophie en morale, naturelle, & rationale: vesquit quatre vints ans. lon escrit de sa mort diuersement. Voyez Plutar. en sa vie. Dioge. Laër. li. 4. S. Aug. de la Cité de Dieu li. 8. cha. 4. S. Iero. to. 3. en l'epist. à Paulin.

**ARISTOTE**, fils de Nicomach medecin, fut d'un village, nommé Stagyra, à 17. ans alla en Athenes, ou il fut disciple de Platon 20.ans. puis fut mandé par Philippe, Roy de Macedoine, qui luy bailla son fils Alexandre le grand, pour l'endoctriner: ou il fut vingt ans en grand honneur. puis retourna en Athenes, ou il fut accusé d'auoir mauuaise opinion de leurs dieux, & s'enfuit en Chalcis, ville de Negrepont, ou il mourut aagé de 73. ans. il a composé force liures, tāt de l'art oratoire, que de la Philosophie morale & naturelle. Voyez Plutar. en sa vie, & Diogen. Laër. liu. 5.



**BRENNO**, ou Brennus, fut chef & comme Roy des Gaulois, fort belliqueux: leua grosse armee, & passa en Italie (mais nō pas le premier, car les Gaulois l'auoyent assaillie 200. ans deuāt) eut grande victoire sus les Romains, pres le fleuue Allia: puis soudain tira droit à Romme, trouua les portes ouuertes ( car les Romains fort troublez, s'estoyent retirez au Capitole entra en la ville, la pilla & brula: puis appointa avec ceux du Capitole, apres les auoir tenus assiegez. mais sus le different du payement, & comme Brenno vouloit aussi peser son espee, voicy suruenir Camillus qui recouura l'honneur des Romains, en l'an du monde 3576. auant la natiui. de Ies. 386. ans. Voyez Tit. Li. 1. Deca. li. 5. Ce Brēnus, ou plustost vn autre de mesme nom (car ie trouue par la chronologie & cōpte du tēps, qu'il y a cent ans à dire) edifia Brenone, qui depuis a esté dicte Verone, en Italie: et deffait Sosthenes, print le Royaume de Macedoine ayāt avec luy 150000. hōmes-de pié, & 15000. de cheual: mais en fin son armee fut defaite en Delphos, & luy se tua. Voyez Iustin li. 24. Des Gaulois de Gallogrece, voyez Tite-Liue li. 8. Deca. 4. & Iustin li. 25. qui dit aussi au li. 20. que les Gaulois ont chacé les Toufcans de leur pais: & ont edifié en Italie Milan, Come, Bresse, Bergame, Trente, & Vicense.

**M. FVRIVS** Camillus noble Romain, fut en exil, pour cause du butin gaingné sus les Vegens, & en y allant prioit aux Dieux q̄ bien tost la ville le regretast, si c'estoit à tort qu'on le dechaçoit: ce qui auint, car tost apres, fut eleu Dictateur, en vn tres grād affaire: & subit alla apres les Gaulois, & leur Roy Brēnus, qu'il feit sortir hors des terres Romaines: & recouura l'or qu'ils auoyent receu en apointement, ce dit Tite Liue. car Suetone dit qu'il y en a qui attribuent plus tost ce recouurement à Drusus. Quoy qu'il en soit, Camil fut cinq fois Dictateur, & triompha quatre fois. Voyez Plutar. en sa vie. Eutro. li. 1. Tite-Liue li. 5.



**MAVSOLVS**, Roy de Carie, qui est en Asie la mineur, mourut en l'an du monde 3586. auât la natiuité de Iesus Christ 376. ans.

**ARTEMISIA**, femme du Roy Mausolus susdict, luy porta telle amour, qu'elle ne voulut onc permettre les cédres du corps de son mari estre mises ailleurs qu'en son estomac, & les beut avec du vin, ou (comme les autres dient) avec de l'eau mixtionnée d'odeurs. outre-plus luy fait eriger vn sepulchre fort excellent, & digne d'estre nommé entre les sept merueilleux edifices du monde. Scopas y trauailla, du costé d'Orient, Bryaxis de Septentrion, Timotheus du Midi, Leochares d'Occidēt: & auât qu'ils eussent acheué la besongne, Artemisia mourut: nonobstât ne desisterent, iusque l'ouurage fust parfait: estimans que seroit vn chef-d'œuvre, à leur gloire & renom, & à l'honneur de leur art, à tout. i. jamais. Dauantage Artemisia, celebrant les obseques & funerailles de son dict mari, ordonna vn pris, d'argent & d'autres choses riches & precieuses au mieux-preschant les louanges de son mari. A ce pris, & combat de langues eloquentes, vindrēt gens diferts de toutes pars, mesme Isocrates & Theopompus, lequel fut iugé auoir gainné le pris. Ce fait, donnant Artemisia treues à ses larmes, leua vne armee pour defendre sa ville de Halycarnas, contre les Rhodiens: eut victoire, & print Rhodes pour la seconde fois. Encor elle secourut le Roy Xerxes contre les Lacedemoniens. Voyez Iustin li. 2. Herodo. li. 7. Plin. liu. 36. cha. 5. Aul. Gel. li. 10. cha. 18. & Boc. des Dames de renom.



**PHILIPPE**, fils d'Amyntas, fut Roy de Macedoine en l'an du monde 3603. avant la nat. de Ies. 359. ans. Premièrement fait guerre aux Atheniens, & les vainquit: puis ne leur fit aucun mal en leurs corps ny en leurs biens. alla contre les Esclavons, & en deffait plusieurs mille: puis contre les Theffaliés, parce qu'il desiroit se renforcer de leur caualerie. Eut l'œil droit creué au siege de Methone, d'un coup de fléche: qu'il porta si patiemment que peu apres les Methoniens le requerās d'apointer, furent receus. aussi estāt brocardé par Demades son prisonnier, de danser apres vin boire, & par vne insolence, en se glorifiant de sa victoire d'Athenes, & se moquant de ses prisonniers presens, l'endura: & mesme le mit en liberté, & tous les autres: & encor enuoya en Athenes pour traiter paix & alliance. En fin eleu chef & Empereur de toute la Grece, se prepara pour se ruer avec grosse armee sus les Perses: mais lors Pausanias le tua (pource qu'il ne luy faisoit iustice de quelque tort) & ce, par la menee de sa femme repudiee, & de son fils Alexandre, qui se doutoit que son frere puisné, & fils de sa marastre Cleopatra, succedast au Royaume: cas fort piteux & estrange: mesme que ce pere auoit si bien fait endoctriner ce fils par Aristote, auquel il escriuit, disant qu'il s'estimoit eureux que son fils estoit né de son temps. Iustin li. 7. & 8. & Diod. Sici.

**OLYMPIAS** fut fille du Roy des Molosses, femme de Philippe susdit, & mere d'Alexandre le grād. elle doléte d'estre pour sa paillardise repudiee de son mari, machina sa mort, avec son fils, & occist Cleopatra, la seconde femme de son mari: puis fut assiegee par Cassander, qui la fit aussi tuer. Iustin, li. 9.



**DEMOSTHENES** Orateur Athenien, florissoit en l'an du monde 3615. avant la natiuité de Iesus Christ 347. ans. il fut fils d'un forgeron de couteaux, qui luy laissa beaucoup de biens, mais eut à souffrir par la fraude de ses tuteurs, lesquels il poursuyuit par iustice, & recouura bonne part de son bien: ainsi plaidant pour soy mesme, aprint à plaider pour les autres, mesme harāguer pour la republique. vray est qu'au commencement n'auoit grace en ses gestes & prononciation, mais, par grand' sollicitude & peine, recompēsa ce defect de nature. Souuent demoura deux ou trois mois solitaire à exercer ses gestes & prononciation, & estudier, iusqu'à deuenir tout palle, & se faire tondre à demi, à ce qu'il ne sortist. Lon douta s'il auoit plus grand esprit que doctrine: & dit-on qu'il despēdoit plus en huyle qu'en vin, à cause qu'il veilloit à la lāpe, plus que tous artisans. son but principal fut de resister aux efforts de Philippe de Macedoine: apres la mort duquel, fut aussi auteur que toute la Grece se reuolta. puis fut chacé, pour suspect d'estre corrompu par argent, mais fut rappellé avec grand honneur. & peu apres s'enfuit, craignant Antipater, qui venoit vers Athenes, lequel enuoya Archias apres luy, pour luy persuader de s'en retourner. ce qu'il ne voulut, ains faignant vouloir escrire, auala la poison qui estoit dās sa plume. voyez Plutar. en sa vie, & Iuue. Saty. 10.

**L A I S**, putain fort belle & braue, habitant à Corynthe, fut secretement abordee par Demosthenes, à qui elle demanda dix mil pieces de trois solz & demi, pour vne seule nuit: & il respon dit: *Je n'achette point si cher vn repentir.* Voyez Aul. Gel. li. 1. cha. 8. & Macro. Sa. li. 2.



M. VALERIUS, estant Tribun de guerre, ieune de 23. ans, se presenta au combat contre vn Gaulois, qui demandoit se battre à quelque Romain. quand vint aux aproches, voici vn corbeau qui se plante droit sus l'armet de Valerius, le bec tourné contre son ennemi, & n'en bougea iusqu'en fin du combat: pendant lequel, autant qu'ils se ruoyent de coups, autant de foys aussi ce corbeau se soufleuoit sus ses ailes, & venoit esgrafigner l'autre de son bec & de ses griffes: tant que l'affaillât estonné du cas, & troublé de ses yeux, & de son esprit, fut vaincu & tué par Valerius, qui depuis fut nommé Coruinus, à cause du corbeau. Le Consul luy donna dix bœufs, & vne couronne d'or. Ce fut l'an du monde 3617. auant la nati. de Ies. 345. ans. Ti. Li. Deca. i. li. 7. Eut. li. 2. Oro. li. 3. ch. 6. Au. Gel. li. 9. cha. 11. Va. li. 8. ch. 14.

M. CVRIVS Dentatus, Consul Romain, ruina les Samnites en l'an du mōde 3673. auant la nati. de Iesus 289. ans. Lors print fin la guerre des Samnites, qui auoit duré 49. ans: & n'y eut onc au parauant, ennemi habitant en Italie, qui ayt tant tourmenté les Romains. Iceux Samnites enuoyerent Ambassadeurs vers Curius, luy offrans force or: lequel assis sus vn banc rural, & mangeant en vn plat de boys (telle vaisselle mōstre bien quelle viande c'estoit) en se riant leur dist: retirez-vous Ambassadeurs de superfluité: & dites aux Samnites que M. Curius ayme mieux dominer sus les riches, que d'estre riche: reportez ce present: & retenez-bien, que ie ne puis estre par guerre vaincu, ny par argēt corrompu. Iceluy-mesme, ayant chacé d'Italie, le Roy Pyrrhus, ne print rien de tout ce grand butin, dont il enrichist l'armee, & la ville. Eutr. li. 2. Vale. liu. 4. cha. 3. Plin. li. 8. cha. 6. des elephans premier veuz à Romme.



**TIMOLEON**, noble & vertueux homme Corynthien, fut enuoyé en Sicile avec petit nōbre de galeres en l'an du monde 3618. auāt la natiuité de Iesus Christ 344. ans, pour deliurer la ville de Syracuse de la tyrannie de Denis le Tyran. cinquante iours apres son arriuee, il print la ville: puis asiegeāt le chateau, contraignit le Tyran à se rēdre, & l'ēuoya avec quelques autres en exil à Corynthe: & rafa le chateau, restituāt en liberté les Syracusans: repeupla la ville de gēs venās de la Grece, & leur ordōna loix. ainsi ayant remis la ville en estat, & de toutes pars gens y abordans, luy voulāt mettre toute la Sicile en liberté, & exterminer les tyrās, se rua sus, alla assaillir les autres villes, & cōtraignit Icetes à promettre d'abatre les fortresses, & viure simplement & sans charge, avec les Leptins. il enuoya ausi le Tyran Leptin, en exil à Corynthe, ou Denis le Tyran viuoit bien pouement: car Timoleon estimoit vne belle chose de voir les Tyrans de Sicile viure en exil, & poureté à Corynthe. Les Carthaginois arriuez à Lilybee avec sept mil combatans, deux cens galeres & mille grosses naux, furent en peu de temps par luy deffaits sus la riuere de Cremise: & avec trois mil hommes en tua enuiron dix mil: print deux cens chariots, & cinq mil prisonniers. Voyez Plutar. en sa vie.

**DENIS** le Tyran, par faueur de soldas succeda à son pere de mesme nom. du premier, mit trois mil captifs en liberté: remit les tributs pour trois ans, pour acquerir la faueur du peuple. mais ayant occis ceux qu'il doutoit, & voulant faire le semblable des autres, se fait haïr pour sa cruauté. fut chacé par Dion, puis par Timoleon: & fut reduit en estat de poure maïstre d'escole à Corynthe. Justin li. 22. Cicc. aux Tuscu. li. 4. Vale. li. 6. cha. 11.



ALEXANDRE, le grand, succeda à son pere Philippe, au royaume de Macedoine, à vingt ans, & en l'an du mōde 3628. auant la nat. de Ies. 334. ans. il fut de si grand cueur, mesme en bas aage, que quand on faisoit les feuz de ioye pour quelques vietoires de son pere, luy pleuroit, & disoit que son pere conqueroit tout, & ne luy lairroit rien à conquerre. premieremēt mena son armee en diligence pres le Danube, & deffit Syrmus, Roy des Triballes: puis alla contre les Thebās, qu'il deffit aussi, car ils se reuoltoyēt: pilla & rasa leur ville, pour donner crainte aux autres villes de Grece de ne se rebeller. fut par les Grecs appellé Empereur: & lors fut traité du voyage contre les Perses, ou il alla, apres auoir donné & departi à ses amis ses terres de Macedoine & d'Europe: disant que l'Orient, qu'il alloit conquerre, luy suffisoit: & que les Perses auoyent assez long tēps tenu l'Empire, & qu'il falloit qu'il changeast de main, à ceux qui le gouuernoient mieux, entendant de luy-mesme. brief, emportant ce seul tresor d'esperance avec luy, paruint à ses attaintes. aussi ses gens le suyurent d'un grād cueur, & laissant femmes & enfans, sans craindre si lointain voyage, estimoyent les richesses de l'Orient estre ia leur proye. il auoit 32000. hommes de-pié, 4500. de cheual 182. vaisseaux sus mer. eleut de vieux routiers de guerre. vainquit Darius, Roy de Perse: print sa mere, sa femme, & ses deux filles, qu'il traita honorablement: deffit 20000. hommes de-pié 15000. de cheual. tint Inde, iusqu'au fleue de Gāges: print Babylone, pilla Persepolis. Plutar. en sa vie. & Iustin.

THALESTRIS, Royne des Amazones, alla vers Alexandre, le requist de coucher avec elle: ce qu'il fit. Voyez Iustin li. 2. & 13. Quin. Cur. li. 6. Oro. li. 3. cha. 18.





**XENOCRATES** Calcedonien, fut disciple de Plato, tardif d'esprit, & d'assez mauuaise grace: si que son maistre le cōparant avec Aristote, disoit *que l'vn auoit besoin de frein, & l'autre d'esperon*: & encor, *quel asne i'acouple avec tel cheual?* toutesfois fut si graue & si entier, que les Atheniens le receuoient en tesmoignage sans iurer, & non autres que luy: si chaste, que Phryne & Laïs, les plus belles & braues putains, ne le peurent onc inciter avec toutes leurs blandices, & caresses, & encor couchans avec luy en son liēt, par la mēee de quelques gaudisseurs: & Phryne respōdit qu'elle auoit couché avec vne image de pierre, non avec vn homme: fut si petit despensier, & loing d'auarice, qu'il renuoya trente mil escus qu'Alexandre luy donnoit, luy mandant que sont les Roys qui ont affaire d'argent, & non les Philosophes: autant en fait à Antipater. fut si bien aymant son maistre, qu'il l'accompagna en Sicile: & quād Denis le Tyran disoit à Platon, que quelcun luy couperoit la teste, Xenocrates respondit, non pas plustost ceste-là, que ceste-cy. Ayant tenu escole 25. ans, il mourut d'vn coup qu'il se donna de nuict en hurtant cōtre vne paille à frire. Voyez Diog. Laer. liu. 4. S. Aug. de la Cité de Dieu li. 8. cha. 12. Vale. li. 4. cha. 3.

**EPICVRE**, alla en Athenes du temps de Xenocrates. Ion dit qu'il cōstituoit le souuerain bien en volupté: mais il s'expose ainsi en escriuant à Meniceus: *Quand ie di que volupté est la fin de tous biens, ie n'enten pas celle qui est à boire & manger, comme aucuns ignorans le prennent, mais n'auoir mal en corps, ny troublement en esprit. Les vertus sont iointes avec la vie ioyeuse, & d'icelles ne peult estre separee.* Voyez Diog. Laer. li. 10. qui dit grans cas de luy.



PTOLEMEVS fils de Lagus, fut eleu Roy d'Egypte apres la mort, d'Alexandre le grand, en l'an du mōde 3640. auāt la natiuité de Iesus Christ 322. ans. il tint avec l'Egypte, vne partie de l'Affrique & de l'Arabie. Alexādre l'auoit eleué de simple soldat, & fait vn des principaux de sa Court. fut biē aymé de ses subiets, & Roys circōuoisins. tira grās deniers d'Egypte, auquel sien royaume adiouta la ville de Cyrene. vainquit Demetrius fils d'Antigonus: puis luy rendit ses amis captifs, & toute sa prinse: mesme luy enuoya encor des presēs par dessus, disant qu'il auoit fait guerre pour son honneur, non pour son profit. Depuis le vainqueur fut vaincu sus mer: & lors Demetrius vfa de mesme honnesteté enuers luy, luy renuoyant son fils, son frere, & ses amis qu'il auoit prins: ainsi en guerre mesme, s'entrefaisoyēt des presens à l'enui: & pour mōstrer que non pour hayne, ains pour honneur ils combatoyent. tant plus honorablement se traitoyent adonc les guerres, que ne font ores les amitez. il enuoya Ambassadeurs à Romme pour alliāce. institua Philadelphie, son fils puisné, Roy apres luy, qui dressa la librairie tant renommee, & assembla les septante interpretes. regna 40. ans, & tint Cypre & Phenice. De son nom tous les autres Roys d'Egypte, furēt appelez Ptolemes. Voyez Iustin li. 13. 14. & 15. Orose li. 3. cha. 23.

BERENICE fut femme de Ptolemeus, à l'honneur de laquelle son fils Philadelphie fait bastir vne belle ville pres le goulphe d'Arabie, & la nomma aussi Berenice. Philadelphie eut aussi d'Arfinoe vne fille ainsi nommee, qui espousa Euergetes, dont lon fait que sa cheuelure soit au ciel transportee, & transfuee en sept estoiles.



**CASSANDER** fils d'Antipater, fut Roy de Macedoine, apres la mort de Philippe, qui fut dict Arideus, frere d'Alexandre le Grand, en l'an du monde 3647. avant la natiuité de Iesus Christ 315. ans. Il assiegea la ville Pictua, ou s'estoit retiree Olympias, la mere d'Alexandre, laquelle faschee d'estre si long tēps assiegee, se rēdit à luy sous condition & promesse d'auoir la vie sauue: toutesfois pour ce ne laissa de la faire, apres, tuer. aussi fait occire Barsine & Roxane, deux femmes d'Alexandre avec leurs deux fils. il donna aux Abderites, que les ranes & rats auoyent chacez de leur païs, habitation & terres, aux frontieres de son royaume pour crainte qu'il auoit d'eux. regna 29. ans, laissant deux fils, Alexandre & Antipater, lequel tua sa mere Theffalonice, fille du Roy Arideus, par ce qu'elle sembloit plus favoriser à son frere au partage du royaume. Voyez Iustin li. 15. & 16.

**SELEVCVS** Nicanor, fut avec Alexandre contre les Perfes, apres la mort duquel, fut Seigneur du camp: tint le païs d'Oriēt, ou il print Babylone: subiuga les Bactrians: passa aux Indes, ou les Indois auoyent occis les gouverneurs qu'Alexandre y auoit mis, & par la menee de Sandrocottus, qui occupa le royaume, & avec lequel Seleucus composa, deffait Lyfimachus: mais peu apres fut tué par Ptolemee, & perdit sa vie avec son royaume de Macedoine qu'il auoit osté à Lyfimachus, qui auoit espou sé la sœur de Ptolemee. il regna en Syrie 22. ans, commenceans en l'an du monde 3652. avant la natiuité de Iesus Christ 310. ans: & edifia vne ville qu'il nomma Antioche, du nom de son pere Antiochus. Voyez Iustin li. 13. & 16.



**ANTIGONVS**, après la mort d'Alexandre le Grand, eut en partage Phrygie la grande, mais six ans apres, print l'Asie, & y regna 18. ans: commençans en l'an du monde 3645. auant la natiuité de Iesus Christ 317. il fait beaucoup de maux à ses compagnons, les autres capitaines d'Alexandre, voulant de force regner. vainquit, chace, & assiegea Eumenes, auquel Antipater enuoya secours. de-rechef vainquit Eumenes & les Argyraspides, qui secretement enuoyerent vers Antigonus, à ce qu'il les restituast en leurs biens: ce qu'il promet, moyennant qu'ils luy liurent Eumenes: qui sentant ce vent, se met à fuir: ils courent apres, & le rament, & le trahissent. Antigonus pour honte de l'amitié qu'il auoit eüe avec luy, ne voulut qu'on le luy amenast, mais le fait garder: puis ne voulant faire ses compagnons participans de ce butin & fruit de la guerre par luy seul soutenue, fut vaincu & tué en guerre, par eux, qui estoient Ptolemee, Cassander, Lyfimachus & Seleucus. Voyez Iustin li. 13. 14. & 17. & Plutar. en la vie d'Eumenes.

**DEMETRIVS**, dict Polyorcetes, succeda à son pere Antigonus au royaume d'Asie. Quand Antipater & Alexandre les fils de Cassander, discordoyēt, tint le parti d'Alexandre, pēsant en fin obtenir leur royaume: mais ces deux freres s'accordās, & luy sentāt qu'Alexandre luy machinoit trahison, le preuint, & le fait occir. lors furēt bien estonnez les Macedoniēs, mais Demetrius les gaingna si bien avec son beau-parler, qu'avec grand' ioye le receurēt pour Roy: car il remōstra la trahison de Cassander vers Alexandre le Grand, & d'Antipater vers sa mere Theffalonice. six ans apres, Pyrrhus le vainquit, & print ce royaume. Voyez ce que i'ay dit en Ptolemee, & Iustin li. 15. 16. 17. Plutar. en Pyrr. & Demetr. il se rendit à Seleucus avec son royaume d'Asie.



LYSIMACHVS, noble Macedonien, surpassa de grand cueur, de force de corps, & de Philosophie, tous les Capitaines par lesquels Alexandre subiuuga l'Orient. il n'eut point de honte d'estre endoctriné par Callisthenes, à qui Alexandre auoit fait couper les oreilles, le nez, & les leures. Alexãdre aussi exposa Ly simachus à vn fier lion, mais il arracha soudain la lãgue du lion: & depuis Alexãdre l'en ayma mieux: mesme, cõme, sans y pẽser, quelq̃ fois il l'eust blecẽ au front, il deslia son diademe, & luy mit à la teste pour luy bãder & couvrir la playe: qui fut presage q̃ quel quefois il seroit Roy. Lysimachus donc fut Roy de Macedoine, en l'an du monde 3676. auant la nat. de Ies. 286. ans. Apres la mort d'Alexãdre, Thrace & le Pont, ou sont les plus barbares & cruelles gens, luy furẽt assignez en partage, comme au plus fort & puisãt. il edifia vne ville nõmee Lysimache, qui 22. ans apres, abisma, par tremblement, luy signifiant tout mal: aussi peu apres, aagẽ de 74. ans, mourut vaillãment en guerre contre Seleucus (eux deux seuls capitaines restoyent de tous ceux d'Alexandre) & veit lors 15. de ses fils tuez ou prins. Iustin li. 13. 14. 15. 16. & 17.

ANTIGONVS Gonatas, fils de Demetrius Roy d'Asie, fut Roy de Macedoine en l'an du monde 3686. auant la natiuitẽ de Iesus Christ 276. ans. Pyrrhus le chacea, & print Macedoine. en fin pressẽ de plusieurs pars, alla à grand' puissance cõtre les Gallo-Grecs, qu'il vainquit, ayant laissẽ petite armee contre les autres, mais disposee en apparence d'vn grand camp. puis vint contre les Atheniens, enflẽ de telle victoire, mais ce pendant, le fils de Pyrrhus, vengeance la mort de son pere, prend Macedoine: & le fils d'Antigonus, bien ieune, recouure le païs, son pere absent: & prend encor le Royaume d'Epire. Iustin li. 25. & 26. & Plutar. en Pau. Emil.



PYRRHVS, fils d'un Roy d'Epire, son pere estant dechacé, fut porté à deux ans secrettemēt en Sclauonie, vers la femme du Roy, qui estoit de sa parété: fut bien receu, & adopté du Roy, qui le sauua de Cassāder Roy de Macedoine. Les Epirotes, chāgeās de cueur, le rappellent à 11. ans. Luy venu en aage, fut belliqueux, & seul defendit les Tarentins des Romains, lesquels il vainquit, tout nauré qu'il estoit, espouuentez de voir contre eux des Elephās, que iamais n'auoyēt veuz. il renuoya à Romme les gēs-de-guerre qu'il print, & sans payer rācon. print le royaume de Macedoine en l'an du mōde 3676. auāt la nat. de Iesus Christ 286. ans. arriuē en Sicile, fut appelé Roy de Sicile cōme d'Epire. à l'un de ses fils assignoit la Sicile, & à l'autre l'Italie: vainquit fouuēt les Carthaginois: mais en laissant la Sicile, dist: *ò quel passe-temps & exercice de guerre ie laisse aux Romains, & Carthaginois!* desquels vaincu sus mer, demāda secours à Antigonus, & pour cause de son refus, le vainquit, le chacea, & print Macedoine. lors conçoit se faire seigneur de Grece & d'Asie, & ne prēd moindre plaisir à guerroyer qu'à seigneurier. toutesfois vaincu des Spartains, mesme des femmes, se retira, ayant perdu son fils. puis s'en va en Argos, ou Antigonus s'estoit retiré, & l'assiegeant fut tué d'un coup de pierre qu'une femme luy ietta de dessus le mur, lors qu'il combattoit vaillamment en vne foule & presse des ennemis bien meslez en baterie. Plutar. en sa vie. Iustin liu. 17. 18. 23. & 25. Eutr. li. 2. Oro. li. 4. cha. 1. 2. 3.

ALEXANDRE, fils de Pyrrhus, pour vēger la mort de son pere, se iette en Macedoine, & la prend (car les soldas d'Antigonus le laisserent, lesquels il perdit avec son royaume) Mais Demetrius fils d'Antigonus bien ieune, l'en dechace: & encor le despouille de son royaume d'Epire: toutesfois y fut remis par l'ayde de ses alliez. Iustin lib. 26.



M. CL. MARCELLVS fut Consul à Romme, en l'an du monde 3676. auant la natiuité de Iesus Christ 286. ans. il estoit bien-né à la guerre, & , à ce que ses faits-d'armes demonstrent, ardēt & vaillant: au reste, doux & modeste: aymoit & admiroit les gens sauans, estoit adonné à la lāgue Grecque, & art oratoire, à quoy ne peut pas si bien paruenir, pour ses occupatiōs de guerre. tua Briomatus Roy des Gessates, Gaulois Infubriēs, qui le prouquoit au combat particulier: emportant le butin & les armes, fut secourir Corneil, son compaignon Consul, bien empesché & enuironné de ses ennemis Gaulois: arriué, deliura Milan, & son compaignon assiegé dedans. pource le Senat à luy seul, & non à l'autre Consul, ordonna le triomphe. il print Syracuse, riche & florissante ville de Sicile: mais la contemplāt si magnifique, pleura long temps sus sa ruine: & fut fort desplaisant du grand Geometrien Archimedes, qui y fut tué, si attētif à ses figures, qu'il ne se dōnoit garde à la ville qui estoit prinse, ny aux ennemis qui couroyent par dedās. il fut si hardi d'aller contre Annibal, apres la grande deffaite des Romains à Cannes, & le chaça de Nole. fut cinq fois Consul, la derniere fois avec Crispin: & passant 60. ans, fut, en guerre, faucé d'vn coup de lance: son fils nauré, & Crispin eut deux coups de dard. il auoit si grand' enuie de se froter avec Annibal, qu'il disoit que leurs cāps n'estoyent iamais assez pres l'vn de l'autre. Voyez Plutar. en sa vie, & en celle d'Annibal. Tite-Liue Deca. 3. liu. 3. 4. 5. 6. & 7.

A. POSTHVMIVS Albinus fut Consul de Romme avec Luētatius Catulus, l'an du monde 3721. auant la natiuité de Iesus Christ 241. an. Luētatius vainquit Hanno: & l'an d'apres, le desbort du Tybre, & le feu abolirent quasi Romme. Voyez Eutro. li. 2. Oro. li. 4. cha. 11. & 12.



**PTOLEMEVS** Philadelphus, fils puisné du susdict Ptolemeus, succeda à son pere au royaume d'Egypte, en l'an du monde 3680. auant la natiuité de Iesus Christ 282. ans. il fut institué Roy deux ans auant la mort de son pere, qui sont compris aux 38. qu'il regna. fut fort sauât, & disciple de Strato. dressa vne grande librairie excellēte en Alexandrie. dōna liberté aux Iuifs qui estoient captifs en Egypte du temps de son pere, & leur relacha le tribut. eut guerre avec son frere aisné, qui depuis demanda apointement, & l'eut. Car son frere (ayāt osté la vie, & le royaume de Macedoine à Seleucus) le pria par lettres luy pardonner qu'il luy auroit voulu oster le royaume paternel, & qu'il ne le feroit plus en ce que plus honnestement il auroit cōquis sus vn ennemi paternel, & estranger. Voyez Tite-Li. Deca. 5. li. 4. & 5. Eutro. li. 2. Justin li. 17. S. Epipha. li. des poix & mesures. Iose. li. des Antiq. 12. cha. 2.

**ELEAZAR** fut Pōtife des Iuifs apres son pere Onias, surnommé le iuste, en l'an du monde 3691. an. auant la natiuité de Iesus Christ 271. an. luy & Pto. Philadelphe s'entr'escruirent. leurs lettres sont inferées en Iosephe, lieu susdit: il transmit audit Roy les liures de la loy Mosaique, & de chacune lignee six interpretes sauans pour la tourner d'Ebreu en Grec: qui sont 72. bien que, pour abreger paroles, on die seulement, les 70. interpretes. fut nō moins esbahi que ioyeux de voir si beau liure traduit: & les remerciant, leur donna à chacun deux talens d'or, & vne coupe d'vn talent, qui valēt les trois talens 15000. escus sol pour homme. Voyez comme dessus, & S. August. de la cité de Dieu li. 18. cha. 42. & Aristeas des septante interpretes.





PRUSIAS Roy de Bithynie, receut Annibal fugitif, qui luy seruit bien contre Eumenes: mais le recōgnut mal: car il enuoya ses satellites pour le liurer à Flaminius Romain: Si ayma mieux Annibal s'empoisonner, disant: *Je vois mettre hors d'ennuy les Romains, qui ont si grand desir de la mort de ce vieillart.* & Prusias voulant tuer son fils legitime, pour exalter ses bastars, fut luy-mesme tué. Iustin. li. 32. & 34. Plutar. en la vie d'Annibal.

ANNIBAL fils d'Amilcar, fut capitaine des Carthaginois, à 26. ans, & se mōstra prudēt & fin, au reste auare & cruel. il conquist quasi toute Espagne en trois mois. au siege de Sagōte, mit les Sagontins à telle extremité de famine qu'ils se mangerēt les vns les autres: puis se brulerent eux-mesmes, craingnans venir entre ses mains. il auoit 150000. pietons, & 20000. hommes-de-cheual. Laissant son beau-frere Asdrubal en Espagne, trauersa avec son armee les mōts Pyrenees: passa par Lyon, ou il apointa deux petis Rois freres. puis passa les Alpes, ou il eut fort à faire, & y perdit bien 30000. hōmes. fait chemin nouveau par les rochers, avec feu & vinaigre. 15. iours apres, deffait Sempronius & Flaminius, tuāt 15000. de leurs gēs: mais aussi fut il bien soutenu & repoussé par Fabius: puis reprint ses forces, & eut vne grāde victoire à Cānes: enuoya à Carthage trois muys pleins d'anneaux de son butin: & lors qu'il pouuoit prendre Rōme, s'en retourna en la Cāpaigne. en fin vaincu (par Marcel, Scipion, Gracchus, & Eumenes, & mesme Antiochus vaincu, qui luy donnoit secours) s'enfuit vers Prusias, lequel il eut puis apres pour suspect, & se fait mourir par poison, l'an du monde 3774. auāt la natiuité de Iesus Christ 188. Eutro. li. 3. Flo. li. 2. Plutar. en la vie d'Annibal. Polyb. li. 2. & 3. il amena en Italie 32. elephans: perdit vn œil au mont Apennin. Iuuenal Saty. 10. Tite-Liue deca. 3. li. 2. S. August. de la cité de Dieu li. 3. cha. 20.



SCIPION Africain le grand, ainsi dit à cause qu'il subiuga l'Afrique, est quasi le premier homme des Romains: il sauua son pere, fort nauré, d'estre prins en la bataille contre Annibal, pres le fleuve Trebia: & apres la iournee de Cannes, comme plusieurs deliberoient rendre Romme à Annibal, il desgaina son espee & les cōtraignit tous de iurer qu'ils defendroyent le païs. apres, aagé de 24. ans, fut enuoyé en Espagne, ou Asdrubal auoit occis les deux Scipions, qui par longues annees y auoyent acquis des victoires: là il print la nouvelle Carthage, ou y auoit force tresors, & munitiōs de guerre: & de grans Seigneurs qu'il enuoya captifs à Romme, entre lesquels estoit Magon, frere de Annibal: & non content d'auoir chacé les Carthaginois, rendit l'Espagne tributaire aux Romains, qui quasi toute se rēdit à luy. & fut le premier des Romains qui conquist iusques au destroit de Gibraltar. il eut plus à cueur de maintenir que de conquerir: rēdit les prisonniers, & se fait aymer: vainquit & chacea Asdrubal, ou il eut grand butin: puis encor vainquit en grosse guerre le Roy d'Espagne, & depuis le receut en amitié. Apres fut enuoyé en Afrique cōtre Hanno, & le vainquit: enuoya le Roy Syphax prisonnier à Rōme. ceux de Carthage manderent à Annibal qu'il retournaist, ce qu'il fit: & en laissant l'Italie pleura: en son retour battilla contre Scipion, perdit, & s'enfuit. Or Scipion sus son vieil aage, cedant à ses enuieux, laissa Romme, en l'an du monde 3777. auāt la natiuité de Iesus Christ 185. Eutr. li. 3. Flo. li. 2.

TERENTIA Emylia, femme de Scipion susdit, voyant son mari vieillart aymer sa chambriere, n'en fait aucun bruit, de peur de diminuer l'autorité de son mari: apres la mort duquel, elle la maria, pour oster toute suspicion. Voyez le Suppl. des chr.



**MATATHIAS** eut la prebstrise, & gouvernement des Iuifs, en l'an du monde 3795. auant la natiuité de Iesus Christ 167. & regna vn an. il tua en public vn Iuif qui publiquement sacrifioit aux idoles, selon le commandement d'Antiochus: puis rasa l'autel sus lequel l'autre sacrifioit: & ioignant lequel ausi il fut tué: Iosephe appelle celuy qui fut tué, Apollonius, & dit qu'il auoit office de iudicature du Roy Antiochus. Matathias cōseilla aux Iuifs de batailler le iour de leur Sabbat, apres qu'il y en auoit mille de tuez, qui n'osoyent se defendre, ny combatre ce iour-là. & *si vous ne le faites (disoit il) vous serez ennemis à vous-mesmes, quand à ce iour-là voz ennemis vous courront-sus.* ainsi grand nōbre des Iuifs le suyurent, & le constituerent leur Iuge: lors il prend les armes & resiste vaillammēt aux commis d'Antiochus, & soustient fort & ferme la loy de Dieu, qui est contraire à toute idolatrie. Voyez le 1. li. des Macha. 2. cha. & Iosep. li. 12. cha. 7.

**IUDAS Machabeus** fils de Matathias, eut la dignité de son pere, & avec ses quatre freres, & autres qui auoyēt suiui Matathias, chassa partie de ses ennemis, & bōne part ausi en deffait & tua, mesme Apollonius leur chef, autre que le susdit: vainquit ausi Seron, Duc de la Syrie inferieure, puis encor Gorgias, que Lisias auoit fait chef-d'armee. & depuis mit en route & en fuite, avec grande diligence, ledit Lisias & Nicanor. puis purifia & restora le temple, dressa vn autel à Dieu, offrit sacrifice pour les morts. Antiochus fait alliance avec luy, laquelle il rompit puis apres, & pilla & saccagea le temple. Depuis Iudas fut eleu Grand-prebstre en l'an du mōde 3805. auant la natiuité de Iesus 157. & fut ami des Romains. Voyez le liu. des Macha. & Iose. il mourut en guerre, & regna 12. ans.



IONATHAS fut Duc, ou conducteur des Juifs, apres la mort de son frere Iudas Machabeus, en l'an du monde 3808. avant la natiui. de Iesus Christ 154. il vainquit Bacchides, couronal de Demetrius, contre lequel son frere auoit bataillé, & en bataille esté tué: mais trois ans apres, Bacchides retourna en Iudee avec grosse armee, assiegea Ionathas avec son frere Simon: en fin toutesfois fut vaincu Bacchides en bataille, & contraint faire paix, iura qu'il n'attenteroit iamais contre Ionathas. Alexandre Epiphanes fils d'Antiochus, entédant le bruit & renom de Ionathas, voulut ioindre amitié avec luy. Ionathas vainquit Apollonius chef-d'armee de Demetrius, print plusieurs villes, deffit 8000. des ennemis. brula le temple de Dagon & la ville: puis alla contre les estrangers qui gastoyét la Iudee, & les chassa. renouuela alliance avec les Romains & Spartiates. en fin Tryphon le tua sous fainte amitié. il regna 15. ans. Voyez le 1. li. des Macha. cha. 9. 10. 11. 12. Iose. li. 13. du 1. au 9. cha.

SIMON fut eleu chef & gouverneur des Juifs apres son frere Ionathas, en l'an du monde 3823. avant la natiuité de Iesus Christ 139. ans. il print la ville de Gaza, en deietta les idoles. renouuela alliance avec les Romains & Spartiates: vainquit & chassa Cendebeus couronal d'Antiochus. mais en fin, comme les hommes sont suiets à la fortune variable, fut tué avec deux siens fils, mesme par Ptolemeus son gendre, qui luy faisoit vn bâquet, & desiroit auoir le gouvernement, & principauté. Voyez le 1. li. des Macha. ch. 13. 14. 15. 16. Iose. li. 13. cha. 9. 10. 11. 12. regna 8. ans.



**HIRCANVS**, qui est aussi nommé Ian, succeda à son pere Simon susdict, & fut Duc du peuple Iuif en l'an du monde 3831. auant la natiuité de Iesus Christ 131. an. il eut honneur en son gouvernement: tua ceux que Ptolemeus auoit enuoyez pour le tuer. Antiochus Soter, dict Pius, l'assiegea en Ierusalem, mais leua le siege, prenant argent. il ouurit le sepulchre de Daud, trouua grand tresor, duquel commença premier nourrir les passans estrangers. renouuella amitié avec les Romains. Sachant la mort d'Antiochus, se ietta sus la Samarie, qui s'estoit reuoltee: au bout de l'an la print, & rafa. il amassa grans tresors, car depuis la mort d'Antiochus, ne payoit aucun tribut aux Roys de Syrie, qui estoient en querelle: il subiuga Idumee. fut Duc, Grand-prefstre, & Prophete, regna 25. ans, Iosep. dit 31. Voyez Iosep. liu. 13. cha. 13. & 18. & le 1. li. des Macha. cha. 16.

**ARISTOBLVS** fils d'Hyrchanus, fut Duc apres son pere, en l'an du monde 3857. auant la natiuité de Iesus Christ 105. ans. il haussa l'estat du gouuernemēt, en estat Royal, & fut le premier qui depuis 500. ans, de la captiuité Babylonique, mit couronne sus sa teste. luy, cruel, tint ses freres en prison: mesme fait mourir de disette, sa mere: fait tuer son frere Antigonus en trahison. subiuga les Itureens, & print sus eux grand païs. apres qu'il eut regné vn an, estant tout pourri dans le corps, & vomissant le sang, tomba maleureusemēt, au lieu mesme ou il auoit fait esprendre le sang de son frere, qui en ce point par iuste punition de Dieu, fut vengé. Voyez Iose. lib. 13. cha. 18.



**TIB. GRACCHVS** Tribū du peuple, eut diffensio avec les nobles & riches pour la loy agrarie, car les Romains auoyēt de coutume en partie vendre, & en partie reseruer au commun vsage, & bailler aux pources citoyēs, les terres cōquises, à la charge de quelque petite pension: mais comme les riches missent les pēsions bien hautes, & par ce moyē en fussent exclus les pources, sur ce fut establie vne loy qui defendoit que les Citoyens Romains ne possedassent plus de cinq cens iournaux de terre. cette loy ne donna pas secours long temps aux pources contre les riches, qui defraudoyēt la loy: premier par personnes interposees, & sous nom de leurs subiets, puis apertement & en leur nom mesme, de force en possedoyent d'auātage. Ainsi Gracchus soutenant le parti du populaire, se fait haïr des riches: & en vne grā de esmotiō, comme il vouloit fuïr, fut retenu par la robe, & frapé d'vne piece de banc par P. Saturnin, l'vn des principaux de la ville: & trente autres avec luy furent tuez & massacrez de bastons & de pierres, par la menee des riches: & furent les corps iettez en la riuere: en l'an du monde 3831. auant la nati. de Iesus Christ 131. Voyez Plutar. en la vie des Grac. Ap. li. 1. Eutr. li. 4.

**CORNELIE** fille de Scipion l'Africain fut mere de Tib. & C. Gracchus, lesquels apres la mort de leur pere, elle instruisit si bien, q̄ ia-soit qu'en bōnes meurs ils surpassassent tous autres, toutesfois la doctrine sembloit surpasser la bōté naturelle. Ayāt douze enfans, refusa pour mari le Roy Ptolemee: des douze ne luy en resterent que les deux susdits, dont l'vn fut tué deux ans apres l'autre, & pour mesme cause. Voyez Plutar. comme dessus.



IUGURTHA, heritier adoptif de Micipsa Roy des Numides, apres auoir fait mourir Hiempsal, pourchace contre Adherbal (ces deux estoient freres coheritiers du royaume.) Adherbal s'en va à refuge à Rome (ce royaume estoit en la sauuegarde des Romains.) quoy congnoissant Iugurtha, enuoye argent à Romme, & tire de son parti le Senat, qui enuoye gens pour faire partage du royaume entre les deux contendans: luy poursuit bié son cōmencement, achette la paix. puis estant mādé à Romme, à l'asseurance, par argent corrompt & trouble toute la ville: & departant, dit: *O la belle ville à vendre, & bien tost perdue, si elle auoit trouué son acheteur.* le Senat enuoye contre luy Sp. Albin, que Iugurtha gaingne encor par argent. Metellus y va, qui le vaine en deux batailles, & estant prest d'en venir à chef, voici suruenir Marius, qui vaine Bocchus, Roy des Mores, beau-pere de Iugurtha. ce Bocchus, pour faire sa paix, & comme pour sa rançon, trahit & liure Iugurtha, qui fut mené en triomphe captif à Romme couuert de cheines: mis en vne fosse, six iours apres mourut de faim & de froid, en l'an du monde 3857. auant la natiuité de Iesus 105. Eutr. li. 4. & Saluste.

C. MARIVS eut victoire sus les Cymbres l'an du monde 3863. auant la nati. de Ies. 99. il accusa Metellus, pour estre enuoyé contre Iugurtha: & eut aussi enuie sus Sylla, qui fut cause de guerre ciuile par dix ans: en fin vaincu de Sylla se cacha en vn marests: puis mis en prison, donna frayeur par son regard, à cil qui estoit enuoyé pour le tuer: & en vne barque trauerça en Afrique. il fut sept fois Consul. & se fait en fin mourir. Eutr. li. 5. Appian li. 1. cha. 8. Flo. li. 3. cha. 3.



**I A M N E V S**, qui est aussi nommé Alexandre, estoit frere d'Aristobul susdict, & fut constitué Roy des Iuifs par Salome, autrement dicte Alexandra, venue dudit Aristobul, laquelle deliura incontinent les freres de son mari qui estoient en prison, dont Iamneus estoit l'un. ce fut en l'an du monde 3858. avant la natiuité de Iesus Christ 104. ans. cetuy Iamneus mit à mort son frere, qui pretendoit au royaume: & fit guerre cōtre Ptolemaïde & Gaza, qui s'estoyent derechef reuoltees, & separees des Iuifs. Ptolemee Lathyr luy deffit beaucoup de ses gens pres le Iourdan: si demāda secours à Cleopatre Royne d'Égypte, mere dudit Ptolemee, laquelle avec forte armee repoulsa son fils iusqu'en Cypre, à ce qu'il ne se fust puis apres ietté sus l'Égypte, s'il eust prins la Iudee. Iamneus fut laissé d'une grand' partie de ses subiets, qui se banderent contre luy: lesquels il vainquit, (bien qu'ils fussent secourus par Demetrius Roy de Syrie) & en fit pēdre huit cens des plus apparens, comme il banquetoit avec ses putains, & si fit deuant eux, avant qu'ils fussent pēdus, occir leurs femmes & enfans. En fin par gourmandise tomba en maladie, & eut la fiere quarte trois ans, puis mourut l'an 27. de son regne. Voyez Iose. li. 13. cha. 19. 20. & 21.

**A L E X A N D R A** susdicte, pour tenir le royaume assure pour elle & ses enfans, tient secret la mort du Roy son mari, iusqu'à ce qu'elle tint la forteresse, par le conseil que luy auoit doné sondict mari: puis entretient les Phariseens en amitié, & leur donne toute puissance, ne retenant seulement pour elle que le nom de Royne par neuf ans, commenceans l'an du monde 3885. avant la natiuité de Iesus Christ 77. elle fit Hyrcanus Grand-prebtre. Voyez Iose. li. 13. cha. 22.





**MITHRIDATES** Roy du Pont, voyant les Romains bien empeschez à la guerre sociale, & encor à la guerre ciuile, se rue sus la Cappadoce, & en dechace le Roy Ariobarzanes allié des Romains: puis donne la trouffe aux païs de Bithynie, & Paphlagonie, dont il dechace aussi les Roys, en l'an du mōde 3876. auant la natiuité de Iesus 86. ans. puis marche en Ephese, & par toute l'Asie enuoye lettres, que par tout ou lon trouueroit des Romains, fussent tuez: dont pour vn seul iour en furent occis quatre vingts mil. Le moyē de guerre qu'il metoit en auāt, estoit que Nicomedes, Roy de Bithynie, ami des Romains, vsurpoit sus ses terres. En Achaïe enuoya Archeläus, avec 120000. hommes, & print la Grece, & toutes les isles, horsmis Rhodes. brief la guerre Mithridatique fut la plus grande: car Pyrrhus se contenta de guerroyer les Romains par 4. ans, Annibal par 17. mais, cetuy les guerroya par 40. ans. iusqu'à ce que par trois grādes batailles fut rabatu, & du tout affoibli par Sylla, Lucullus, & Pompee: en fin fut assiegé par son propre fils, en vn chateau, ou se fait tuer. il meritoit bien telle fin, tāt pour sa cruauté susdite, que par ce qu'il fait occir trois siens fils & trois filles, sa femme & sœur, sa mere & son frere. Lon dit qu'il trouua la composition du mithridat, qui pour ce a pris son nom de luy. Eutro. liu. 5. Florus lib. 3. Ap. liu. Mithri.

**HYPICRATEE**, amie, ou comme aucuns dient, femme de Mithridates, l'accompagna en ses guerres, habillée en hōme: mesme se trouua en bataille pres de luy, quand Pompee le vainquit, lors qu'il fut abandonné de tous ses gēs fors de deux: & ne le laissa en sa fuite, ains sans se trouuer faschee de longue course, traitoit bien Mithridates & son cheual. Plut. en la vie de Pōpee.



SYLLA Patrice Romain, estant Cōsul, eut par ordonnāce du Senat la charge d'aller cōtre Mithridates: assiegea Archelaus couronal de l'armee de Mithridates: le vainquit, si biē que de six vingts mil hommes à peine luy en resterent dix mil. print Athenes l'an du monde 3877. auant la nati. de Ies. 85. ans. Mithridates enuoye de renfort 70000. hommes d'eslite à Archelaus: Sylla en deux batailles vous deffait tout cela. le poure Archelaus se cache trois iours tout nu, dans vn marests. Mithridates demāde apointement: Sylla respond qu'il ne luy en donnera point, sinon que, delaissant les terres vsurpees, il s'en retournaist en son royaume. Ce pendant Sylla exploite tousiours. Or voici vn grād esclandre qui suruiet à Romme sus ces entrefaites: car Marius & Cinna tuent tous les plus apparens du Senat, & en bannissent grāde partie: rasent la maison de Sylla: tout le reste du senat s'en fuyant de la ville, va à refuge en Grece vers Sylla: luy supplie dōner secours au pais qui s'en va perdu & ruiné. à leur requeste, il retourne en Italie: & deffait, tous ceux du parti de Marius. estant Dictateur, & gouvernant Romme à son plaisir, laissa cette dignité, pour viure solitaire aux champs, ou il mourut de vermine qui s'engendroit en son corps. Eutr. li. 5. Flo. li. 3.

MARIUS, fils de C. Marius, estant Consul de Rōme, battilla contre Sylla, perdit vingt mil de ses gens: s'enfuit en Preneste, ou il fut assiegé, & contraint mourir. Voyez Eutro. li. 5. toutesfois L. Florus en son li. 3. escrit que ce Marius le ieune, fut tyrannisé par plusieurs iours sus le sepulchre de Catulus, & luy furent arrachez au iour-dhuy les yeux, demain les mains, puis apres le cuisses, à ce qu'il mourust membre à membre.



**QVINTVS** Metellus surnommé Pius, c'est-à dire le de-  
bonnaire, pource que par force de larmes & prieres incitant le  
Senat à pitié, feit tāt que son pere Metellus surnommé Numidie  
(pour cause qu'il vainquit Jugurtha, Roy de Numidie) fut rap-  
pelé d'exil. estant Preteur, tua le chef-d'armee des Marses, en la  
guerre sociale, que les Romains eurent contre leurs alliez. aussi  
estant Consul, en l'an du monde 3884. avant la nati. de Ies. 78.  
ans, il vainquit en Espagne les Herculeans freres: repoulsa &  
chassa Sertorius Romain, qui s'en estoit fuy en Espagne au re-  
tour de Sylla de la guerre Mithridatique, par ce qu'il auoit suyui  
le parti de Marius. En sa ieunesse quand il briguoit pour l'office  
de Preture, & de Pontificat, fut preferé aux consuls-mesmes.  
aussi fut ieune-vieil, fort moderé, sobre, sage, & demōtrant vne  
vertu ancienne: mais au cōtraire sus sa vieillesse fut vieil-ieune,  
commença vn nouveau train de pompes, d'exces & superfluitez  
nouuelles. Si qu'en Espagne il porta des robes palmées, esquelles  
y auoit des broderies en forme de palmes, signifians qu'il estoit  
victorieux triomphateur: permit qu'on luy donnast de l'encens,  
& dressast des autels, comme s'il fust vn dieu: & que les rues ou il  
passoit à son entree, fussent parees de tapisseries Attaliques: &  
qu'on luy feist somptueux festins avec grand appareil de ieux &  
misteres. receut couronnes d'or sus son chef, deualees, par le lam-  
bris du plâché & soliués, avec petites chaines, comme si elles fuf-  
sent enuoyees du ciel sus son chef diuin. Voyez Valer. li. 9. ch. 1.  
Vola. li. 17. Tite-Liue en l'epito. du 89. li. ou il dit que ce Metellus  
estant des proscripts ou bānis par Sylla, s'en vint la teste cachee,  
pour entrer par la porte de derriere de sa femme Bastia, qui ne  
luy voulut ouurir, disant qu'il estoit banni: & adonc se tua, & ar-  
rosa la porte de son sang.

**CLAVDIA**, fut fille de Metellus.



HYRCANVS fils de Iamneus, apres sa mere Alexandra, regna peu de temps sus les Iuifs: car Aristobul son frere puisné, le chacea: puis y eut apointement, que Hyrcanus se demettroit, & Aristobul seroit Roy. mais six ans apres Pompee remit Hyrcanus, qui regna quelque temps seul, & quelque temps auec Antipater pere d'Herodes. En fin Antigonus à qui les Parthes l'auoyent liuré, luy rongea les oreillis à belles dents: à ce qu'il ne fust plus Grand-prebtre, ny gouuerneur des Iuifs. Voyez Iose. li. 14. chap. 1. & 22.

ARISTOBVL fut donc Roy des Iuifs, l'an du monde 3895. auant la nati. de Ies. 67. mais Hyrcanus s'en allant à refuge à Pompee, fut par luy secouru, congnoissant l'arrogance & le tort d'Aristobul: lequel voulant faire guerre cõtre les Romains, fut preuenu par Pompee, & assiegé dans Ierusalem: d'ou il sortit soy humiliant deuant Pompee, & luy promettant argent, que la ville ne voulut fournir, ains luy ferment tresbien les portes avec son Pompee: lequel irrité, vous fait lier & garroter Aristobul: puis vous donne l'assault rudement à la ville: qui luy fut rendue par aucũs du parti d'Hyrcanus: & print encor le temple, ou il tint le siege trois mois. cela faiçt, meine captifs à Romme Aristobul avec deux filles & vn fils: (car Alexandre son autre fils s'en estoit fuy.) Adonc furent premieremēt les Iuifs subiets aux Romains. Vn an apres Aristobul eschape de Romme, vient en Iudee, & pretendant le royaume, fut pris par Gabinius, & mené derechef captif à Romme puis deliuré par Cesar, & renuoyé en Iudee, fut empoisonné par ceux du parti de Pompee. Iose. li. 14. des Anti. & li. 5. ch. 5. de la guer. Iud. & Egesip. li. 1.



P. CLODIVS Romain, issu de noble lieu, beau-yeune-homme & hardi, mais incestueux-paillard & seditieux, estant esprins de l'amour de Pompeia, femme de Cesar, entra desguisé en habit de femme, de nuict secretement en l'assemblée des femmes celebrans leurs sacrifices, ou n'estoit licite aux hommes d'entrer: toutesfois luy se fiant en sa beauté de ieunesse, sans barbe, & pensant que lon ne s'y prédra garde, se mesle parmi elles, & s'en va droit vers Pompeia, sa dame par amours: mais, au contraire de son opinion, son dieu-d'amours ne luy fauorisa point tant qu'il ne fust congnu, descouuert, & puis accusé au Senat, mesme eut Cicero tesmoing cōtre luy: ce nōobstāt les iuges par crainte, par argēt, & par faueur l'ont absouls. Depuis fut Tribun du peuple, & fait tant, par ses menees, que Cicero alla en exil: dont il retourna à grand honneur vn an apres. mais ce pendant Clodius auoit fait bruler sa maison, & ses metayries, & mettre ses biens en vente au plus offrāt: toutesfois nul n'en voulut acheter: ce fut en l'an du monde 3906. auant la nati. de Iesus 56. en fin Milo tua Clodius: & Cicero fut aduocat pour la defense de Milo par deuant le Senat. Plutar. en la vie de Cicero & de Cesar: Appian des guerres ci. li. 2.

FVLVIA, femme de P. Clodius, n'estoit point adonnee à filer, coudre, & gouverner le mesnage, ou à surpasser les hommes mesnagers, & de bas estat: mais estoit adonnee aux estats & dignitez, & à gouverner les gouverneurs: si que Cleopatre luy estoit bien tenue, de quoy M. Antoine auoit esté façonné par la dicte Fulvia, qui fut sa femme apres la mort de Clodius. Plutar. en la vie d'Anto. & de Cicero, lequel elle aduertist, de nuict, de l'entreprise de Catilina.



L. IVLES Cesar, fut pere de C. Iules Cesar Dictateur, & premier Empereur: il fut Consul de Romme en l'an du monde 3900. avant la natiuité de Iesus 62. ans, qui estoit l'annee deuant que Cicero le fust avec M. Antoine: il fut aussi Preteur, & ayant ia administré l'office, mourut à Pise, de mort subite en se chauffant par vn matin, sans qu'il y eust aucune apparence occasion de maladie pour le faire mourir. ce fut cinq ans apres qu'il auoit esté Consul. Or estant Preteur il subiuga les Iberes, c'est à dire Espaignols, iusques à l'Ocean, ou à la mer du Ponent: & ne vesquit pas gueres apres qu'il fut de retour. Voyez Appian li. 2. Pli. li. 7. cha. 52.

AVRELIA fut femme de L. Iules Cesar, susdict, & mere de C. Iules Cesar Dictateur, & premier Empereur de Romme.



IVLES Cesar fut premier Empereur de Romme, en l'an du monde 3918. auāt la nat. de Ies. 44. ans. Luy estāt Consul, eut la charge de conquerir les Gaules & Illyrie, avec dix legions : car l'Asie estant subiuguee par Pōpee, la fortune adonc transporta à cetuy ce qui restoit en Europe. Or est-il que les plus fortes natiōs, qui sont les Gaulois & Germains, restoyēt : & combien que l'Angleterre soit separee du mōde, toutesfois elle trouua qui la vainquit. Iules dōc subiuga les Suisses : puis quasi tousiours victorieux par tresgrandes batailles, passa iusques à la mer d'Angleterre : & en neuf ans cōquist toute la Gaule qui est entre les Alpes, le Rofne, le Rein, & la mer Oceane : print ostages des Anglois qu'il feit tributaires aux Romains, qui n'estoyēt des Anglois cōgnus, nō pas seulement de nom. Puis passa le Rein, & par fortes batailles vainquit les Alemans. la fortune luy fut seulement contraire par trois fois : sus la mer d'Angleterre la tēpeste luy abyfma presque tous ses gēs : & à Clermōt en Auvergne, il en perdit vne legion : & sus les limites d'Alemaigne ses capitaines furēt tuez par embusches. A son retour, demanda estre encor Consul, mais Marcel, Bibulus, Pōpee, & Cato y repugnent : & on luy māde rompre le camp, & retourner à Rōme, de là vint la source de la guerre ciuile tresmiserable. Luy s'en viēt en armes cōtre son pais : tout le Senat s'enfuit en Grece avec Pompee, qui le vainc au premier choc : puis est vaincu en Theffalie par Cesar, qui à son retour vainc Pharnax : puis en Afrique les nobles Ro. avec le Roy Iuba : & puis en Espagne les fils de Pompee : mais fut à la premiere rencōtre si bien secous par eux, qu'il se voulut tuer. en fin victorieux, se portant trop fierement, fut tué par vn iour de court, ou il estoit : l'an de son Empire 3. ou 4. de son aage 56. Sueton. Eutr. li. 6. & Plutar. Au reste pource que lon a trouué deux medalles antiques de Cesar, toutes deux sont ici exprimees.



COSSVTIA, qui estoit fille de noble & riche maison, fut femme de Iules Cesar, quād il n'auoit que dixsept ans, & fut par luy delaissee. Voyez Suet.

CORNELIE, fille de Cinna, quatre fois Cōsul, fut seconde femme de Cesar, de luy tant aymee que le Dictateur Sylla ne le peut onc contraindre à la delaisser. Cesar estant Questeur, fait oraison ou harangue publique, selon la coutume, à la louange d'icelle.



POMPEIE, fille de Q. Pōpee, & niepce de L. Sylla, fut tierce femme de Cesar: laquelle il delassa, la soupsonnant de P. Clodius, & disant *que le liēt nuptial de Cesar ne doit point seulement estre sans paillardise, mais aussi sans soupson de paillardise.* Voyez Suet. & Plutar. en la vie de Cesar.

CALPHVRNIE fille de L. Pifo, fut quatrieme & derniere femme de Cesar, laquelle apres sa mort, porta tout son argent à M. Antoine. Voyez Suet.





POMPEE, surnommé le Grand, apres auoir eueusement & tost vaincu les pirates, alla cōtre Mithridates en l'an du monde 3897. auant la nati. de Iesus 65. ans. la bataille fut liuree de nuit, en Armenie la mineur: Pompee vainquit, & ne perdāt que trente hommes des siens, en deffait 40000. des autres. Mithridates s'enfuit luy quatrieme, dont sa femme estoit l'une. Pompee marche contre Tigranes, Roy de la grand' Armenie, qui se rend à luy, se met à genoux deuant luy, & luy presente sa couronne entre les mains: mais Pompee la luy remet sus la teste. donna Paphlagonie à Attalus, & à Pylimenes: & Armenie la mineur à Deiotarus Roy de Galatie, pource qu'il luy ayda contre Mithridates. Feit Aristarc Roy de Colchos: tost apres dompta les Itureens & Arabes: mit en liberté Seleucie, qui n'auoit accueilli Tigranes: rendit les ostages d'Antioche. de là passant en Iudee, en trois mois print Ierusalē: occist douze mil Iuifs, le reste il print à merci. Puis s'enflamma la guerre ciuile (Florus l'apelle generale, & plus que guerre) entre Pompee & Cesar, la plus troublee & plus dangereuse de toutes: à la premiere rencontre Cesar fut vaincu, & par fuite se sauua, Pōpee ne le voulant poufuyure sus la nuit. Lors dist Cesar, *que Pompee ne sauoit pas vaincre: & que luy ne pouoit estre vaincu qu'adonc.* Puis y eut grosse bataille en Pharsalie: & Pompee vaincu s'enfuit vers Ptolemee (de qui il estoit tuteur ordonné par le Senat) qui suyuant plus la fortune que l'amitié fait trancher la teste à Pompee, & l'enuoye à Cesar: qui la voyāt, ne se peut tenir de pleurer. Voyez Plutar. en Pomp. Eutr. liu. 6. Appi. 2. liu. Iose. liu. 14. cha. 8.

IVLIE fille de Cesar, fut femme de Pōpee, & morut en peine d'enfant.



**CATO** surnommé *Vticēse*, par ce qu'après la guerre Pharfalique, il se tua à *Vtice*, fut de la race de Cato le Grand, dict *Cenforius*, & fut son nepueu en directe ligne, au tiers degré. Il fut Tribun du peuple à Romme en l'an du monde 3903. avant la nati. de Ies. 59. ans. il fut aussi Tribū de guerre, & Preteur: en hardiesse, haut coeur & beauté, ne fut rien moindre que son grand ayeul Cato l'ancien. estāt repoulsé du Cōsulat pour lequel il briguoit, n'en fut faché, & n'en rougist onc, bien que ses amis, qui luy portoyēt faueur, en rougissent: mesme le iour ensuyuant s'en alla à l'assemblée des Senateurs sans robe & sans chaussure, comme il auoit de coutume, & se pourmena avec ses familiers: s'acoutumant de n'auoir honte si-non de choses vicieuses & deshōnestes. En fin quād Pompee fut vaincu, de qui il auoit suyui le parti, se tua de sa dague en *Vtice*, ville d'Afrique, apres auoir leu & releu tou au long, le liure de Plato, de l'immortalité de l'ame. Il fut dict Cato le ieune, car l'autre estoit dict Cato le vieil, ou Cato le Grand. la vertu & sapiēce de tous deux fut tant renommee, que lon disoit vn prouerbe de quelque homme vertueux & sage, *Le troisieme Cato est descendu du Ciel.* Quand Cesar entendit sa mort, il dist: *J'ay enuie sus ta mort, o Cato, car tu as eu enuie sus ma gloire, qui n'as voulu attendre que i'eusse l'honneur de te rendre sauf, & te pardonner.* aussi pardonna il à son fils. Voyez Plutar. en Cato & S. August. de la cité de Dieu liu. 1. cha. 23.

**I V B A** Roy des Mores, tint le parti de Pompee, deffait Curio, que Cesar auoit enuoyé en Afrique avec vne armee, en l'an du monde 3916. avant la natiuité de Ies. 46. ans. en fin luy & Petreius vaincus par Cesar, se tuerent l'vn l'autre de coups & de famine.



P O R T I A fut fille de Cato Vticense, & femme de Brutus. elle ayant des nouvelles de la mort de son mari, delibera de le suyure bien tost, attendu qu'elle l'aymoit tant: mais ses parens & amis n'en estoient d'aduis: ains soigneusemēt prenoyent garde à elle: ce non-obstant ne la peurent garder ny empescher de se faire mourir. car elle d'un grand coeur, & d'un acte non pareil, va prendre des charbons tous vifs & ardents, dont elle vous emplit sa bouche, puis la ferme, & quant & quant la porte de sa vie. Voyez Plutar. en la vie de Brutus. Valere li. 3. & 4. cha. 2. & 6. & Appi. li. 4. Vous pouez aussi voir vn bel epigramme d'elle, au premier liure de Martial. ledict epigramme commence ainsi:  
*Coniugis audisset fatum cum Portia Bruti.*

M A R T I A fut fille puisnee de Cato. on luy demanda, quād elle estoit veuve, pourquoy elle ne se remarioit: & elle respondit: C'est pource que ie ne trouue homme qui m'ayme mieux que mon bien. par laquelle response elle nota les hommes, qui communemēt quierent plustost la richesse que la vertu aux femmes: ainsi elle n'estima le mariage qui n'est principalement mené & lié par amitié: & celuy qui prend femme pour les biens, est plustost vn mari à louage, qu'il n'est pas vray mari. Vne autrefois on luy demanda quand elle vouloit mettre fin aux pleurs, pleintes, & regrets qu'elle faisoit de la mort de son mari: & elle respondit que le dernier iour de sa vie, seroit le dernier de son dueil. telle respōse fait cette payenne, à la honte & vergoingne de plusieurs chrestiennes, qui à peine estant leur mari enterré, se remarient. Voyez Boccace de Dido: & les Apoph. d'Erasmus li. 8.



CICERO, le grand Orateur Romain, issu d'assez bas lieu, se fit par son eloquence & sauoir, grand personnage: pour conuoitise d'honneur, se mit à plaider: & du premier n'auoit pas bien la parole à commandement, non plus que Demosthene. fut facetieux & brocardeur, tant qu'il en acquist la male grace de plusieurs. soustint la cause difficile, de S. Roscius, & la gagna avec honneur: dont il encourut la malueillance de Sylla: à laquelle cedant, alla en Grece, faignant faire ce voyage pour sa santé, car il estoit de petite vie & petite complexion: fut auditeur des Philosophes & orateurs d'Athenes: ne fut pas fort riche, toutesfois tenoit bon ordinaire, dont on s'esbahissoit, car il ne prenoit point d'argent pour aduocacer, ny aucun autre loyer. resista si vertueusement, & chaudemēt à l'entreprise de Catilina, qu'il fut le premier appelé *Pere du país*. fut glorieux, & vanteur de ses louanges, mais sans abaisser celles d'autruy. fut enuoyé en Cilicie avec 12000. hommes de pié, & 2600. de cheual: refusa les presens que les Roys luy offrirent. ayāt tenu le parti de Pōpee, craignit récōtrier Cesar vainqueur: mais Cesar mit pié à terre, si tost qu'il le veit, & le salua le premier treshumainement. depuis ayāt tenu le parti de Cesar cōtre M. Antoine, fut miserablemēt tué par les Satellites dudit Antoine, qui luy couperēt la teste, en l'an du mō de 3922. auāt la nat. de Ies. 40. ans. Voyez Plu. en la vie de Cice.

L. MVNATIVS Plancus fut cōsul de Rōme l'an mesme que Cicero fut occis. il eut le gouuernement de la Gaule Cheueluë, qui est le país de Lyonnois: & edifia, ou (comme les autres dient) reedifia Lyon, en France, & Basle en Alemaigne. il opina que l'Empereur Octauius, deuoit estre surnōmé Auguste, & fut son opinion tenuë, bien que les autres fussent plustost d'opinion de le nōmer Romulus. Voyez Sueton. en Augu. & Volater. li. 18.



**PACORVS** Roy des Parthes, vint à la requeste d'Antigonus, en Ierusalē, sous couuerture d'appaiser vne esmotion qui estoit entre les Iuifs, dont les vns tenoyent le parti de Phaselus & Hyrcanus, & les autres d'Antigonus: toutesfois son intētion estoit pour y constituer Roy Antigonus. Ainsi donc ce Pacorus, par fraude, enuoye Phaselus à Barzafarnes Satrape des Perse: les Parthes vous prennent Phaselus & le lient: & autant en font à Hyrcanus, quils liurēt à Antigonus. car Antigonus leur auoit promis mille talens, & cinq cens femmes. Antigonus fut par ce moyen Roy de Iudee: & rōgea les oreilles à Hyrcanus, à ce qu'il ne peust iamais estre Pontife: car la loy n'admetoit que gens entiers: mais Phaselus, sentāt que lon le vouloit faire mourir, ayma mieux preuenir: si se tua de coups qu'il donna de sa teste contre vne pierre. & quant à Herodes frere de Phasel, il se sauue à la fuite: & par le Senat Romain, eu respect aux bien-faits de son pere, fut declaré Roy de Iudee. Or pour retourner à Pacorus, son pere auoit occis Crassus Romain par dol & trahison: mais Ventidius Bassus abolit & effacea cette tache, & recouura l'honneur des Romains, quand il deffit ce Pacorus & son armee entierement. Voyez Egesip. li. 1. Iose. li. 14. cha. 22. & 23.

**ANTIGONVS** fils d'Aristobul, fut donc Roy de Iudee, par le moyen que i'ay dit, en l'an du monde 3924. auant la nati. de Iesus 38. ans. mais quatre ans apres Herodes susdict, prend Ierusalem, secouru de Sosius Romain, qui enuoye Antigonus à M. Antoine, qui luy fait trencher la teste. Voyez Iose. lib. 14. cha. dernier.



C. CASSIVS, homme familier de Brutus, mais de mœurs bien different, fut dangereux & meschant : & ennemi naturel de toute supreme autorité:tesmoing en soit Faustus, son compaignon d'escole, à qui il donna vn soufflet, pource qu'il s'estimoit plus que les autres, à raison de son pere Sylla. lon tiët encor qu'il luy dist ainsi tout deuant Pompee: *Or sus, Faustus, pren encor la hardiesse de dire la parole dont tu me fachas, à fin que ie te donne encor sus la ioue.* Somme il fut fier, cruel, & rebarbatif: eut particulieres & publiques inimitiez contre Cesar: & dit-lon qu'il hayoit Cesar, mais Brutus hayoit le dominateur. aussi il porta premier la parole à Brutus, de la trahison qu'il machinoit contre ledit Cesar, & l'incita y consentir, & mettre la main. En fin, bataillant contre Auguste & M. Antoine, & pësant estre environné des ennemis, se tua, du mesme poignart dõt il auoit bourrelé Cesar, en l'an du monde 3922. auant la nati. de Ies. 40. ans. Voyez Plut. en la vie de Cæs. & de Brutus. & Appian. li. 2. cha. 16.

BRVTVS, homme bien instruit en sciences, & en Philosophie, adonnant son esprit, naturellement graue & doux, aux affaires de la republique, tendoit modestement à tout droit & equité. il suyuit le parti de Pompee, estimant sa cause plus iuste, que celle de Cesar. toutesfois Cesar le reueroit & aymoït, pour ses sciences & vertus: & en chargea à ses gens ne le tuer, s'ils le rencontroyent en bataille: ains qu'ils l'amenassent vers luy, s'il vouloit: que s'il ne vouloit, ils le laissassent aller sans aucun mal luy faire. mais en fin Cesar, luy ayât fait force biens & hōneurs, fut par luy trahi & nauré, sous intention de reieter le ioug de la monarchie que Cesar vsurpoit: aussi la fin en fut maleureuse, car il se tua miserablement comme Cassius. Voyez comme dessus.



HERODES le grand, dict Ascalonit, fils d'Antipater Gouverneur de Iudee, fut Roy de Iudee (le premier d'estrange nation, car il estoit Idumeen) en l'an du mode 3927. auant la nat. de Ies. 35. ans: & 3. ans au parauant il auoit esté declaré & appelé Roy des Iuifs par le Senat Romain. il fut bien aymé de l'Empereur Auguste, qui augmenta son royaume, luy rendât Samarie, & autres villes & chasteaux. aussi Herodes, de sa part, edifia vn tēple & vne ville qu'il nomma Cefaree en l'honneur de Cesar Auguste. il enuoya ses deux fils, Alexādre & Aristobul, à Rōme pour estre instruits. vainquit les Arabes: fait desraciner les vieux fondemens du temple de Salomon, pour y en replāter de tous nouveaux, & en redifia vn autre magnifiquement, à la forme du premier. toutesfois fut cruel vers sa femme, vers ses propres enfans, & vers ses amis, qu'il fait mourir, & des docteurs de la loy: mesmes fait martyriser les petis innocens de Beth-lehem, peu apres la naissance de nostre sauueur Iesus Christ: aussi vfa de machination contre les sages Roys qui s'enqueroyēt de nostre Seigneur pour l'adorer. de son temps y eut vn tremblement de terre en Iudee, dont perirent 30000. personnes. Voyez Iosep. de la guerre des Iuifs li. 1. cha. 14. & des Antiq. li. 14. 15. & 16. & S. Mat. cha. 2.

MARIAMNE, fut femme d'Herodes susdict, laquelle il aymoît bien, pour sa beauté. nonobstant elle estant chaste, mais fiere & facheuse, refusa d'embracer son mari vne apresdisnee, mesme luy dist quelque iniure, dont le Roy fut fort faché. Adōc Salome la sœur d'Herodes aposte l'eschanſon du Roy, qui luy va porter parole, que sa femme luy auoit preparé vn bruuage de poison: pourquoy le Roy la fait mourir. Voyez Iosep. liu. 15. cha. 3. & 9. & li. 18. cha. 11.



C. MECENAS issu des Roys de Toscane, escriuit des Poësies en sa ieunesse: fut le refuge des Poetes & Orateurs de son temps (dont encor à present on appelle Mecenas celuy qui fait du bien aux Poetes) fait de grans biens à Vergile, à Horace, & autres. mais fut blasmé d'estre delicat & effeminé de parole & d'habit: dont Auguste le piquoit tant par lettres que de bouche, en ioyeuseté. il auoit de beaux iardins à Rōme, ou il deuisoit souuēt de sciēces, & y alloit l'Empereur, pour le soulas de son esprit. il fut peu parlant: toutesfois admonnestoit & reprenoit l'Empereur hardiment. estant Preuost de Rōme fort vigilāt au besoing, estaingnit & punit la machination de M. Lepidus beau ieune hōme, mais meschant, qui vouloit tuer l'Empereur. Voyez Vellei. Paterc. Crinit. & Sue. en August.

VERGILE fut né en vne bourgade, pres Mātoue, en l'an du monde 3895. auāt la nati. de Ies. 67. ans. lon dit qu'il ne fait point de cris en naissant, ains mōstra vn beau visage doux: aussi fut il appellé Parthenias, c'est adire vierge, pour sa douceur & simplicité, si grāde, que le peuple de Rōme accourāt pour le voir, luy hōteux, se cachoit en la premiere maison. fut bien-aymé d'Auguste, qui ne luy refusa rien: ains Vergile refusa de luy vne cōfiscation. toutesfois les biēs qu'il eut d'Auguste, & de ses autres amis furēt prisez 250000. escus: alors le champ poetic estoit plus fertile qu'à present, & regnoit amitié plus franche. il composa les Bucoliques, puis les Georgiques, puis l'Eneide. mourut à 52. ans, ayant fait son epitaphe sous tel sens: *A Mantoue fus né: en Calabre mort: & à Naples enseveli. J'ay chanté les pastourages, les champs, les Roys.* Voyez Donat. Cri. & Budé, de Affe li. 3. Cor. Tacit. dit que les Romains oyans reciter au theatre les vers de Vergile, tous se leuerēt, & luy porterēt hōneur tel que s'il eust esté Empereur.





SIBYLLE Phrygienne prophetisa à Ancyre, ville d'Asie la mineur, entre Paphlagonie & Galatie. Voyez Lactan. des Di. ui. insti. li. i. cha. 6. qui n'en dit autre cas. Mais quāt à l'origine de ce nom de Sibylle, voyez Celius Rhodi. li. 14. cha. 1. ou il dit que Dardanus, venu de l'isle de Samos, espousa Neso, fille d'un Roy des Troyēs, de laquelle il eut vne fille qui prophetizoit, & auoit nom Sibylle, en son propre nom: duquel ont esté depuis nommees toutes les femmes Prophetes, & predisans les choses auenir, pour certaine conuenance d'inspiration diuine. Ceste Sibylle a ainsi prophetizé du dernier, & general iugement:

*La trompette enuoyra du ciel vn son espouventable & piteux, & la terre monstrera vne grande abysme, tous les Roys viendront au siege presidial de Dieu, lequel iugera ensemble les bons & mauuais: puis enuoyra les meschans au feu: mais ceux qui auront aymé Dieu, & exercé bonté & fidelité, viuront derechef.*

SIBYLLE Tyburtine, est nommee la 10. & derniere par Lactance liure susdict (mais on en met encor deux que verrez cy apres) elle auoit nom Albunee (lon dit communemēt Albumee) & fut anciennement reuerée comme deesse, en Tybur (ville pres de Romme, dont elle est dicte Tyburtine) sus la riue du fleuue Anien: ou lon dit que fut trouuee son effigie, tenāt vn liure en sa main: & le Senat Romain feit porter au Capitole les choses sacrees d'icelle Sibylle. Plin. li. 34. cha. 5. dit que de son temps mesme, y auoit encor trois statues de Sibylles à Romme: ils ne les nomme point, mais ie me doute que ceste-ci en estoit l'vne qui estoit representee. elle a ainsi prophetizé:

*Iesus Christ sera né en Beth-leem, & annoncé en Nazaret. O eueuse la mere qui portera les mammelles qui l'alaitteront. Voyez le li. des Sib.*



C. OCTAVIUS, pere de l'Empereur Auguste, fut grād personnage & de faict, & de reputation. en premier lieu, il fut en abondance de biens nourri & eleué: puis facilement parvint aux honneurs & offices, qu'il exerça tresbien & deuément. il fut Preteur de Macedoine, en quoy se porta si vertueusement & vaillamment, mesme contre les serfs fugitifs (à sauoir le reste des coniurez de Spartacus & Catilina, qu'il deffeit en chemin) que Cicero en ses epistres admoneste son frere Quintus, Pro-cōsul d'Asie, qu'il ensuyue, & prenne pour exemple cestuy Octauius, en cas de gouuernement de sa charge, & de l'entretènement des alliez des Romains. il mourut de mort subite, aut retour de Macedoine, laissant Octauius l'aisnee fille de luy & d'Ancharia, & Octauius puisnee avec Octauius, qui depuis fut Empereur de Rōme, & fut nommé Auguste, aussi enfant de luy, mais d'une autre femme, nommee Accia. Voyez Suetone en la vie d'Auguste.

ACCIA, femme de C. Octauius susdit, & mere de l'Empereur Auguste, fut fille de M Accius Balbus, & de Iulie, sœur de C. Cesar. Ce Balbus du costé de son pere eut plusieurs de ses ancestres Senateurs: & du costé de sa mere il estoit bien prochain parent de Pompee. il fut Preteur, & durant ceste office diuisa & partagea au peuple Romain les terres de la Campagne, selon la loy Iulia. Voyez Suetone comme dessus.



AVGVSTE fut 2. Empe. des Ro. en l'an du mōde 392 r. avant la nati. de Iesus Christ 4 r. an. il fut heritier de son oncle Cesar, & fait grosses guerres pour venger sa mort. il tint l'Empire premierement avec M. Antoine & Lepidus, puis avec M. Antoine seulemēt, & avec les deux enuirō 12. ans: & depuis fut tout seul Empe. par 44. ans. il vainquit M. Antoine sus mer: puis adioua à son Empire, Egypte, Cantabrie, & Dalmace (autrefois fouuent vaincue, mais adonc totalement subiuguee:) Hongrie, Aquitaine, Sclauonie, & Rhetie, Vindelicie, & les Salasses, trois nations habitans les Alpes: & puis encor toutes les villes voisines de la mer Pontique: conquit l'Armenie sus les Parthes. Les Perfes luy baillerent ostages, ce que iamais n'auoyēt fait à autre: & luy rendirēt les enseignes & estēdars Romains, qu'ils auoyēt emportez de Crassus vaincu. Les Scythes & Indoïs, qui au parauant n'auoyent onc ouy parler des Romains, luy enuoyerent Ambassades & presens. Le païs de Galace, qui au parauant estoit royaume, fut fait prouince subiette aux Romains. plusieurs Roys vindrent de leurs royaumes vers luy, pour luy presenter & offrir obeïssance. il fut en guerre eureux, en paix moderé, enuers tous liberal: à ses amis entier, lesquels il auança & fait monter en biēs & hōneurs si haut, qu'il n'y auoit pas gueres à dire de luy. iamais les Romains ne furent si puiffans ny florissans. il fut Empereur 56. ans: & l'an 42. de son regne, nostre sauueur Iesus Christ fut né. Voyez Suetone en la vie d'Auguste & Eutro. li. 7.

CLAVDIA, fille de P. Clodius & de Fulvia, qui depuis fut femme de M. Antoine, fut promise en mariage à Auguste, elle estāt bien ieune: & luy la delaiissa sans la toucher, pour quelque raucune qu'il eut avec Fulvia. Voyez Sucto.



SCRIBONIE fut femme de l'Empe. Auguste, apres que il eut laiffée Claudia, à laquelle il auoit fait promesse de mariage, comme i'ay dit cy dessus. icelle Scribonia auoit au parauant esté mariee par deux fois, & à chacune fois à vn Consul de Romme. mais Auguste depuis ausfi la delaiiffa & repudia, pource qu'elle estoit trop facheuse: & d'elle il eut vne fille nōmee Iulie. Voyez Suetone en la vie de l'Empereur Auguste.

LIVIE Drusille, fut ausfi femme d'Auguste, laquelle il osta à Tibere son mari, ia pere de Tibere, qui depuis fut Empereur: & encor lors qu'elle estoit enceinte, de Drusus, qu'elle enfanta trois mois apres qu'elle fut avec Auguste, lequel Drusus fut né auant terme, & fut pere de Claudius, 5. Empe. Or Auguste ayma parfaictement & perseueramment icelle Liwie Drusille: & desiroit fort en auoir enfans, ce qu'il n'eut onques, dont il fut fort marri. Somme qu'il mourut en la baisant, & disant, *O Liwie, ie te prie que durant ta vie tu ayes memoire de nostre mariage: Adieu.* Voyez Suetone en la vie d'Auguste & de Tibere Empereurs Romains.



SIBYLLE Europe, est cōmunement nombree la 11. entre les Sibylles, c'est adire entre les femmes Prophetes, inspirees de Dieu, & participantes de ses secrets qu'il luy a pleu leur reueler de sa grace. Je n'ay memoire d'auoir leu aucune chose d'elle en certain auteur, si-non que le liure des Sibylles fait mention d'elle, qu'elle a prophetizé comme sensuit:

*Le grand viendra, & passera les monts & les eaux du ciel, & regnera en poureté, & dominera en silence: & sortira du ventre d'une vierge.*

SIBYLLE Egypte, ou Egyptienne tient le rang de la 12. & derniere Sibylle, selon la commune opinion. ie n'ay aussi souuenance d'auoir leu d'elle, si-non qu'Elian la nomme entre quatre Sibylles, qui sont Erythree, Samie (ou Samienne) Egyptienne, & Sardiane. Voyez Cel. Rhodi. li. 21. ch. 27. i'ay bien memoire d'auoir leu autres noms de Sibylles, ou femmes prophetes & predifantes les choses auenir, comme Epirotique, Manto Thesfalique, Lampusie de Colophon, ville d'Asie la mineur: mais les douze precedentes Sibylles sont les plus certaines, & plus renommées: lesquelles nous n'auons esté d'aduis mettre ensemble, ains les diuersifier & renger selon leurs diuers temps, au mieux que nous auons peu comprendre. Ceste derniere Sibylle a ainsi prophetizé, comme dit le liure des Sibylles:

*Le Verbe inuisible sera touché, ou frapé, & germara comme vne racine, sechera comme vne fueille, & n'apparoistra point sa beauté: le ventre maternel l'environnera: & Dieu, qui est la ioye eternelle, pleurera, & sera opprimé des hommes, naistra d'une mere, & estant Dieu, sera estimé conuerser avec les hommes comme pecheur.*



MARC AGRIPPE, ainsi nommé à cause qu'il sortit du vêtre de sa mere les pieds premiers (qui n'est pas signe de bon eur, car le cōmun vsage est de venir la teste premiere, & s'en aller les pieds premiers) fut le premier exemple de bon eur, pour homme ainsi né: nonobstāt il eut aussi quelque mal-eur, car l'une des deux Agrippines estoit sa fille, & l'autre fille de sa fille: desquelles ont esté produits Caligula & Nero Empereurs, les deux flā-beaux, & la double perdition & ruine des hommes. Voyez Suet. en la vie d'Auguste, de Tibere & de Neron. Mais pour retourner à Marc Agrippe, il fut gendre d'Auguste & eut vne grande victoire sus mer contre Sextus Pompeius en Sicile, l'an du mōde 3930. avant la nati. de Iesus Christ 32. ans. il repara les aqueducts de la meilleure fontaine qui vinst à Rōme: & appeloit-on ceste eau, *aqua Marcia*. il feit encor d'autres choses singulieres, dont Plin fait mention en plusieurs passages: mais principalement li. 16. cha. 4. & li. 7. cha. 8. Il y a eu d'autres Agrippes, comme Menenius Agrippe en Tite-Liue, & Agrippe fils d'Aristobul, Tetrarque de Iudee, dont parlerons en la 2. partie de ce liure.

I V L I E, fille d'Auguste Empereur & de Scribonie, fut promise en mariage au ieune prince Marc Marcel, apres la mort duquel, elle espousa Marc Agrippe susdit, qui mourut deuant qu'elle: & puis elle espousa Tibere (qui fut contraint laisser sa femme Agrippine toute enceinte qu'elle estoit) depuis Auguste la bannit par 5. ans, comme paillarde, & luy defendit le vin & les habits precieux: & que personne n'allast vers elle sans le congé de luy-mesme: eut fantasie de la tuer: elle fut mere d'Agrippine, mere de la mere de Neron. Voyez Suetone comme dessus.



M. ANTOINE Consul, pourchaceant les meurdriers de Cefar, aufquels le Senat fauorifoit, troubloit Romme & faisoit des méchancetez: dont fut par le Senat déclaré ennemi. Panfa & Hircius vont cōtre luy, avec Augufte, ieune de 18. ans: il est vaincu, & apointe avec Augufte, qui luy laiffe l'Asie, & le païs dict le Pont. il delaiſſe la ſœur d'Augufte, prend Cleopatre à femme, qui luy fait fils & fille, à la premiere groſſeſſe, leſquels il nomme le Soleil & la Lune. il vainq les Perſes. puis Cleopatre, par vne conuoitiſe de femme, deſirant auſſi regner à Romme, l'incite à la guerre ciuile: vaincu ſus mer, par Augufte, ſenfuit en Egypte, & ſe tue. Augufte ſe fait ſeigneur d'Egypte. Voyez Sueton. en la vie d'Augufte. & Appian.

CLEOPATRE Royne d'Aegypte, n'eſtoit point tāt belle, comme douce, & de bōne grace: mais ce qu'elle auoit de beauté, eſtant aydē de ſes vertus & graces, faisoit eſmerueiller tout le mōde. elle parloit prōptement à toutes ſortes de nations, en leur lāgage, vſant de ſa langue cōme d'vn inſtrumēt de pluſieurs cordes: & n'vſoit gueres de truchement. elle vint vers Marc Antoine avec vne pompe incroyabe, en l'an du monde 3923. auāt la nati. de Ieſ. 39. ans, ſus le fleuue Cydnus: le derriere du nauire eſtoit d'or, les voiles d'eſcarlate: les auiſons ou rames d'argent, eſtoyēt demenez au ſon des inſtrumens de muſique. elle comme vne Royne, en eſtat de Venus, eſtoit aſſiſe en ſa tente doree, ayant autour d'elle de beaux petis enfans comme de Cupidons: les belles filles habillees comme Nereides & Graces, manioyēt le gouuernail, & les cordages: les damoiſelles braues rempliſſoyent l'air de parfuns tout le long du riuage. Voyez Pluta. en la vie de M. Antoine, apres la mort duquel elle ſe fait mourir par vn aſpic, pour ne venir entre les mains d'Augufte.



MARCEL, fut mari d'Octavia, sœur d'Auguste, de laquelle il eut vn fils, qu'Auguste adopta, mais à 16. ans tomba en maladie & à 18. ans mourut : qui fut dommage, car il estoit en sa vigueur de ieunesse, beau ieune Prince, biē-adextre, & accompli en beaucoup de vertus. Vergile fait honorable mētion de luy, sus la fin du 6. liure de son Eneide : & pour vers, eut d'Octavia 200. escus. somme qu'il eut contant 5000. escus pour 18. vers qu'il recita deuant Auguste & Octavia : à laquelle faillit le cueur, quand sus la fin il nōma le ieune Prince Marcel, son fils, qui estoit trespasé : cōme i'ay dit. Or s'en faut-il beaucoup, certes, que telle liberalité des Princes & Princesses, regne au-iourd'huy enuers les gens de fauoir, mesme enuers l'excellēte diuinité de Poésie. mais pour retourner à mon propos (& toutesfois encor d'abondant en faueur des lettres, & sciences) Octavia dressa en l'honneur & memoire de sondict fils, Marcel, vne belle librairie : & Auguste ausi edifia vn Theatre qu'il nomma Marcel, du nom de ce ieune Prince, son nepueu. Voyez Suetone en la vie d'Auguste. Plut. en la vie de M. Cl. Marcel, qui print Syracuse en Sicile, comme nous auons dit cy dessus, page 138. & duquel M. Cl. Marcel, C. Marcel susdit est descendu.

OCTAVIE fut sœur de l'Empereur Auguste, de par pere, & femme de C. Marcel, & mere du ieune Prince susdit. elle estoit belle, bonne, & de bon esprit. Apres la mort de Marcel, elle fut mariee à M. Antoine, qu'elle ayma bien, & mieux qu'il ne luy appartenoit : & fut apres luy iusques en Athenes avec force presents, & eust passé outre, si elle ne fust contremandee : mais son mari estoit distrait & enchanté par sa courtisane Cleopatre. Voyez Plutar. en la vie de M. Antoine.





TAVRVS chef de l'armee d'Auguste, conquist par armes quasi toute la Sicile. & lors Auguste tenoit 44. legions de gens de guerre (la legion estoit de 6000. Hommes-de-pié, & 500. de cheual pour le moins) lesquels se tenans fiers & arrogans, pour leur multitude, feirēt quelques esmotions par couuoitise d'auoir possessions & terres, mais Auguste se monstrāt d'vn hault cueur imperial, en cassa 20000. en rendit 30000. serfs à leurs maistres: & en fait pēdre 6000. qui n'auoyēt maistres ny adueu: ce fut en uiron l'an du monde 3932. apres la nati. de Ies. 30. ans. Voyez Suetone en la vie de l'Empereur Auguste. Vegece, & Budé en son 3. li. de Assē.

QVINTILIVS Varus noble hōme natif de Cremonne, fut couronal d'Auguste, qui luy donna charge de trois legiōs pour aller en guerre contre les Allemās: mais surprins en embusches par Arminius, fut tué & desconfit luy & les siens. pour laquelle perte quasi extreme, lon dit que l'Empereur Auguste fut si grandement troublé & faché, que durant quelques moys laissant croistre sa barbe, & ses cheueux longs en signe de tristesse, frapoit de sa teste contre les portes, en s'escriant tout hault, *Quintilius Varus, rends moy mes legions.* Iceluy fut grand ami de Vergile, qui fait mention de luy honorablemēt, en ses Eclogues 6. & 9. Seruius dit que ce capitaine Quintilius Varus, auoit premiere-ment eu victoire sus les Alemās, mais puis apres, comme i'ay dit, fut par eux deffait, en l'an du monde 3972. apres la natiuité de Iesus Christ 10. ans. Voyez Sueton. en la vie d'Auguste.

*Fin de la premiere partie.*

# TABLE DE LA PREMIERE

partie du present liure, par ordre alphabetic.



Arō pag. 26	Abd, ou Ehud	31	C. Iules Cesar	154
Abrahā 19	Archiloch	91	C. Octavius Aug.	165
Abesan 52	Arphaxad	8	C. Mecœnas	163
Abia, ou	Aristote	124	C. Marius	146
Abiam	Aristobulus fils d'Hir-		Calphurnia	155
Abimelech	canus	144	Cambyfes	108
Accia	Aristobulus fils de Iam		Camillus	125
Achab	neus	151	Candaules	86
Achas	Artaxerxes	116	Cassander	134
Achilles	Artemisia	126	Cato Vticense	157
Adam	Asa	64	Cecrops	25
Agamemnon	Ascanius	56	Cham	7
Agar	Ascatades	25	Chilo	98
Auguste Emp.	Aseneth	23	Cicero	159
Ahias	Asspasia	119	Cimon	114
Alcibiades	Athalia	71	Claudia fille de Metel-	
Alexādre le Grād	Atlas	24	lus	150
Alexād. fils de Pyr.	A. Posthumius Albi-		Claudia femme d'Augu-	
Alexandra	nus	138	ste	166
Altadas	Aurelia	153	Cleobul	100
Amasias	Axa, ou Acfa	31	Cleopatre	170
Amon	Azarias, ou Ozias	78	Clelia	113
Amphion	Aasa	65	Comerus Gallus	10
Amri	# B Barac	34	Coriolan	112
Ancus Martius	Baruch	92	Cornelie femme de Ce-	
Androgeus	Belus Iuppiter	10	far	155
Andromache	Berenice	133	Cornelie fille de Scipion,	
Andromeda	Bias	99	& femme de Grac-	
Anthermus	Brenno, ou Brēnus	125	chus	145
Antigonus Cap. d' Ale-	Brutus fils de Syluius,		Conon	121
xandre le Grād	qui estoit fils ou fre-		Corax	29
Antigonus Gonatas fils	re d'Ascanius	58	Cossutia	155
de Demetrius	Brutus Romain	161	Crates	123
Antigonus fils d'Ari-	Bupalus	106	Cresus	103
stobul	C Admus	29	Curetes	25
Annibal	C. Cassius	161	Cyrus	104
	# Bacchus.	30.	Dali	

<b>D</b> Alida, ou Dali- la 57	<b>G</b> Edcon 35	Ioachin 93
Daniel 95	<b>G</b> Gyges 86	Ioacim, ou Eliacim 93
Darius 110	<b>H</b> Eber 9	Ioathan 78
Dauid 61	<b>H</b> Hector 42	Ioiada 72
Debora 34	Hecuba 41	Ionatas 143
Deianira 37	Heleine 48	Ioram Roy de Iuda 69
Demetrius 135	Hercules 37	Ioram Roy d'Israel 70
Demosthenes 128	Herodes Ascolonit 162	Iosaphat 69
Denis Tyran de Sic. 130	Hermione 55	Ioseph fils de Iacob 23
Deucalion 25	Hersilia 82	Iosias 88
Denis fils de Hæmon 16	Hesiode 59	Iosue Gouverneur des enfans d'Israel 27
Dido 74	Hippodamie 32	Isaac 21
Diogenes 123	Hippolyte Am az. 45	Ismael 20
Dionysius Bacchus 30	Hipponax 106	Isis 17
Dionysius Sebasis 30	Holofernes 108	Iuba 157
Dirceus Poëte 76	Homere 59	Iudas Machabeus 142
<b>E</b> Geria 87	Hosea, ou Osee 80	Iugurtha 146
<b>E</b> Ela 66	Hypsicratee 148	Iulie fille de Cef. Iul. 156
Eleazar fils d'aarõ 27	Hyrc. fils de Simõ 144	Iulie fille d'Augu. 169
Eleazar fils de Onias 139	Hyrcanus fils de Iam- neus 151	<b>L</b> Ais 128
Eliacim, ou Ioacim 93	<b>I</b> Acob 22	<b>L</b> Lampedo, ou Lã- peto Am az. 44
Elie 68	<b>I</b> Iair 35	Latinus 53
Elisee 68	Iamneus 147	Lauinia 53
Eneas 54	Ianus 15	Lia femme de Iacob 22
Epaminondas 122	Iaphet 7	Liue Drusille 167
Epicure 132	Iasius Ianigena 25	L. Iules Cesar, pere de l'Empereur 153
Epimenides 109	Iehosua, ou Iosue, Ponti- fe des Iuifs 105	L. Munatius Pläcus 159
Esaie 85	Iehu 72	L. Quintius Cincinna- tus 117
Esdras 116	Iephte 52	Lucrece 111
Esope 102	Ieremie 92	Lycurgus 76
Euander 40	Ieroboã fils de Nabat 63	Lysander 121
Eue 5	Ieroboã fils de Ioas 77	Lysimachus 136
Europa 36	Iezabel 67	<b>M</b> Anahen 79
Ezechias 81	Ignogne 58	<b>M</b> Manasses 85
Ezechiel 95	Ioas Roy de Iuda 73	M. Agrippe 169
<b>F</b> Vluia 152	Ioas Roy d'Israel 75	Minerue, 16, M. Ant
<b>F</b> Furius Camil. 125	Ioachas 75	
	Iuppiter. 10. 16.	
	Iuno. 17.	

T A B L E.

M. Antoine	170	talus	127	Ptolemeus Philadel-	
Marcel, mari d'Octavia		Orestes	55	phus	139
171		Orithye Amazone	46	P. Clodius	152
M. Clau. Marcellus	138	Osiris	17	Pythagoras	109
M. Curius Detatus	129	Othoniel	31	Pyrrhus	137
Mariamne	162	Ozias, ou Azarias	78	<b>Q</b> Vintilius Varus	
M. Furius Camillus	125	<b>P</b> Acorus	160	172	
Marius	149	Palladon, dicte Mi-		<b>Q</b> . Metellus Pius	150
M. Valer. Corvinus	129	nerue, ou Pallas.	16	<b>R</b> Achel	22
Martia	158	Palamedes	51	Racilia	117
Marthesie, ou Marpesie		Panthee	97	Rebecca	21
Amazone	44	Paris	48	Reu, ou Rhagan, ou Re-	
Matathias	142	Pelops	32	gu	11
Mausolus	126	Penelope	49	Rhodope, ou Rhodopis	
Menalippe	45	Periander	100	102	
Menelaus	47	Pericles	119	Roboam	62
Minos	36	Penthesilee	46	Romulus	82
Minotaure	43	Perseus	28	Romus Roy des Celtes	
Mithridates	148	Phacea fils de Manahen		29	
Moyse	26	79		<b>S</b> Ale	8
<b>N</b> Abuchodonosor		Phacea, ou Phacee, fils		<b>S</b> Salomon	61
94		de Romelie	80	Salmanasar	84
Nachor	14	Phaleg	9	Samgar	31
Nadab	65	Phoenix	29	Samotes	13
Nauplius	51	Philippe de Macedoine		Samson	57
Nemrod Saturnus	10	127		Samuel	60
Nicostrate	40	Pittacus	99	Sappho	97
Ninus	12	Plato	124	Sara	19
Noe	6	Polyxene	50	Sarug	11
Niobe	33	Pompeie femme de Ce-		Saul	60
Numa-Pompilius	87	far	155	Scipion Africain	141
<b>O</b> Chosias Roy d'Is-		Pompee	156	Scribonie	167
rael	70	Porfena	113	Sedechias	94
Ochosias Roy de Iuda	71	Portia	158	Seleucus	134
Ocrisia	101	Priam	41	Sem	6
Octavia	171	Prometheus	24	Semiramis	18
Olympias mere d'Ale-		Prusias	140	Sennacherib	84
xandre le Grand, au-		Ptolemeus fils de Lagus		Seruius Tullius	101
trement dicte Myr-		133		Sesach	62
				Saturne. 10. — Sibyl	

T A B L E.

Sibylle Persique	38	<b>T</b> Anaquil	96	Tullus Hostilius	89
Sibylle Libyque, ou Li-		<b>T</b> Tarquin Collatin		Turnus	54
byffe,	38	III		Tuyscon, dict Ascenas	
Sibylle Delphique	39	Tarquin le Prisque	96	13	
Sibylle Cumee	39	Tarquin le fier	107	<b>V</b> Ergile	163
Sibylle Erythree	83	Taurus	162	Vesta	15
Sibylle de Samos	83	Terentia Emylia	141	Veturia, mere de Corio-	
Sibylle Cumane	90	Thales	98	lan	112
Sibylle Hellespontique		Thalestris Amazone,		Vlysses	49
90		autrement dicte Mi-		<b>X</b> Antippe	118
Sibylle Phrygienne	164	nothea,	131	Xenocrates	132
Sibylle Tyburtine	164	Thare	14	Xerxes	114
Sibylle Europe	168	Themistocles	115	<b>Z</b> Acharie Roy	
Sibylle Aegypte	168	Theseus	43	d'Israël	77
Sicheus	74	Thola	35	Zaleucus, pere & fils	
Simõ Gov. des Juifs	143	Trasybulus	122	91	
Socrates	118	Timandre	120	Zameis Ninias	18
Solon	103	Tiberius Gracchus	145	Zopyrus	110
Stesilee	115	Timoleon	130	Zoroastes	12
Sylla	149	Tomyris	104	Zorobabel	105
Sylvius Posthumus	56	Tullia	107	F I N.	

